

MATAUPU VASEGA MATUTUA FAAPITOA & AUTALAVOU LAITI 2015

MANATU AOAQ: O LE ATUA I TOTONU O SUIGA (GOD IN THE MIDST OF CHANGE).

Fepuari: NUNUMI MA GAOGAO (Void and empty).

- 8:** (**Aso Sa o Tupulaga**) Fai le ola ma taulaga ola (Offer life as a living sacrifice). (Roma 12:1-3).
- 15: Ave i le Atua mea e tatau ma le Atua (Offer God what is necessary for God). (Kenese 4:3-7).
- 22: E lē o a'u, a o Keriso o lo o ola i totonu ia te a'u (I am not, but Christ lives within me). Kalatia 2:20-21

Mati: PUAPUAGA O LE MESIA (Suffering of the Messiah).

- 1: Mesia e tusa ma le mana'o o Iutaia (Messiah according to the Jewish will) Mataio 26:57-67
- 8: Mesia puapuagatia (The suffering Messiah). Mareko 15:6-20
- 15: Aisea e tatau ai ona tiga le Mesia? (Why the Messiah should suffer?). Isaia 53
- 22: Aisea ua faaigoa ai le Mesia o le Atalii o le Tagata? (Why the Messiah named the Son of Man?). Mareko 14:60-65
- 29: Aso Sa o le Laupama:** Ua maliu Iesu i le satauro (Jesus died on the cross). Mataio 27:32-50

Aperila: MAMALU O LE MESIA (Glory of the Messiah).

- 5: Aso Sa o le Eseta/Toetu,** Ua toetu Iesu nai le oti (Jesus rises from the dead). Mareko 16:1-8
- 12: Pe ana leai le toetu (Without the resurrection). IKorinito 15:12-19
- 19: O le tino toetu (The resurrected body). IKorinito 15:35-50
- 26: O le toetu i le faasala (The resurrection to everlasting punishment). Mataio 25:31-46

Me: POTO TAMAITAI (Lady Wisdom).

- 3: Alaga le Poto i magaala (Wisdom prophesies at crossroads). Faataoto 8:22-31
- 10: **Aso Sa o Tinā:** Alofa faa-Tina o le Atua. Mareko 7:24-30
- 17: **Malologa Fono Tele Malua**
- 24: (Aso Sa o le Penetekoso)** Ua afio ifo le Agaga Paia (The Holy Spirit descends) Galuega 2:1-4
- 31: Fa'aalia ia Iesu le Poto Tamaitai (Lady Wisdom reveals in Jesus). Ioane 1:14-18

Iuni: O LE SATAURO MA LE OLA OFO ATU (The Cross & Life lay down).

- 7: Tausuai Iutaia ma Eleni i le satauro (The Jews & Creeks stumble of the cross). IKorinito 1:20-25
- 14: Ia faamagalo atu (Forgive others). Luka 17:1-4
- 21: O le mataupu i le satauro o le valea i ē o malaia (The message of the cross is foolish to those headed for destruction). IKorinito 1:18-19
- 28: Faasatauroina faatasi ma Keriso (Crucified with Christ). II Korinito 4:7-18

Iulai: O IESU KERISO & EKALEZIA (Jesus Christ & the Church).

- 5: Ia faamaoni e folafola le Talalelei (Be truthful in preaching the Good News). Galuega 2:29-47
- 12: Taitai e Iesu lana Ekalesia (Jesus leads his Church). Galuega 9:1-9
- 19: E tasi le Ekalesia (The Church is one). IKorinito 1:10-13
- 26: O le Ekalesia ma le Lotu (The Church & religion). Roma 5:15-21

Aokuso: O LE POTO LIUTINO (Incarnate Wisdom).

- 2: Liutino le Poto ia Iesu Keriso le Upu (Wisdom incarnates in Jesus Christ the Word). Ioane 1:1-5
- 9: (Aso Sa o Tamā)** – O le tofi o le tamā (The Father's role). Efeso 5:25-33

- 16: O le tamā lelei (The good father). ISamuelu 16:14-23
 23: O le tamā leaga (The wicked father). ISamuelu 15:13-23
 30: O le alofa faa-Tamā o le Atua (God's fatherly love). Salamo 23:1-6

Setema: TALALELEI O LE ALOFA TUNOA (The Gospel of Grace).

- 6:** (Aso Sa o le Talalelei): Suia e le Talalelei (Changed by the Good News). Galuega 9:10-19
 13: Ia fiafia i mea e vaivai ai (Be glad to boast about your weaknesses). IIKorinito 12:5-10
 20: Ia ola i le Talalelei (Living by the Good News). Kalatia 2:11-21
 27: Ia ia te oe le manatu sa ia Keriso Iesu (Have the mind that had in Christ Jesus). Filipi 2:5-11

Oketopa: O Ē Ō LE MALO LE LAGI (Those who belong to the Kingdom of Heaven).

- 4: Tapenaga Lotu Tamaiti
11: Aso Sa o le Lotu Tamaiti (Tala Lotu Tamaiti).
 18: Malologa Lotu Tamaiti
 25: O fanau o le tofi mai le Alii (Children are heritage from the Lord). Salamo 127:3-5/Mataio 19:13-15

Novema: LOTO FUATIA IFO (Free will).

- 1: Foai ma le loto (Giving with heart). II Korinito 8:1-7
 8: O le Atua o le alofa lava ia (God is love himself). Ioane 3:16
 15: Ia faatuatua ma alofa (Have faith with love) ISamuelu 24:8-15
 22: Mativa ae matamau (Poor but generous). II Korinito 9:1-15
29: Aso Sa o le Afio A'e/Ateveni: Ia fai sau taulaga lelei (Present a good offering). Mataio 2:10-11

Tesema: FETUAO PUPULA (The Morning Star).

- 6: O le natura o le pepe o le a fanau mai (The nature of the new born child). Isaia 53
 13: Fai lou ola ma meaalofa mo Iesu (Your sanctified life as a gift for Christ). IITimoteo 4:1-5
 20 & 27: Malologa Kirisimasi

.....

MANATU AOAQ: O LE ATUA I TOTONU O SUIGA (God in the midst of change).

O le manatu aoao o lenei tausaga ua faatāua le Atua i totonu o suiga. Po o ā suiga, ia manatua o lo o i ai le Atua. Ua na o ia le tali mo lana Ekalesia a o feagai ai le lalolagi ma suiga e tele ua aafia ai le olaga o aso uma. O suiga i le tau, le tamaoaiga, tekonolosi, le aganuu, le talalelei, ma nisi suiga o silafia. O mataupu iloga ia o nei aso ua aafia ai tagata uma. O le fesili, (i). Pefea ona tauave e le tagata mativa le taugata o le tamaoaiga i le tulaga ia ola lelei, mo lona aiga ia i ai se fale lelei, ia mafai foi ona aooga lana fanau ma i ai se atina'e e tua i ai? (ii). Pefea ona lolo mai manatu o malo maumea ina ia faaitiitia gasa oona ia latou fale gaosi mea ua aafia ai le tau? (iii). Pefea ona tumau pea le maualuga o le vaai a le aganuu i le talalelei? (iv). Pefea ona laveaiina ā tatou fanau mai aafiaga o le tekenolosi, ua fa'aaoga sese ai le taimi, fesootai ai ma ata mataga, tu ma aga faanuupo, ma itiiti ai le mafaufau lelei e tusa ma le finagalo o le Atua? Ioe o nei suiga ma aafiaga i le olaga e tasi lava le tali mo le Ekalesia. Ua na o le faatuatua i le Alii le tali. E pei o le afioga a le Alii ia Sapakuka – “.. a o lē amiotonu e ola o ia i lona faatuatua”. Tatou tumau i le faatuatua ma tatalo ina ia tali mai le Alii e pule aoao i mea uma – ina ia gasolo mea uma i lona filemu ma lona manuia a o feagai ai lana fanau ma ia suiga tetele. E leai se mea e faigata i le Alii pe a tatou faatuatua ia te ia ma lotu tetele e faia ma olaina lona finagalo paia i aso uma.

.....

FEPUARI: NUNUMI MA GAOGAO (Void and empty).

O le autu o lenei masina ua faatāua ai le suiga fou ua foafoa ai e le Alii lo tatou tagata tuai sa nunumi ma gaogao ona o le pule a le agasala ma le alii o le lalolagi iō tatou olaga – i le tagata fou e ala i lona alofa tunoa ia Iesu Keriso. E finagalo le Alii e suia le tagata tuai pe a tatou salamō ma faatuatua ia te ia e ala i lona alofa tunoa ia Iesu Keriso lo tatou Alii ma le Faaola.

.....

ASO SA: 8 FEPUARI, 2015

MATAUPU: (Aso Sa Tupulaga) FAI LE OLA MA TAULAGA OLA (Offer life as a living sacrifice).

SINI: Ia aoao le vasega ina ia malamalama, o le ola ua fai ma taulaga ola o le tagata lea ua pulea e Keriso lona tagata atoa (tino, mafaufau, agaga).

TUSI FAITAU: Roma 12:1-3

FESOASOANI MO FAIAOGA

O le mataupu, 'Fai le ola ma taulaga ola'. O le uiga o le mataupu, ia ofo atu le ola atoa mo le Alii. E malamalama atili le mataupu i upu ia a Paulo. (i). Ua faasatauroina faatasi i ma'ua ma Keriso, ou te le toe ola a'u, a o Keriso o lo o ola i totonu ia te a'u, o le ola ou te ola ai nei i le tino ou te ai lava i le faatuatua i le Alii o le Atua, o le na alofa mai ia te a'u, ma foaiina mai o ia e ia mo a'u” (Kalatia 2:20). (ii). O aso uma e fasiotia ai i matou i la le tino. O lona uiga, ua oti i le tagata tuai 'a ua ola i le ola fou ia Keriso Iesu. Ma o le tagata lea ua taitaiina le tagata atoa (tino, mafaufau, agaga) e le tulafono a Keriso e ta'ua foi o le tulafono a le Agaga po o le tulafono i le faatuatua. Ma o le ola lea ua fai ma taulaga ola. Ua le o toe nofo lea tagata i lalo o le pule a le agasala ma le tiapolo.

O le Tusi Faitau, o lo o tusi ai Paulo i le ekalesia i Roma i le tāua tele o le fai o le ola ma taulaga ola. O lo o iloa lea tulaga i le aoi o le

Aposetolo i le f.1. E faavae le manatu o Paulo i luga o le alofa mutimuti vale o le Atua. Aisea? Auā foi o le mutimuti o le alofa o le Atua o lo o faailoa mai ai le toasa ua matuā tele ua ufitia ai le tagata ona o le pule a le agasala ma le tiapolo. Ua oo ai le tagata i se tulaga ua le mafai e sona malosi ma se poto faaletagata ona faaolaina o ia, ae ua na o le faafanoina. Peitai ua na o le alofa mutimuti vale o le Atua e mafai ai. Ma o le faapogai lea o le aioi o Paulo ia Roma ina ia matuā iloa lelei lea tulaga maualalo sa i ai, ma lona natura faafanoina. Ma ia gaua’i loa i le tuuina atu o ō latou tino i le Atua, o le taulaga ola, ma le paia, ma le malie – o le mea e tatau ai ona latou faia.

Ua ta’ua i le f.2 le faatonuga ua faailoa ai e Paulo ia Roma le natura o le ola ua fai ma taulaga ola, paia ma malie – e matuā le tatau ona toe aliali mai ai amio a lenei lalolagi. Auā foi o le kerisiano o lo o ola ai i totonu o tu ma aganuu ma tapuaiga faapaupau tainane amioga faalelalolagi. Ma o se faamanatu i le ekalesia i Roma, ina ia matuā liliuina e ala i le loto ua fuata’iina ina ia ō latou manino i le olaga moni faa-Kerisiano pe faasoo o Keriso le Alii ma le Faaola a o ola ai i lenei lalolagi.

Uiga o upu ma fuaitau

1. Taulaga ola (living and holy sacrifice) – o le ola atoa ua faapaiaina ma ofo atoa mo le Alii ma lona finagalo
2. Alofa mutimuti vale (mercy) – o le alofa ua ofo fua atu mo ē ua leai se malosi
3. Liliuina i le toe fuata’iina (transform into a new) – o le suiga fou e lē i i ai muamua e tusa ma le finagalo paia o le Atua
4. O mea ua lelei, ma le malie ma le paia (good, pleasing and perfect) – lelei atoatoa e leai se ila po o se pona

GALUEGA FAATINO: Fetufaaiga

Ia fetufaai ma le vasega i le uiga o le ola atoa ua fai ma taulaga ola o le mea e paia ma malie i le Alii

PESE: Ave lou ola ia aogā (157, Pese & Viiga EFKS).

AOAOGA

1. Ave le ola atoa e pule ai le Alii
2. ‘Aua nei galo le alofa mutimuti vale o le Alii ua na totogi le tau i o ā tatou agasala
3. Ia ‘aua le amio faatasi ma lenei lalolagi
4. Ia ‘aua nei avea le saolotoga ia Keriso ma avanoa mo le tino ma ona tuinanau

ASO SA: 15 FEPUARI, 2015

MATAUPU: AVE I LE ATUA MEA E TATAU MA LE ATUA
(Offer God what is necessary for God).

SINI: Ia aoao le vasega ina ia latou malamalama, o mea e sili ona lelei latou te maua e mafai ona latou ofo atu e fai taulaga ai i le Alii, pe afai ua lelei ā latou amio i le itu faaleagaga

TUSI FAITAU: Kenese 4:3-7

FESOASOANI MO FAIAOGA

O le mataupu. ‘Ave i le Atua mea e tatau ma le Atua’. O lona uiga, ia faamuamua le Atua i le mea sili ona lelei e te maua. Ma e afua mai le loto ua talitonu ma iloa le Atua ma lona tulaga i le feagai ai ma lana foafoaga faapea le tagata na ia faia. E ui ina agasala le tagata ma aveese mai ma Etena le parataiso ma faanofa i le elele na faia mai ai o ia, peita’i o ia lava o le tagata na faia e le Alii i lona faatusa, ma ua ia te ia foi folafolaga a le Atua (Kenese 3:15e) mo le manuia sili o lo o taoto mai i le lumanai mo le tagata ma le foafoaga aoao.

I le Tusi Faitau, o lo o faailoa mai ai e Kenese le ulua’i fanau i le amataga. O nei tama e matua Kaino a o Apelu e laititi. E eseese foi ā la’ua taleni mai le Alii - o Apelu o le fai lafumanu, a o Kaino o le galue

fanua o ia. O nei taleni e tāua uma i le tulaga o faapolopolo po o ulua'i fua e pito sili ona lelei e ofo atu mo taulaga. Fai mai le Tusitala o Kenese, 'Ua oo ina atoa o aso', o lona uiga ua oo i le taimi o le seleselega, ma e mua'i filifili ulua'i fua lelei po o faapolopolo mai le lafu po o le fua o le fanua e ave mo taulaga. Ma sa faia e nei tama peitai o Kaino ua ia avatu le fua o le fanua o le taulaga i le Alii, a o Apelu ua ia avatu le ulua'i tama a lana lafu. O lona uiga e le o se ulua'i fua o le fanua na avatu e Kaino vagana Apelu. O le fesili, Aisea? E mafai ona faapea e le i faamaoni Kaino i lana faatoaga ua leai ai se fua lelei na te maua. E mafai foi ona faafesootai i le leai o se loto fuatia ifo e lelei ia Kaino e ave ai le mea sili mo le taulaga i le Alii. Atonu foi sa faamanuia le Alii ia Apelu ae le o Kaino. Pe afai o lea, aisea ua mafua ai? Ona tatou vaai lea i le pule a le agasala ma le tiapolo i le tagata ua aafia ai le olaga ina ua nonofo ai le uluai tagata i le eleele na faia mai ai o ia. O le pule lea e mafua mai ai le manumanu, le ola aiū ma le lē alofa. O le pule lea ua faatele ma ave ai e le tagata le mea lelei mo ia lava ae le mo le isi ma le Alii. Lea i le f.4e o lo o talia ai e le Alii le taulaga a Apelu ae le o Kaino. Ua ita tele foi Kaino i le le silasila o le Alii i lana taulaga. O le ita o Kaino e le itiiti a o le faailoga lea o le pulea e le tiapolo ma le agasala o lona loto lea ua iloa i lona ita tele i lona uso. Ua aoao foi le Alii ia Kaino i lana amio e le lelei e loto ita ma mata faaūū. Auā pe ana lelei lana amio e na te maua le fiafia ae afai e le lelei lana amio o lo o taoto i le faitotoa le agasala. Ma o le agasala lea e naunau e faaleaga o ia ma mafai ona ia faia ma faatino i le isi tagata. O le agasala foi lea o lo o leaga ai le amio ma fai mea leaga ai i le Atua ma isi tagata.

Peitai na faatoilaloina e Keriso le pule lea a le agasala ma le tiapolo i loto o tagata e ala i lona maliu i le satauro ma lona toetu nai le oti ma le tuugamau i le mana tele o le Atua lona Tamā. O le ola paia o le Alo o le Atua i lona fai ai ma tagata ua ave atoa mo le Atua i le anaana ma le usitai i lona finagalo faaola mo le lalolagi agasala. Ua mafai ai ona tatou ave i le Atua mea e tatau mo le Atua e oo lava i ō tatou ola atoa. Ma e amata mai le loto salamō ma le faatuatua i lona suafa

GALUEGA FAATINO: Fetufaā'iga

Ia fetufaai ma le vasega i le tāua o le taulaga e ave mo le Alii, faapea le tāua o le amio ia lelei i le itu faaleagaga auā o le faapogai lea o le faamuamua o le Alii i mea uma e manatu i ai e oo lava i taulaga

PESE: Iesu e, ou te fia fai (158, Pese & Viiga EFKS).

AOAOGA

1. Faalelei muamua le amio e lelei ai lau taulaga
2. Faamuamua le Atua i mea uma e te manatu i ai
3. Tulei ese le tiapolo ma le agasala mai le faitotoa o lou loto
4. 'A 'e amio lelei e te maua le fiafia ma ola saoloto

.....

ASO SA: 22 FEPUARI, 2015

MATAUPU: E LĒ O A'U A O KERISO O LO O OLA I TOTONU IA TE A'U (I'm not, but Christ lives within me).

SINI: Ia aoao le vasega ina ia malamalama - e manuia le ola ma le lumana'i pe a tatou oti i lo tatou tagata tuai 'a ua tatou ola i le ola fou ia Keriso

TUSI FAITAU: Kalatia 2:20-21

FESOASOANI MO FAIAOGA

O le mataupu, '*E le o a'u, a o Keriso o lo o ola i totonu ia te a'u*'. O le 'a'u' o lo o tautala ai Paulo e faasino i lona ituaiga tagata ma lona talitonuga na taitai ai lona ola faatuatua i le Atua. O se talitonuga na ia naunau ai e saisai ma faafalepuipui le 'au kerisiano i le amataga tainane lona auai i le fasiotia o nisi o le uluai Ekalesia e pei o Setefano. O le talitonuga faa-Iutaia ma faa-Faresaio lea o Paulo ua suia e Keriso ma aliali mai ai lona tagata ua suia atoatoa e Keriso, ma fai ai o ia ma vaa ma ipu o le Talalelei a le Alii i nuu ese faapea le fanauga a Isaraelu. Sa

tetee ia Keriso ma le Ekalesia, ae i le fa'aali o le Alii toetu ia te ia a o ia gaua'i e saisai mai kerisiano ai nuu ese, na iloa ma manino ai ia Paulo o le tulafono ma le au perofeta ma folafolaga a le Atua ia Aperaamo faapea le amataga i le gata (Kenese 3:15e) - ua taunuu uma ia Iesu Keriso ma lona satauro faapea lona toetu nai le oti ma le tuugamau.

O Paulo la ua le o toe Saulo pei ona sa i ai muamua, a o le Paulo ua taitai ai Keriso na maluu ma toetu i lona fai ai ma ana Aposetolo. O se suiga na fa'aalia atoatoa i le tagata atoa o Paulo. O se suiga na manino mai i lona olaga i la le tino. E ui ina ola i la le tino, ae peiseai ua oti i la le tino 'a ua ola i la le agaga faatasi ma Keriso. O se suiga na oo ai i lona tino faaletagata mea matua tiga faapea ma puapuaga ogaoga o lenei olaga. O sauaga, o mai, o manufeai, o le fia ai ma le fia inu, o le faatiga ma le faamata'u mai o ona tagata Iutaia, e oo lava ia satani ua ia tui mai ia te ia i le mea matuitui. Peitai e ui i nei mea tiga e tele, ae sa faigofie ona ia fiafia i ai ona o Keriso lona Matai o lo o ola i totonu ia te ia e ala i le faatuatua – o le meaalofo o le alofa o Keriso ia te ia i lona soifua paia ua foai fua mai e ia lava i lona lava finagalo malie. Ma i le f.21, ua tautino ai e Paulo ia Kalatia – na te le faaleaogaina le alofa tunoa lea o le Atua ua ala mai ia Keriso, auā ua oo mai ai le amiotonu a le Atua ia i tatou. I nisi upu, o Keriso ua tauamiotonuina ai i tatou e ala i le faatuatua ae le o le tulafono. Aisea? Auā foi ua ta'u lelei mai e le tulafono lo tatou solitulafono. O lona uiga e leai se tasi e sao ma amiotonu i luma o le Atua. Ae ua na o Keriso o la tatou amiotonu pe a tatou salamō i agasala sa fai, ma faatuatua i lona suafa. I ni upu faigofie, ia le toe ola lo tatou tagata tuai, a o Keriso o lo o ola i totonu ia i tatou e ala i mata o le faatuatua.

O le aoaoga tāua mo nei aso i faafitauli ua aafia ai le fiafia o tagata ma fanau i le Alii. O le mea o lo o fia maua, ia iloaitino Keriso o lo o ola i totonu ia i tatou iō tatou olaga i aso uma. I le aoga, i le galuega, i le aiga, i le lotu aemaise i fesootaiga ma fuafuaga tatou te fai. I aoga a fanau, e manuia le aoga pe a le toe ola lou tagata tuai a o Keriso o lo o ola i totonu ia te oe.

Uiga o upu & fuaiupu

1. Alofa tunoa (grace) – alofa fua mai e le i tauanauina e le i fuaina foi i so tatou leaga
2. Amiotonu (righteousness) – mea moni ma sa'o e tatau ona faia
3. Tulafono (law) – taiala e taitai ai le ola atoa ina ia manuia
4. Faasatauroina (crucified) – faasalaga a Roma mo ē le taualoa ma maulalo i le vaai a le lalolagi

GALUEGA FAATINO: Fetufaaiga i fesili

1. O ā foliga ma amio a le tagata ua ola ia Keriso?

Tali; Faitau le Kalatia 5:22-26 e fesoasoani

2. O fea tonu le taimi ma nofoaga e tatau ona fa'aalia ai ia amio ma foliga?

Tali; O taimi uma o le olaga, ma so o se nofoaga amata mai lava i le aiga, aoga, ma nofoaga faitele, faapea ma falefaigaluega

3. Aisea e tāua ai i le ola o le tagata le ola ia Keriso?

Tali; E ta'uaogāina ai aso o le ola ma manuia ai faasinomaga tatau o le a fa'aaogaina ai le ola ma viia ai le Atua

PESE: Ou te nofo ou te ofo (Pese & Viiga 41 EFKS).

AOAOGA

1. 'Aua nei toe foi i tua i le olaga tuai e tauvalea ma malaia ai le olaga
2. Ia tautino ma tumau ma le faamaoni
3. Faailoa atu i lau amio ma lou olaga o lo o ola Keriso ia te oe.

.....

MATI: O PUAPUAGA O LE MESIA (The Suffering of the Messiah).

O le nei masina ua faatāua ai puapuaga o le Mesia. O ona puapuaga ua faaolaina ai le tagata nai le toasa atali ona o le pule a le agasala ma le alii o le lalolagi i olaga o tagata. E le faigofie ae ua faigofie ona o le Mesia o ia lava o le Atua i lona tulaga Alo o le Atua. Ua fai ai lona ola paia ma taulaga ma togiola e ui ina puapuagatia ai lona ola ona o le pule a le agasala ma le tiapolo i olaga o ona tagata ma le lalolagi.

.....

ASO SA: 1MATI, 2015

MATAUPU: O LE MESIA E TUSA MA LE MANA’O O IUTAIA
(The Messiah according to the Jewish will).

SINI: Ia aoao le vasega ina ia malamalama e le mafai ona fua le galuega faa-Mesia a Iesu i ni ō tatou lagona ma ni mana’o faaletagata.

TUSI FAITAU: Mataio 26:57-67

FESOASOANI MO FAIAOGA

O le mataupu, ‘O le Mesia e tusa ma le mana’o o Iutaia’. O lona uiga o le Mesia e faatinoina ma faamalieina manaoga o ona tagata. Aisea ua faapea ai? E oo mai i le Feagaiga Fou i taimi o Iesu o lo o faatalitali ona tagata mo le Mesia na valoia na te faasaolotoina ona tagata. Mo taitai o le lotu ma le nuu o Iutaia i le Feagaiga Fou o se Mesia na te faasaoloto ona tagata mai le pule a malo faapaupau o le lalolagi e pei o Roma. Mo tagata e pei o Simeona o le Mesia na te aumaia le faaolataga a le Atua mo lona nuu faapea ma nuu ese (Luka 2:25-32). O le faaolataga e faasaolotoina tagata uma mai le pule a le agasala ma le tiapolo. O le faaolataga o lona faamoemoe ia faaolaina le agaga, le tagata i totonu. Ma o le galuega faa-Mesia tonu lea ua fa’aali mai ia Iesu. O lona faamoemoe ia faatuina le malo o le Atua i loto o tagata. E le faaletino i

se tulaga o se fitafita e sau ma se pule ma le malosi uiga ‘ese e faatoilalo fili o pulea tagata o le Alii.

I le Tusi Faitau, o lo o faamatala ai e Mataio le pu’eina o Iesu ma lona tuuina atu ia Kaiafa le ositaulaga sili o lo o potopoto ai le ‘au tusiupu ma toaina o le nuu. O le autu o lenei mea ua faia ina ia latou faamasino ai ia Iesu ma maua ai se tuuaiga tatau latou te fasioti ai ia te ia. Peitai o le faafitauli e le o i ai ni ā latou molimau ia Iesu ua saunia. O lea ua latou saili ai ni molimau e faasaga ia Iesu, peitai e ui ina toatele a o molimau pepelo uma. Sa i ai foi molimau pepelo e toalua e ese le la mau (f.61) ma le uiga o upu a Iesu. O lo o faatatau upu a Iesu i le tagata o le malumalu lea e mafai ona fai ma malumalu e afio ai le Atua e ala i lona maliu ma lona toetu mai i le aso tolu. O nei molimau uma sa leai se upu a Iesu na tali atu i ai. Ma o le ala lea ua fai atu ai le ositaulaga sili ia Iesu ina ia tauto atu i le suafa o le Atua soifua po o ia o le Keriso o le Alo o le Atua. O se mataupu e i ai ona tapu ma sa e tusa ma le talitonuga o Isaraelu i le Atua e toatasi. O se mataupu foi e fesootai ma perofetaga a perofeta anamua ma folafolaga a le Atua i le gata (Kenese 3:15e), ma Aperaaamo, ma Tavita. E ui la o Iesu o le Mesia moni lea, ua faataunuuina ai le tulafono, perofetaga ma folafolaga a le Atua, ma e fesootai foi ma le Atua moni e toatasi, ae ua lava le fesootaiga lea ma ala e mafai ona latou molia ai Iesu ma fasiotia ai.

Auā foi e tamau taitai nei o le lotu Iutaia i le talitonuga i le Atua e toatasi e leai se isi e tusa ma ia. Ma ua fetau lelei lo latou fia fasioti ia Iesu ma le tali a Iesu o ia lava lea. Ua le gata i le Keriso a o le Atalii o le tagata, e nofo foi i le itu taumatau o le Atua, e sau foi o ia i ao o le lagi. O se tali e ui ina sa’o ma moni, ae na matuā ita ai le ositaulaga sili ma saei i ona ofu. Auā i lona manatu ua ia faifai i le Atua e toatasi i le tulaga ua faatulaga e Iesu o ia e tutusa ma le Atua moni e toatasi. Ma e tusa ma lo latou talitonuga – ua molia Iesu i lona upu vale ma faifai i le Atua, ma e tatau ona oti o ia. Ma o le nei tuuaiga sese ua latou molia ai Iesu, ua fa’aalia ai e le o le Mesia lea sa latou faatali i ai. Sa ō latou mananao i se Mesia e faamalieina ō latou manao, ma mea e loto i ai. Pe afai la ua fai atu Iesu o ia o le Atalii o le tagata, e fesootai ma le Mesia puapuagatia i le Isaia 53; o le Alo o le Atua e nofo i le itu taumatau o le Atua ma sau i ao o le lagi, o lona uiga e le o le ituaiga Mesia lea latou te

loto i ai. Aisea? Auā foi o lona uiga e tutusa ma le Atua, ma o se Mesia la e faalogo ma usitai i ai tagata ma pule i tagata ae le taitaiina e tagata ma faamalieina manaoga sese ma leaga o tagata.

Ma na tatou iloaitino o Iesu Keriso o ia lava o le Mesia moni i lona maliu i le satauro ma lona toetu – o le taulaga ma le togiola mo ā tatou agasala. O lo tatou salamō i agasala sa fai, ma faatuatua i lona suafa tatou te iloa ai o ā tatou agasala ma amio leaga ma amio faaletaupulea e pei ona fa'aalia e ona tagata ma le lalolagi ia te ia, o uiga ma amioga ia tatou te le mananao ai ia te ia, ae ia faia e ia mea sese tatou te mananao ai. O lona maliu la ma lona toetu ua faia ai se mafaufau fou faa-Keriso ua tatou iloaitino ai oi tatou o lana fanau ua ia toe avatu ia te ia e ala i lona alofa tunoa ma mutimuti vale. Ma o ia foi ua taitaiina o tatou olaga i aso uma o lo tatou ola, e pule aoao foi i tagata ola uma ma le foafoaga aoao.

Uiga o upu ma fuaitau

1. Keriso – o lē ua faauuina
2. Atalii o le tagata – o le auauna puapuagatia
3. Ositaulaga sili -

I le Feagaiga Tuai o ia e faia le taulaga togiola mo agasala a Israelu i le aso o le togiola, ma taitaiina le faatinoina o taulaga eseese a le nuu i le malumalu. Ua na o ia e mafai ona alu i totonu i le mea e sili ona paia.

4. Tauto – tautino ma le faamaoni
5. Iite – vavalu, mate

GALUEGA FAATINO: Fetufaaiga i le Fesili

1. O le fesili e fetufaai ai: O le ā sou manatu, o le Mesia po o le Keriso o Iesu lea le Alo o le Atua o le Atalii foi o le tagata – o se Mesia e fua lana galuega faaola i o tatou lagona ma manao faaletagata pe fua i ai i lona finagalo mea tatou te faia?

PESE: Pese ia Iesu o lo tatou Faaola (94, Pese & Viiga EFKS).

AOAOGA

1. E taitaiina e Keriso i tatou e ala i le loto salamō ma le faatuatua
2. E le mafai ona fua le galuega faaMesia i ni o tatou lagona ma ni mana'o faaletagata
3. Ua na o le Keriso le Alo o le Atua le Atalii o le tagata na te faasaolotoina i tatou mai le pule a le agasala ma le tiapolo
4. O le malo o le Mesia le Keriso o le malo e le faalelagolagi e faamoemoe i le malosi faaletagata, a o le malo e faaleagaga e faamoemoe ia Keriso ma lona Agaga.

.....

ASO SA: 8 MATI, 2015

MATAUPU: MESIA PUAPUAGATIA (The suffering Messiah).

SINI: Ia aoao le vasega ina ia malamalama o Iesu Keriso o le Mesia na puapuagatia ona o ā tatou agasala ia faamagaloina

TUSI FAITAU: Mareko 15:6-20

FESOASOANI MO FAIAOGA

O le mataupu, 'Mesia Puapuagatia'. O le upu 'puapuagatia' o lo o faamatala ai le galuega a le Mesia. Ma o le fesili, aiseā ua avea ai le Mesia ma Mesia puapuagatia? Ioe, e puapuagatia auā o le ala lea ua filifilia e le Atua e faaolaina ai lona nuu ma le lalolagi ai le pule a le agasala ma le tiapolo. O le ala e matuā faigata lava, auā na le manatu ai le Mesia i lona tulaga tutusa ma le Atua lona Tama i le lagi, ae i lona faapei ai oi tatou, ma lona tulaga o le Alo o le Atua na ia matuā fa'aali atu lona anaana atoatoa i le Atua lona Tamā. O le anaana o le Mesia na fa'aalia i lona ta'uagasalaina fua faapea aga faaletaupulea sa faia ia te ia, ae gugu e leai se upu na pa'u mai lona fofoga. O nei tuaiga sese ma faamalosi ina ia fasiotia le Mesia – o le ata lea o le pule a le agasala ma le tiapolo i olaga o ona tagata ma le lalolagi uma. I lea tulaga, ua fasia

ai o ia ma puapuagatia ai, a o ia lava o le taulaga ua fasia ina ia togiola i tatou i lona toto paia, ma tatou saoloto ai mai le pule a le agasala ma le tiapolo. O lona uiga, ua na o le pau lea o le ala e tusa ma le finagalo paia o le Atua le Tama e faaolaina ai le lalolagi ma ona tagata. Ma o le ala foi lea e tasi ua faailoa mai ai e le Atua le vaivai ma le le mafai e le potu ma le malosi faaletagata ona faaolaina ma faasaolotoina o ia mai le pule a le agasala ma le tiapolo faapea le malosi o le oti ma le tuugamau. O lona uiga, o le tasi lea o aiāiga o le faatinoga o lo tatou faatuatua. E puapuagatia ai ona o le ola ofo atu faapei o Keriso le Mesia. O lo tatou tiute lea faasoo ma faa-kerisiano – o le fai ma soo e maosiosia ma tauaveina faailoga o Keriso.

I le Tusi Faitau, o lo o faamatala ai e Mareko le faamasinoina o Iesu i luma o Pilato. Sa noanoa mai e ona lava tagata Iutaia. Sa tele foi mea na molia ai o ia e i latou, ae sa le mafai ona ia tali atu i ai se upu e tasi. Ma sa ofo ai Pilato i le lē tali atu o Iesu i mau e tele a ona tagata e faasaga ia te ia. Sa masani Pilato ona ia tatalaina se pagota e loto i ai Iutaia i taimi o ā latou tausamiga. Ma sa mananao Iutaia ia faia e Pilato lea tu e pei ona masani ai. Sa i ai i lea taimi le pagota e igoa ia Parapa ona o le fasioti tagata. Sa fesili Pilato ia Iutaia pe tatala atu ia i latou lo latou tupu. ‘A ua faaoso e taitai o le lotu Iutaia o latou tagata ina ia tali atu e tatala mai Parapa ae tuu pea Iesu. Ua fai atu foi Pilato po o o le ā se mea latou te loto i ai na te faia ia Iesu, ae ua latou fai mai, ia faasatauro ia te ia. Ua fai atu foi Pilato po o le ā se mea leaga ua ia faia, ae ua atili ai ona latou valaau – ia faasatauro ia te ia. Ua faalotomalie e Pilato ia Iutaia i lona tatala atu o Parapa, ‘a ua sasa ia Iesu ma tuu atu ai o ia ia faasatauroina. I ff.16-20, ua taitaiina ai Iesu e fitafita ma fai ia te ia isi sauaga. Ua latou faapale ia te ia i le pale na faia i laau tuitui, ma faatauemu ma feanu ia te ia. Ua latou faaofu ia Iesu i le ofu paūli, ma latou ifo ia te ia; ona latou taitai lea ia te ia ia faasatauroina.

GALUEGA FAATINO: Fetufaā’iga i fesili

1. O ā puapuaga na faia ia Iesu le Mesia?

Tali: Noanoa pei o se pagota, sasa e fitafita Roma, faapale lona ao i le laau tuitui, faatauemua ma feanu ia te ia.

2. O ai tagata na latou faaoo puapuaga ia Iesu?

Tali: O ona tagata Iutaia ma le malo o Roma e ala ia Pilato ma fitafita Roma

3. Aisea ua faasalaina ai Iesu ae leai sana agasala?

Tali: Ona o le pule a le agasala ma le tiapolo i olaga o tagata ua tatau ai i le Mesia o le Alo o le Atua – i lona tulaga o le Atalii o le Tagata, ona puapuagatia ma fasiotia e le pule a le agasala, ma i lea tulaga ua faamaligi ai lona toto paia e togiola ai ā tatou agasala

4. O le ā sou manatu, aisea ua tatala ai Parapa le tagata agasala, ae tuu ia Iesu?

Tali: Ona o le manao lea o Iutaia ia fasiotia Iesu, ma o le loto foi lea o Pilato le taitai o le malo o Roma.

PESE: Ou te nofo ou te ofo (41, Pese & Viiga EFKS).

AOAOGA

1. Ua puapuagatia Iesu ina ia faamama ā tatou agasala
2. Tuu le loto ita ma le loto eleelea i galuega lelei a isi
3. ‘Aua le ola sauā i isi tagata
4. ‘Aua le fefe e fai le mea tonu ma le sa’o

.....

ASO SA: 15 MATI, 2015

MATAUPU: AISEĀ E TATAU AI ONA TIGA LE MESIA?
(Why the Messiah should suffer?).

SINI: Ia aoao le vasega ina ia malamalama i le tatau ona tiga o le Mesia ina ia togiolaina ā tatou agasala e ala i le salamō ma le faatuatua i lona suafa

TUSI FAITAU: Isaia 53

FESOASOANI MO FAIAOGA

O le Isaia 53 o lo o molimau ai le perofeta i taimi o le tafeaga i le puapuaga o le Mesia. O taimi ua faatafea ai le nuu ona o ā latou agasala. Peitai ua molimau ai le perofeta i ia taimi faigata o le aveesea ai o le nuu mai lona tofi i Kanana ae ua nonofo ai i nuu ese. Ae aisea ua perofeta ai Isaia i le puapuaga o le Mesia i lea vaitau? Manatua ua tafea Iuta ma Ierusalema ona o ā latou agasala ma ua nonofo ai i lalo o le pule a nuu ese. O le folafola ai e Isaia o le puapuaga o le Mesia a o nonofo ai i nuu ese le nuu, o le faamoemoe fou lea o le Atua mo ona tagata ma le lalolagi uma. E le feagai ma mafuta le Atua ma ni fanau agasala, ae ao ona faamamaina i latou. Ae faamama faapefea?

I le Tusi Faitau, o lo o faamatala ai e Isaia i **ff.1-3** le **tupuaga** o le Mesia, faapea le vaai faaletagata i lona faapei ai o tagata. Ua pei le Mesia o se tatupu i luma o le Atua ma se pogai i le nuu naumati. O le tatupu o le faailoga o le ola (life) ma le faamoemoe (hope). O le pogai i le nuu naumati o le faailoga o le faamoemoe (hope) i le ata o le naumati (oti ma le puapuagatia).

E ui i lea tulaga matagofie o le Mesia, ae i le vaai faalelalolagi e le aulelei pe lalelei o ia tatou te mananao ai ia te ia. E inosia ma tuulafoaiina o ia e tagata. E pei o ia o se tagata faanoanoa, auā ua alo ese mata o tagata ia te ia. E inosia o ia ma ua le manatua lava o ia.

I **ff.4-5** o lo o faamatala ai e Isaia i lenei valoaga le **tulaga** (role) o le Mesia e tatau ai ona tiga o ia ma taunuu ia te ia mea ua ta'ua i ff.1-3.

(i). O ia na te tauave o tatou tiga ma faanoanoa ae tatou te manatu o ia

ua taia ma ua fasia e le Atua ma ua faatigaina. (ii). E manu'a o ia ona o ā tatou solitulafono, e momomo o ia ona o ā tatou amioleaga; o le aoaiga e filemu ai i tatou sa i ona luga lea; o ona faalavalava foi ua malolo ai i tatou.

I **ff. 6-8** o lo o faamatala ai pea e Isaia le **tulaga** (role) o le Mesia. O le fuaitau 'o i tatou' e faasino i tagata o le Alii. O lo latou faatafeaina i nuu 'ese ona o ā latou agasala ua pei ai i latou o mamoe ua se ua taitasi ma faasaga i lona lava ala. O le fuaitau 'mamoe ua se' – o le faailoga o sa Iuta ma Ierusalema ua latou teena ala o le Alii, 'a ua taitaiina i latou ma mea latou te fai i aso uma iō latou lava ala. O la latou amioleaga lea ua faatafea ai i latou i nuu ese. Peitai o le tau i o la tatou amioleaga, o le a faaoo e le Alii i luga o le Mesia. Ona o lea, fai mai Isaia, na faasauaina ai o ia ma tigaina, ae ua le tautala mai o ia, ma ua pei ai o ia o se tamai mamoe ua taitaiina ia fasia; e pei foi o le mamoe i luma o ē sele lona fulufulu, ua na o le faalologo ae le tautala mai.

O le fuaitau 'tama'i mamoe' e fesootai ma le manu lelei ma lē pona e fai ai le taulaga togiola mo agasala a le nuu. O le fai ma faatusa o le Mesia – o lona uiga o le ola o le Mesia e fai ma togiola mo agasala a tagata o le Alii. I le f.8, o lo o ta'ua ai e Isaia le faasaua ma le faamasinoga na aveeseina ai o ia. E leai foi se tasi e tusa ma ia auā ua vavaeeseina o ia ai le nuu o tagata ola. O lona uiga e leai se tagata na te mafai ona fai le tulaga (role) o le Mesia vagana lava o ia.

I **ff.9-12**, o lo o faamatala ai e Isaia le tatau i le Mesia o mea sili. E pei ona ese o lona **tuugamau** mai pagota sa fasiotia faatasi ma ia. Sa i le mauoa foi lona tino paia ina ua maliu, auā sa le faia e ia se faasauaga; ua leai foi se pepelo i lona fofoga. I le f.10 ua ta'ua ai e Isaia le faamoemoe o le Atua i puapuaga o lana Mesia. O le finagalo o le Alii ia tuimomomo ia te ia. Pe a fai foi e le Mesia se **taulaga** mo agasala, ona iloa lea e ia o lana fanau. O lona uiga o lo o mamao le Alii ma ona tagata ona o ā latou agasala, a o le Mesia pe a ia faia le taulaga i lona ola, o le ala lea e mafai ai ona toe lelei le Alii ma ona tagata. I le f.11, ua ta'ua ai le tiga o le agaga o le Alii na te iloa ai lana fanau ma malie ai o ia. O le **amiotonu** foi a lana auauna o le Mesia ua faatusa i le malamalama mai le Alii, e tauamiotonu ai tagata e toatele; auā e tauave

e ia ā latou amioleaga. I le f.12, ua ta'ua ai e Isaia le **mamalu** o le Mesia a le Alii i lona fai ma fautua mo ē solitulafono.

GALUEGA FAATINO: Fetufaaiga a vaega i fesili

Vaega I

1. O le ā le tulaga (role) o le Mesia ua ta'ua e Isaia?

Tali: ff.4-6

2. O ā fuaiupu i le Tusi Faitau ua ta'ua ai le tatau ona tiga le Mesia?

Tali: ff.10-11

Vaega II

1. O ā faatusa ua faatusa ai e Isaia le Mesia a o faatino lana galuega faaola?

Tali: Tamai mamoe ua taitaiina ia fasia; mamoe i luma o ē sele lona fulufulu

2. O le ā le uiga o le fuaitau lea, o le amiotonu foi a lana auauna e tauamiotonuina ai tagata e toatele?

Tali: O le Mesia o le isi ona igoa o le Amiotonu. Ma o ia o la tatou amiotonu e ala i lona ola paia ua togiola ai ā tatou agasala. E tauamiotonu i tatou e ala i le loto salamō ma le faatuatua i lona suafa

PESE: To'atasi le ua sili (74, Pese & Viiga EFKS).

AOAOGA

1. E le lalelei pe aulelei le Mesia pe a tatou lē salamō iā tatou agasala ma talia o ia i le faatuatua
2. 'Ana le tiga ma puapuagatia le Mesia e le faamagaloina ā tatou agasala
3. Ua toe fai i tatou ma fanau a le Atua ona o lana Mesia ma ona puapuaga

.....

ASO SA: 22MATI, 2015

MATAUPU: AISEĀ UA FAAIGOA AI LE MESIA O LE ATALII O LE TAGATA (Why the Messiah named the Son of Man?).

SINI:

Ia aoao le vasega ina ia malamalama, o le fai o le Mesia ma Atalii o le tagata, ina ia fai lona ola paia e tiga ma fasiotia e le pule a le agasala ma le alii o le lalolagi i olaga o tagata - ina ia magalo ai agasala a tagata uma i lona toto paia e ala i le salamō ma le faatuatua i lona suafa.

TUSI FAITAU: Mareko 14:60-65

FESOASOANI MO FAIAOGA

O le tā'ua o le Mesia o le Atalii o le Tagata e fesootai ma tiga o le Mesia. O le Atalii o le Tagata o se igoa o lo o ta'ua i le Tusi o Tanielu (Tanielu10:19?). Na faaigoa ai e le Alii le perofeta o Esekielu i ana fa'aaliga mo lona nuu a o i ai i le tafeaga i Papelonia (Esekielu 3:1). O lo o ta'ua foi e le Salamo 8:4 le atalii o le tagata, ma e fesootai le upu 'atalii o le tagata' o lo o tautala ai le fai-Salamo ma le upu Eperu o lona uiga o le lefulefu po o le efuefu. Atonu o lona uiga foi lea o lo o fetalai ai le Atua ia Esekielu ma Tanielu. E le faatusalia le tagata o le lefulefu ma le Alii. Atonu o se faamanatu foi ia Isaraelu o ia e faatauavaa ma leai se aoga pe a ia le iloa le silisili ese o le Alii i lona faia ai o ia mai le lefulefu. E mata'eta'e ma faaumatia pe a aunoa ma le Atua.

O le fetalai ai o Iesu o ia o le Atalii o le Tagata, e fesootai ma le Mesia i lona faapei ai o tagata. E ui i lona mata'eta'e e ala i tiga ma puapuaga i lona tino ma lona finagalo e ala i molimau pepelo ma upu tauemu ma faifai a tagata faaletaupulea ma agasala, ae i totonu o ia tiga na ia matuā faailoa atu ai i le Atua le tagata tonu na ia faia mai le lefulefu – e faalagolago i le Atua ma lona mana ma lona alofa tunoa.

E faapena le faamatalaina o le Mesia e Mareko. O le Mesia o le Atalii o le Tagata. E feagai ma tiga ma puapuaga ae tumau le faamoemoe i le Atua lona Tama. Na iloatino le ola faalagolago o Iesu le Mesia i le Atua, i lona anaana (usitai) atoatoa i le finagalo faaola o le Atua ua ala mai i lona faapei ai oi tatou tagata. O lona uiga, o le ola o le Mesia o le ola puapuagatia ma tigaina. Ua ia fai lona ola e sui ai ola e toatele. Aunoa ma lona ola ofo atu, tatou te le saoloto mai le pule a le agasala ma le alii o le lalolagi. A o le pule lea a le agasala ma le alii o le lalolagi i olaga o tagata, na tiga ai o ia, a o tiga o le ola paia o le Atalii o le tagata e togiola ai agasala a ona tagata ma le lalolagi uma. E le faigata ona maua lea saolotoga - na ona salamō lava i agasala ma faatuatua i le suafa o Iesu Keriso le Mesia na maliu mo le faamagaloina o agasala, ma toetu ina ia tatou ola i le ola fou ia Keriso i lenei olaga ma saofaga atu ai i le ola faavavau.

GALUEGA FAATINO: Fetufaaiga i Fesili

1. Aisea ua le tali atu ai Iesu i mau a ona tagata ia te ia?

Tali: Auā o molimau pepelo ma e le fesootai ma lona tulaga (role) faa-Mesia e tatau ai ona ia tiga ma puapuagatia

2. Aisea ua tali atu ai Iesu ia Pilato i lana fesili (f.61), “O a’u lava lea; tou te iloa foi le Atalii o le tagata... (f.62)?

Tali: Auā o le uiga tonu lea o lona tulaga (role) faa-Mesia e ofo atu ai lona ola paia ia tiga i agasala a ona tagata ma le lalolagi, e pei ona tali mai le fonu i le ositaulaga sili, “...E tatau ona oti o ia”.

PESE: Ua ou vivii ma faafaetai (71, Pese & Viiga EFKS).

AOAOGA

1. E tatau ona tiga le Mesia ina ia tatou ola
2. Ua fai e le Atalii o le tagata lona ola paia e sui ai o tatou ola ia saoloto mai le pule a le agasala ma le tiapolo
3. Ia tatou faafetai i le fai o le Mesia ma Atalii o le tagata
4. Na molia Iesu i lana amiotonu i lona tautino atu o ia o le Atalii o le tagata e nofo i le itu taumatau o lē ona le malosi uma lava, e afio mai foi i ao o le lagi, o lona uiga ua ia te ia le pule aoao ma

o ia foi o le faamasino o tagata ola uma i le faamasinoga mulimuli

ASO SA: 29 MATI, 2015

MATAUPU: UA MALIU IESU I LE SATAURO (Jesus died on the cross).

SINI: Ia aoao le vasega ina ia malamalama, o le maliu o Iesu i le satauro ua mafai ai ona faamagalō ā tatou agasala e ala i le salamō ma le faatuatua i lona suafa

TUSI FAITAU: Mataio 27:32-50

FESOASOANI MO FAIAOGA

I le Tusi Faitau, o lo o faamatala ai e Mataio mea na tutupu ia Iesu i lona latalata atu i le satauro seia oo i lona maliu. Sa faatauanau e Simona o le Kurene Iesu na te amo i lona satauro. Ua oo i Kolokota (o le mea o i ai le ulupoo), ona avane lea ia Iesu o le uaina ua fefiloi ma le laau oona, ae ua teena e Iesu. O le ituaiga uaina e faaitiitia ai tiga o sauaga ua faia i lona tino paia. Ua latou faasatauro ia te ia, ma fai le vili i ona ofu, ma ua latou leoleo ai ia Iesu a o tautau mai o ia i le satauro. Sa faasatauro faatasi ma Iesu tagata fao mea e toalua. A o tautau mai o ia i le satauro, sa faifai ia te ia ē na ui ane, ma lialiai o latou ulu, ma fai atu ia Iesu e uiga i ana upu ua ta’ua ai le malumalu, ma lona faasino o le Alo o le Atua ia te ia. Ua faapena foi ona tauemu taitai o le lotu Iutaia ma latou ta’ua ai o ia, o le Tupu o Isaraelu, o le Atalii o le Atua e tatau ai ona i ai lona malosi e alu ifo ai ma le satauro, ma ia faaola ia te ia lava ina ia latou faatuatua ai ia te ia. Ua faapena foi i pagota na faasatauro ma ia ua la faatauemu foi ia Iesu. Ua afua mai i le tutonu o le la pe tusa lea ma le itula e sefulu lua i le aoauli na pogisa uma ai le nuu seia oo i le ta o le tolu i le afiafi. Ae i le lata i le tolu i le afiafi na valaau ai Iesu i le Atua (f.46). I lea valaau o lo o fetalai ai Iesu i lona tulaga o

le Atalii o le tagata, i lona va nonofo ai ma le Atua. Peitai o le ta'ua e Iesu o le upu 'Eli' o lona uiga 'Lou Atua e', ua manatu ai nisi na faalogo i ai o lo o valaau o ia ia Elia. Ua momo'e le tasi ua fufui le omomi i le vineka, ia faainu ai ia te ia, 'a ua faapea ane i latou uma ia tuu ai pea ia, sei o latou iloa pe sau Elia e faaola ia te ia. Ua toe alaga Iesu ma le leo tele, ona tuuina atu ai lea e ia o lona agaga.

O le tala i le maliu o Iesu le Mesia i le satauro ua ta'ua ai e Mataio nisi nei o mea tāua. (i). Sa faasatauro o ia e fitafita Roma. (ii). Sa tauānau e Simona le Kurene Iesu na te amoina lona satauro. (iii). Sa teena e Iesu le uaina e fefiloi ma le laau oona e faafilemu ai ona tiga. (iv). Sa fai e fitafita le vili i ofu o Iesu a o tautau o ia i le satauro. (v). Sa faasatauro faatasi ma Iesu tagata faomea e toalua. (vi). O tagata na faifai ma tauemu ia Iesu, o tagata nuu na ui ane ma lialiai o latou ulu, o taitai o le lotu Iutaia, o pagota na faasatauro ma ia, ma i latou uma e aofia ai ma tagata ese e pei o fitafita Roma. (vii). Na maliu Iesu i le ta tonu o le itula e tolu i le afiafi.

O vaega ua ta'ua i luga ua faailoa mai ai le aafia o le lalolagi uma amata mai lava i taitai seia oo lava i le pologa ma le pagota ma le tagata 'ese i le maliu ai o Iesu i le satauro. O lona uiga o le agasala a lona nuu ma le lalolagi uma na fasiotia ai, ae na ia talia ma na tauave tiga uma, solitulafono, ma amioleaga ma agasala uma i lona tino paia ma maliu tiga ai, peitai a o lei maliu na ia iloa lelei lea taimi tāua e ala i lona tuuina atu o lona agaga i aao o le Atua lona Tama i le lagi. O le maliu la o Iesu i le satauro, na mafua mai le pule a le agasala i olaga o tagata uma, a o le maliu e tusa ma le finagalo paia o le Atua - o le taulaga ma le togiola ia faamagalalo ai agasala. O le alofa tunoa o le Atua na aumai fua ma maua fua foi e ala i le salamō ma le faatuatua i lona suafa.

GALUEGA FAATINO: Fetufaā'iga i fesili

1. Aisea ua faasatauro ai e Roma Iesu a o ona tagata Iutaia na mafua ai?

Tali: Auā na pulea e le malo o Roma Palesitina o lo o i ai Iutaia ma le lalolagi i ia ona po.

2. O ai Simona le Kurene?

Tali: O le tagata o lona nuu o Kurene ua alofa ia Iesu ma lona amoina o le satauro

3. O le ā sou manatu, aisea ua teena ai e Iesu le uaina ua fefiloi ma le laau oona?

Tali: E le o se vaega lea o lona ola ofo atoa atu ia fai ma taulaga ma togiola mo agasala a ona tagata ma le lalolagi uma

4. O ai tagata na faia mea tiga ma upu tauemu ia Iesu a o tautau mai i le satauro?

Tali: O ona tagata Iutaia e oo lava i le tagata ese e i ai fitafita Roma faapea foi ma le tagata faomea o le pagota

5. Aisea ua vave maliu ai Iesu?

Tali: Auā o lo o folafola mai i le Tusi Paia i le Feagaiga Tuai

PESE: Le Faaola e ua ou sau nei (137, Pese & Viiga EFKS).

AOAOGA

1. Na maliu Iesu ae leai sana agasala ina ia faamagalalo ā tatou agasala
2. O ō tatou uiga tauemu, le ola faifai, le lotu mataua, ma le fasioti tagata na faasatauroina ai Iesu
3. O le ola ia Keriso – o lo tatou tiga faatasi ma Keriso e ala i lo tatou tauave o ona maosiosia, o lona uiga, ia fa'aalia le amio faaKeriso i lou ola i so o se nofoaga, o lona agamalu, lotomaulalo, onosai, usitai, faamaoni, alofa ma agalelei a o fai oe ma ona soo.

.....

APERILA: MAMALU O LE MESIA (Glory of the Messiah)

Ua faatāua i lenei masina le mamalu o le Mesia. O le mamalu sa ia te ia, ae o lea foi peiseai ua ia toe galue ia maua lea mamalu i lona fai ai ma Atalii o le tagata e ala i lona faapei ai o tatou tagata. O puapuaga la o le Mesia o lo o taoto ai lea mamalu sa i ai talu le amataga e ala i lona lē manatu i lona tulaga tutusa ma le Atua lona Tamā, ae ua ia sasa'a atu lona ola paia i le faatusa o le pologa ua matuā anaana atoatoa i le finagalo faaola o le Atua lona Tamā i le lagi.

.....

ASO SA: (Aso Sa o le Eseta/Toetu) 5 APERILA, 2015

MATAUPU: UA TOETU IESU NAI LE OTI (Jesus rises from the dead).

SINI: Ia aoao le vasega ina ia malamalama, o le toetu o Iesu na te'a ai le pogisa ma le le mautonu o soo o Iesu, 'a ua tupu ma fua mai ai lo latou faatuatua.

TUSI FAITAU: Mareko 16:1-8

FESOASOANI MO FAIAOGA

O le toetu o Iesu e le o le toe ola o le tino oti e i ai o tatou tino aano ma ivi (resuscitation) e pei ona faia e Iesu ia Lasalo, a o le toetu (resurrection) i le tino fou faalelagi e faia e le Atua. Aisea ua faapea ai? Auā foi e ui o ia o le Atalii o le tagata o le auauna puapuagatia, a o ia foi o le Alo Pele e toatasi o le Atua e leai sana agasala. O lona ola paia i lona faapei ai oi tatou tagata, o le taulaga (sacrifice) ma le togiola (redemption) mo ā tatou agasala. O le toetu la o Iesu nai le oti i le aso tolu, o lona uiga e le i oo se leaga po o se pala i lona tino paia.

O le Tusi Faitau o lo o molimau ai Mareko i le toetu o Iesu nai le oti. O tina e toatolu na o atu i le vaveao o le Aso Sa ma ā latou mea manogi e faauu ai le tino o Iesu. O le faia e nei tina o lea tu ma aga o le faailoga latou te le o iloa upu a Iesu sa fetalai ai i ona soo a o le i maliu. Ia pe le o iloa foi fuafuaga faaola a le Atua o lo o i Tusi e ala i

Perofeta ma le Tulafono. Ae le itiiti foi le tāua o moomooga alofa o nai tina mo Iesu, ae ua le tusa ma fuafuaga paia a le Atua. Ua toetu o ia i lona mamalu sa i ai talu le vavau. Ua le o se tuugamau o lo o tapuni le maa tele sa manatu nai tina po o ai na te fulieseina, a o le tuugamau ua avanoa ma o lo o i ai i totonu i lona itu taumatau le agelu a le Atua, auā le feau o le talalelei mo nei fafine ma nai ona soo o lo o nonofo ma le le mautonu. Ua latou faalogo i upu a le Agelu, ona latou vave o lea i fafo, ma sosola ese ma le tuugamau, ua maua foi i latou i le gatete ma le ofo tele, ua latou le fai atu foi se upu i se tasi auā ua matatau. E ui i le aafiaga o fa'aaliga o le toetu o Iesu i nei fafine, a o le talalelei lea o le toetu mo nei fafine ma ona soo o lo o nonofo ma le le mautonu. O le ā le talalelei o le toetu? Ioe, e malamalama ai lo latou le malamalama ma le le faatuatua i le Alii ua toetu sa maliu i le satauro mo ā tatou agasala. O le mana o le Alii toetu na maliu i le satauro, na te faaosofia le loto talitonu ma tupu ai lo tatou faatuatua i lo tatou Alii Faaola. O lona uiga, ia fa'avanoa o tatou loto mo le Alii toetu ma lona mana na te faamalamalama lo tatou pogisa faaleagaga, ma tatou iloa ai le alofa fua o le Atua. Tatou te le toe o ai i nofoaga ua fai ma tuugamau ua noanoatia ai o tatou olaga e le pule a le agasala ma le alii o lenei lalolagi, tainane foi o tatou talitonuga ma tu ma aganuu masani ua punitia ai lo tatou iloa o le Alii toetu ma lona alofa fua ma faavavau mo i tatou.

GALUEGA FAATINO: Fetufaā'iga

1. Ia fetufaa'i ma le vasega i le tāua o le toetu o Iesu

PESE: E! le alofa o Iesu (73, Pese & Viiga EFKS).

AOAOGA

1. 'Ana le toetu Iesu e leai se uiga o lo tatou faatuatua.
2. O le mana o le Alii toetu na malamalama ai le au soo ma tupu ai lo latou faatuatua i le Atua ma lona alofa tunoa.
3. Ia faautauta i mea ua fai ma tuugamau ua tautevateva ai le faatuatua o tagata.

4. E le o le faatuatua ia Iesu toetu le taele ma le inu ava oona i le Aso Sa.

.....

ASO SA: 12 APERILA, 2015

MATAUPU: PE ANA LEAI LE TOETU! (Without the resurrection!).

SINI: Ia aoao le vasega ina ia malamalama, pe ‘ana leai le toetu o Iesu ua sili lo tatou malaia i tagata uma lava.

TUSI FAITAU: IKorinito 15:12-19.

FESOASOANI MO FAIAOGA:

O le toetu o le atoaga o le alofa tunoa o le Atua e pei ona amata mai i galuega o le alofa lavea’i a Iesu ma lona maliu tiga i le satauro. O le toetu, o le talitonuga o lo o fa’aata i le Feagaiga Tuai, ae na matuā manino ina ua saunoa ai lava Iesu i ona soo. O le talitonuga e fesootai ma le mataupu i le ola e faavavau. O le mataupu foi e talitonu ai le au Faresaio ae teena e le ‘au Satukaio. Atonu o le faigofie lea ia Paulo ona faamatala le uiga loloto o le toetu o Iesu auā o ia o le faresaio.

O le Tusi Faitau, o lo o ta’ua ai le tasi o faafitauli ua ala ai ona tusi Paulo i le ekalesia i Korinito. O le mataupu lea i le toetu, auā ua talaiina e nisi i Korinito e leai se toetu. Atonu o ni tagata Iutaia o lo o nonofo ai i Korinito o le ituaiga o Satukaio. Ia po o le talitonuga faa-Toseti (docetic heresy) e le mafai ona fesootai mea fai tino ma le Atua, ma o lona uiga e leai se toetu ma e gata lava la le tagata i le oti ma le tuugamau e leai se faamoemoe (hope) i tala atu o le oti. Ae ua faamanino atu e Paulo ia Korinito, o le toetu o Iesu, o le faamaoniga e i ai le toetu. Auā ana fai e le i toetu Keriso, e leai se talaiga e leai foi se uiga o le faatuatua. Ma o ia foi ma lana ‘au tala’i ua fai ma molimau pepelo. Ua molimau foi Paulo o le Atua na ia faatuina Keriso, ma o le tasi lea mea tāua ua tau atu e Paulo ia Korinito. E le gata i lea ua

faamanino foi e Paulo ia Korinito, afai ana le faatuina Keriso, ua faaleaoga lo latou faatuatua, ma ua nofo sala pea i latou; ua faapena foi ona fano o ē ua momoe ia Keriso. Ma i le f19, ua faamanatu ai e Paulo ia Korinito lo latou faatuatua e le faaletino i se tulaga e gata i lenei olaga mea tatou te faamoemoe ai ia Keriso. Ua tautino mai e Paulo pe afai e faapea, o lona uiga ua sili lo tatou malaia i tagata uma lava. E fesootai upu ia a Paulo ma talitonuga ia faa-toseti ma faa-Satukaio o ē latou te teena le toetu, ma faamamafa ai manuia faaletino e gata i lenei olaga. O le toetu la o Keriso o le laasaga sili lea e maua uma e i latou ua faatuatua ia Keriso ma faatalitali ai mo lea faamoemoe i tala atu o mea ua vaaia ma lenei olaga.

GALUEGA FAATINO: Fetufaaiga & Fesili ma Tali

- Ia fetufaa’i ma le vasega i le mataupu i le toetu
- **Fesili & Tali**

1. O ā aafiaga o le tala sese e leai se toetu i le manatu o Paulo?

Tali: (a). po ua le faatuina mai Keriso

(e). ua faaleaoga le talaiga a Paulo

(i). ua faaleaoga foi le faatuatua o Korinito

(o). ua avea Paulo ma le au Aposetolo ma molimau pepelo

(u). ua nofo sala pea i tatou

(f). ua fano ē ua momoe ia Keriso

(g). ua sili lo tatou malaia i tagata uma lava

2. O le ā le uiga o upu ia, ‘ua sili lo tatou malaia i tagata uma lava’?

Tali: Pe a fai e leai se toetu, o lona uiga ua leai foi se alofa tunoa e faaolaina ai i tatou, ma ua tatou nonofo pea i lalo o le pule a le agasala, le tiapolo, le oti ma le tuugamau.

PESE: Le malo e lelei (79, Pese & Viiga EFKS).

AOAOGA

1. Ana leai se toetu po ua faaumatia le olaga e le pule a le agasala ma le alii o lenei lalolagi
2. ‘Aua nei gata i lenei olaga mea tatou te fiafia ai ia Keriso
3. E le faaletino le faamoemoe sili o le tagata faatuatua
4. E leai ni ala faapiopio, ma faiga amioletonu i le Ekalesia a le Alii toetu

.....

ASO SA: 19 APERILA, 2015

MATAUPU: O LE TINO TOETU (The resurrected body).

SINI: Ia aoao le vasega ina ia malamalama i le toetu ma ma lona taunuuga i le taimi e ilia ai le pu faauma ina ia manino ai ma fai ma faamanatu o le faatāua o le ola ia Keriso i taimi uma.

TUSI FAITAU: IKorinito 15:35-50

FESOASOANI MO FAIAOGA

O le mataupu o le tali fa’auau a Paulo i le faafitauli i le talitonuga i le toetu. Ua faamautu atu e Paulo e i ai le toetu pei ona faia e le Atua ia Keriso. Lea la i le Tusi Faitau ua faamanino ai e Paulo le natura ma foliga o le tino toetu ina ia matuā manino ma talitonu moni ai Korinito i le mataupu i le toetu.

I le Tusi Faitau o lo o faamanino ai e Paulo le mataupu i le toetu i lona tulaga atoatoa. Ua le gata i le moni atoatoa o le toetu, a o lona natura moni ina ia manino atoatoa ai Korinito. I le f.51, ua ta’ua ai e Paulo lona ta’u atu ia Korinito o le mea lilo. O lona uiga sa ta’ua i Tusi le toetu, sa fetalai ai foi le Alii o Iesu i ona soo, a o lea ua faamatala atili e Paulo le moni o le toetu ma lona natura atoatoa e foliga mai ai. Fai mai Paulo e le momoe i tatou uma, ae liua i tatou uma. O lona uiga pe faatuatua pe le faatuatua e toetutu tagata uma ua momoe po o ua oti. E

pei o le emo o le mata ma faafuase’i le toetu, ma e tino mai lea faamoemoe o le Atua i le tagata na ia faia pe a ilia le pu faauma. O le pu faauma o le mea mautinoa, ma o le faailoga lea o le taimi o le toetu. E le gata i ē o momoe po o ua oti ae faapena foi ma ē o ola pea. O lona uiga e leai se tagata o ola pea i le tino i lea taimi e toetu i le tino faaletino. Auā i le f.53, fai mai Paulo e tataua ona ofu o lenei tino iu vale i le tino ola pea, ia ofu foi lenei tino oti i le tino le oti lava. Ma pe a tupu lea faamoemoe o le Alii i ona tagata faatuatua, fai mai Paulo o le mea na tusia i Tusi anamua (ff.54-55).Ma o le faafetai lea a Paulo (f.57) i le Atua auā ua ia foaiina mai le manumalo ia i tatou e ala mai i lo tatou Alii o Iesu Keriso. Aisea ua faafetai ai Paulo i le Atua? Auā i le f.56, o lo o ta’u atu ai e Paulo ia Korinito, o le tui o le oti o le agasala lea, o le malosi foi o le agasala o le tulafono lea. O le uiga o le f.56, e oti tagata uma auā e agasala tagata uma, ma o le malosi o le pule a le agasala i le tagata ua faailoa lelei mai e le tulafono. Ma na o le alofa tunoa o le Atua e ala ia Keriso, ma le faatuatua i le suafa o Keriso tatou te sao ai mai lea faafanoga e ala i le toetu ma le tino toetu faaleagaga pe a ilia le pu faauma.

GALUEGA FAATINO: Fesili & Tali

1. O le ā le mea lilo na ta’u atu e Paulo ia Korinito?

Tali: E le momoe i tatou uma ae liua i le tino faaleagaga e faia e le Atua

2. O le ā le taimi e tupu ai le toetu?

Tali: Pe a ilia le pu faauma

3. O ai e toetu ma liua i le taimi o le toetu?

Tali: O tagata ua oti (momoe) ma tagata o lo o ola pea

4. Aisea ua liua ai ma tagata o lo o ola pea i le taimi o le toetu?

Tali: Auā e le toetu se tagata i lona tino faaletino, a o le tino fou faalelagi e faia e le Atua

PESE: O outou e fia sao (122, Pese & Viiga EFKS).

AOAOGA

1. Ola faatoetu e ala i le faatuatua ina ia fai mo i tatou le toetu i le ola e faavavau
2. Tuu le agasala ma le ola i upu tuu anamua auā e le fai ai mo i tatou le toetu i le ola e faavavau
3. O le ola faatuatua i le tino nei e fai ai mo i tatou le manumalo toetu o Keriso nai le oti ma le tuugamau
4. Ola i le tulafono a Keriso tatou te manumalo ai i le malosi o le agasala ma le pule a le oti i le olaga

.....

ASO SA: 26 APERILA, 2015

MATAUPU: O LE TOETU I LE FAASALA (Ressurrection to everlasting punishment).

SINI: Ia aoao le vasega ina ia malamalama i le mataupu ma lona faamanatu iō latou olaga ina ia tumau i le ola ia Keriso, e le fai ai mo i latou le toetu i le faasala po o le afi e faavavau faatasi ma le tiapolo ma ana ‘au

TUSI FAITAU: Mataio 25:31-46

FESOASOANI MO FAIAOGA

O le Tusi Faitau o lo o fetalai ma aoao ai Iesu i le faamasinoga mulimuli (final judgement). Ma o lenei faamasinoga e fesootai ma le tatou mataupu, ‘O le toetu i le faasala’. O lona uiga, o le toetu ‘e mo tagata uma o ē ua oti ma ē o lo o ola pea. Peitai o le ā le uiga o le toetu i le faasala? Aisea ua faasala ai i le toetu i le pologa ma le faafanoga po o le faasala? O le tali o fesili ua ta’ua i luga, e maua i le aoaoga a Iesu i le Tusi Faitau.

O le Tusi Faitau o lo o faamatala ai e Iesu le faamasinoga mulimuli, ma le mafuaaga e faasala ai i tatou i lea faamasinoga. I le f.31, o lo o ta’u mai ai, o le faamasino o lea faamasinoga – o le Atalii o le tagata. O ai le

Atalii o le tagata? O le Atalii o le tagata o le tasi lea suafa o Iesu. O le suafa o lo o faailoa mai ai lona fai ma Auauna e ofo atu lona ola o le taulaga ma le togiola mo agasala a le lalolagi ma tagata o le Alii. Ma na taunuu, e ui ina puapuagatia ma sauaina ai i lona ofo atu o lona ola paia ae tausalaina e ona tagata, ma latou pulunaunau ai ia faasatauro ma fasiotia o ia e ui ina leai sana agasala. Ioe, o le pule a le agasala i olaga o tagata ua aveesea ai lona ola paia, a o lona ola paia lava lea ia faamagaloina ai agasala a ona tagata ma le lalolagi.

O Iesu la o le Atalii o le tagata o le faamasino foi o le faamasinoga mulimuli, ma e aofia ai tagata uma ma nuu uma. Ua faatusa o ia i lea faamasinoga mulimuli o le leoleo mamoe ua ia tuueseeseina mamoe ma oti oi lana lafu. Ua ia tuu mamoe i lona itu taumatau, a o oti i lona itu tauagavale. I le f.34, ua suia ai le tulaga (role) o le faamasino, mai le Atalii o le tagata, ma le faatusa o le leoleo mamoe, i le fai ma Tupu. O ē sa i lona itu taumatau, ua ta’ua e le tupu o tagata ua faamanuiaina e lona Tamā, ma ia fai mo latou tofi le malo ua saunia talu le amataga. O ia tagata na latou fafaga ma faainu ia Iesu; sa fai ma tagata ese, ae sa latou talia o ia; sa le lavalava ae na latou avane ofu ia te ia; sa ma’i foi o ia ae na latou asiasia o ia; sa i le falepuipui foi ae na latou o atu ia te ia. I ff.37-39, o lo o fesili ai i le Tupu ē amiotonu po o ana fea na latou faia ai ia mea ia te ia. Ua tali le tupu i le f.40, o ē ua ta’ua o ē aupito itiiti sa latou faia ai mea ua ta’ua i luga o ia lava lea. I le f.41, ua ta’ua ai e le Tupu tagata i lona itu agavale o ē faafanoina, auā na latou le faia mea sa faia e tagata amiotonu i tagata ua ta’ua o ē aupito itiiti. Ma o lo latou le faia o mea ia i ē aupito itiiti, o ia lava lea ua latou le faia i ai, ma o lo latou tau i le o atu i le sala e faavavau, a o ē amiotonu e o atu i latou i le ola faavavau.

I le satauro o Keriso o ia o le Atalii o le tagata, o le Tupu, o le Faamasino, ma le Leoleo Mamoe ua ta’ua i le Tusi Faitau, ua aveesea ai le sala e faavavau po o le toetu i le faasala, ae fai mo tagata uma le ola e faavavau e ala i le salamō ma le faatuatua i lona suafa.

GALUEGA FAATINO: Fesili & Tali

1. O ai le Atalii o le tagata o le ‘a sau faatasi ma le au agelu paia ma tietie i lona nofoalii mamalu?

Tali: O Iesu Keriso le Alii ma le Faaola

2. I le f.32, o le ā le uiga o le faapotopotoina ma le tuueseeseina o nuu uma i luma o Iesu?

Tali: O le tulaga o Iesu o ia o le Faamasino ua tuuina atu i ai e le Atua le pule uma lava e faamasino ai tagata uma i le faamasinoga mulimuli

3. O ā faatusa ua faatusa i ai tagata i le taimi o le faamasinoga mulimuli?

Tali: O ē i le itu taumatau o le faatusa o le mamoe, a o ē i le itu agavale o le faatusa o le manu o le ‘oti

4. O le ā le isi tulaga (role) o Iesu i le tala e ‘ese mai le leoleo mamoe ma le Atalii o le tagata?

Tali: O le Tupu

5. Aisea ua ta’ua ai tagata i le itu taumatau o ē ua faamanuiaina?

Tali: Auā na latou faia galuega alofa i tagata ua ta’ua i le f.40

6. O le ā le i’uga o tagata ua faatusa i le ‘oti po o ē sa i le itu agavale o le leoleo mamoe po o le tupu?

Tali: E ō atu i le afi faavavau ua saunia mo le tiapolo ma ana agelu, auā na le fa’aalia Keriso ma lona alofa laveai ma faamafanafana iō latou olaga

PESE: Tulei ‘ese x2

AOAOGA

1. E toetu i le faasala ma le afi faavavau tagata e agaleaga ma manatu faapito
2. ‘Alo ese ma faiga atamai a le tiapolo ma ana agelu e oti ai le agaga
3. Ia vave ona salamō ma foi ia Iesu manu e le i tuai
4. ‘Aua le amio faa – oti e alovao ma fai togafiti ma ola fia tutoatasi, auā o amio na a tagata ua faafanoina

.....

ME: O LE POTO TAMAITAI (Lady Wisdom).

O lenei masina ua faatāua ai lo tatou malamalama i le faatusa sa galue ai le Atua i le Feagaiga Tuai i ona tagata. Ua faamatala ai e ona tagata paia i Tusitusiga a le Poto o ia – o le Poto Tamaitai sa a’oa’o ma a’oa’i i ona tagata ina ia faalogo ia te ia e manuia ai ma maua ai le ola ae le o le malaia.

.....

ASO SA: 3 ME, 2015

MATAUPU: ALAGA LE POTO I MAGAALA (Wisdom prophesies at crossroads).

SINI: Ia aoao le vasega ina ia malamalama, o le Poto o lo o alaga i magaala o Iesu le Faaola, sa mau faatasi ma le Alii le Atua talu le amataga, ma o ia e toatasi ma lana upu e maua ai le ola, le olioli, ma le fiafia moni o le tagata.

TUSI FAITAU: Faataoto 8:22-36

FESOASOANI MO FAIAOGA

O le mataupu o lo o avea ai le Poto ma failauga i magaala. O le fesili, o ai le Poto o lo o tautala, ma aisea foi ua ta’ua ai magaala? O le Poto o lo o tautala e kenera fafine, auā o le tulaga lea o le upu ‘poto’ (wisdom) i le gagana Eleni. O le natura o le Poto o lo o alaga e tāua i le tulaga ua faapei ai o ia o le pae ma le auli i faafitauli o le olaga o aso uma. I le tulaga o magaala - o lo o faailoa mai ai le aofa’i o faafitauli uma o lo o aafia ai le olaga o aso uma i upu a le Poto o lo o alaga. O lona uiga, o le Poto o lo o alaga i magaala, o le Atua lea ma lona siufofoga fetalai, ia aumai le tali i faafitauli uma o lo o aafia ai le tagata i le olaga o aso uma. A o le fesili, aisea ua fetalai ai le Atua o lo o faatusa i le Poto i le Tusi o Faataoto i magaala, po o le olaga o aso uma? Auā foi o le pitolaaui lea a le Atua i ona tagata filifilia. Na te le tuua ona tagata ia matuā pa’u atu i le leaga ma pule ai le agasala ma le alii o le lalolagi iō

latou olaga. O le faailoga foi o lona alofa i ona tagata ina ia maua se tali ma se laveaiina mai faafitauli o le olaga o aso uma. O ā ia faafitauli? O le faafitauli iloga o le lē iloa o le Atua i le olaga o aso uma. Ua pei le olaga e leai se Atua i mea uma ua fai e le tagata. Ua na o le faatau atu ma le faatau mai le olaga, ma pei ai le oa o le Atua sili lea i loto o tagata. Ua fai ai le oa ma Atua e sui ai le Atua Moni. Ma ua tula'i mai ai faafitauli nei i le olaga o aso uma. O le va o le mauoa ma le mativa ua tupu tele. Ua pulea e le manao tele loto o tagata. Ua ō faatasi le oa ma le amioleaga, le faitaaga ma le ola mulilua. Ma o le Poto o lo o alaga i magaala, o le tali lea e auli ma pae ma mautali i ai le olaga o aso uma o lo o aafia i nei faafitauli uma. Le siufofoga alofa ia faalogo i ai ma talia, auā o le tali lea e maua ai le filemu moni, o ia lava o le pae ma auli na te aumai le fiafia moni i le lalolagi o faafitauli.

I le Tusi Faitau i ff.22-26, o lo o alaga ai le Poto i magaala e uiga i lona tupuga (origin). (i). O le Alii e ona lava o ia. (ii). O ia o le amataga o le ala o le Alii, e muamua i ana galuega anamua. (iii). Sa faauuina o ia mai le vavau ma le amataga a o le i faia le lalolagi. (iv). Sa fanaua o ia a o leai ni mea loloto, ma ni mea na puna mai ai le vai, ni mauga ma ni mauga iti; a o le i faia e le Alii le laueleele ma ni vao, ma le tumutumu o le efu o le lalolagi. I ff.27-29, o lo o tautala ai le Poto i lona vaavaalua ma le Alii i ana galuega mamana. A o ff.30-31 ua ia tautino ai lona i ai ma le Alii le Atua a o ia o le tufuga; ma sa fai foi o ia mona fiafia i aso uma; sa ia olioli i luma o le Alii i aso uma lava. Sa ia olioli foi i mea e mau ai tagata i le lalolagi; o lona fiafia foi sa i le fanau o tagata lea. `

I ff.32-36, o lo o tautala ai le Poto i lona tulaga faa-matua pe faa-tina foi i lona va ma le fanau. Ua tautino e le Poto le manuia o le fanau e faalogo ia te ia, ma tausi i ona ala. Ia ua'i lo latou faalogo i mea na te aoao atu ia i latou ina ia latou popoto ai, ma ia 'aua lava ne'i ō latou teena. I le f.34, o lo o toe ave ai le fa'aamuia a le Poto – i le fanau e tumau i le naunautai e faalogologo ia te ia; o lo o mataala i ona puipui i aso uma; o lo o leoleo i pou o ona faitotoa. I le f.35, ua faamautinoa ai e le Poto – o le fanau ua maua o ia, ua maua e ia le ola, ma le alofa mai le Alii. A o le f.36, ua faamanino ai le Poto i le fanau - o lē agasala ia te ia, ua faasaunua e ia lona lava ola. E le gata i le fanau, a o ē uma e inoino i le Poto ua latou mananao i le oti.

Na matuā iloatino mea na alaga ai le Poto i le Feagaiga Tuai i ona tagata ua ia ta'ua o le 'fanau' e ala i le tagata o Iesu i le fa'aatoaga o tausaga i le amataga o le Feagaiga Fou. Sa ia alaga i magaala o le olaga o aso uma ina ia maua e ona tagata le poto moni e auli ma pae io latou faafitauli o lo o saisaitia ai ma mamao ese ai ma le Atua. E le gata i lona tupuaga faatasi ma le Atua Moni, a o ia le Poto o le Mataisau ma le Tufuga o le foafoaga aoao. Sa fai o ia ma fiafia o le Alii; sa ia olioli foi i luma o le Alii le Atua i aso uma. Sa ia le nofo ai pea i lea mamalu faavavau, ae ua ia olioli foi i mea e mau ai tagata i le lalolagi. O lea olioli ma le fiafia i le mea o mau ai tagata na ia afio mai ai e faamanino atu le ala moni i le ola ae le o le oti – o ia lava lea le Poto. O lē faalogo i ana upu o ia lava lea ua latou talia e pae ma auli ma maua i ai le tali i ō latou faafitauli uma. Ua oo lava iā latou agasala ma solitulafono ua faamagaloina e ala i lona ola paia ua fai ma taulaga ma togiola i lona maliu tiga i le satauro. Ma ua tatou maua ai le ola ae le o le oti e ala i le talia o ia i le loto salamō ma le faatuatua i lona suafa. Ma e pei ona fai o ia ma fiafiaga o le Alii ma ia olioli i luma o le Alii i aso uma, ua faapea foi i tatou le fanau ua ola i le ola fou ia Keriso le Poto na alaga i le Feagaiga Tuai.

GALUEGA FAATINO: Fetufaaiga

*** Ia fetufaa'i ma le vasega i le amataga o le 'Poto' ma lona faamoemoe mo ona tagata. Ia faafesoota'i foi ia Iesu Keriso o le 'Poto Liutino Tagata' o le Atua

PESE: Ieova e, silasila (237, Pese & Viiga EFKS).

AOAOGA

1. Amuia se tagata ua faalogo ma ola i upu a Iesu le Poto Liutino o le Atua
2. O le ola ia Keriso o le maua lava lea o le ola ae le o le oti.
3. O Iesu o le Tufuga o mea uma, o le auli ma pae iō tatou faafitauli uma

4. E fiafia le Alii ia i tatou faapei o Iesu pe ‘a tatou faalogo ma talia Iesu e ola i totonu ia i tatou e ala i lana upu
5. Ia tatou iloa faafitauli o nisi tagata ma fai i tatou ma pae ma auli iō latou faafitauli, ae le o le avea o tatou e tupu tele ai faigata ma faanoanoaga o nisi.
6. O lē faalogo ia Iesu le Poto Moni e alofa faapei o Iesu

ASO SA: **(Aso Sa Tina) 10 ME, 2015**

MATAUPU: ALOFA FAATINA O LE ATUA (God’s motherly love).

SINI: Ia a’oa’o le vasega ina ia malamalama i le alofa faatinā o le Atua, ma ia naunau i ai auā so latou lumana’i manuia

TUSI FAITAU: Mareko 7:24-30

FESOASOANI MO FAIAOGA

O le mataupu, ‘O le alofa faatina o le Atua’. O lona uiga, o le alofa o le Atua ua faatusa i le tina ma lona alofa i lana fanau. Tusa pe leaga amio a le fanau, ma faatiga i le tina, e le uma le alofa faatina ia i latou i le tulaga e faia lava e le tina se ala e foia ai le leaga, ma lavea’iina ai le fanau. I le Tusi Faitau, o lo o faamatala ai e Mareko le tala i le oo atu o Iesu i aai o nuu ese. O le aai lea o Turo ma Saitonu. E le o ta’ua po o ai e ona le fale ua ulu atu i ai o ia e malōlō ai. Ua alu ‘ese Iesu mai ona tagata se i mapu ane teisi, ae ua le mafai auā ua iloa o ia e tagata o lea nuu ese. O le fafine ua ma’i lana tama i le agaga leaga ua sau ia Iesu, ma faapa’ū fao i ona vae. Sa ia faalogo i tala ia Iesu ma ua ia sau ai ia te ia. Ua le gata i ona tagata le talalelei o le alofa lavea’i o le Alii, ‘a ua pa’i atu i nuu ese. E mafai foi ona faapea – o le alofa le faatuaioia o le Atua. O le nei fafine o le Eleni na fanau i Suria Foinie.

Ua ia augani ia Iesu ina ia ia tulia i fafo le temoni i lana tama. Ua tali

atu Iesu i lenei fafine, “Seia lua’i maoona le fanau; auā e le tatau ina ave mea e ‘ai a le fanau ma lafo i uli”. O le alofa faatina o le Atua ua mua’i tapena ai ona tagata luitaia ua ia ta’ua o le ‘fanau’, ona faato’ā tatala atu lea o lea alofa i nuu ese. Peitai i le f.28, ua tali mai ai le fafine e moni lava le Alii, a o se mea itiiti e totoe mai i le laoi a tama ua lava lea mo ia. E ui i le faamamafa a Iesu, ae ua tusa le naunau mai o le nei fafine ese, ma le lautele o le alofa o le Atua e aofia ai foi ma le tagata ese. Po o le ā le faatusa o le uli o lo o faatatau i tagata o nuu ese, ae e le avea lea leaga ona o le pule a le agasala ma le tiapolo iō latou olaga e faatuaioia ai le alofa o le Atua.

O i latou foi e mafai ona fai ma fanau a le Atua, pe a salamō i agasala ma faatuatua i le Atua e ala ia Iesu. Ua le gata la ia Israelu ua ta’ua o le ‘fanau’, a o le tagata ese e fai foi ma tamafai ma fanau a le Atua, pe a talia Iesu i le salamō ma le faatuatua. Na fa’aalia le lautele o lea alofa faatina o le Atua i ona tagata ma le lalolagi e ui iā latou agasala, i le maliu o Iesu i le satauro. Ua to lana manava, ona saeluaia lea o le ie pupuni o le mea sili ona paia o le malumalu mai i luga seia oo i lalo – o le faailoga o le alofa faatina o le Atua e lautele, e le faatuaioia, e le faailoga tagata, e naunau e faalelei ona tagata ma soo se tagata o le lalolagi e manaomia moni lona alofa faaola ma tunoa.

GALUEGA FAATINO: Molimau a le vasega i le alofa faatina o le Atua io latou olaga.

PESE: Ia matuā faamalosi (175, Pese & Viiga EFKS).

AOAOGA

1. E lautele, le faatuaioia, ma avanoa mo se tasi le alofa faatina o le Atua
2. E le fuaina i so tatou leaga le alofa o le Atua, e tumau lona alofa e faavavau
3. Ua fai i tatou ma fanau a le Atua e ala i le loto salamō ma le faatuatua ia Iesu
4. Ia fai lou ola ia Keriso ma meaalofa iō tatou tina

.....

ASO SA: (Aso Sa Penetekoso) 24 ME, 2015

MATAUPU: UA AFIO IFO LE AGAGA PAIA (The Holy Spirit descends).

SINI: Ia aoao le vasega ina ia malamalama, o le afio ifo o le Agaga Paia na suia atoa ai le tagata tuai ma talitonuga tuai o tagata Iutaia i le ofo atu o le ola e fai ma soo faamaoni o Keriso.

TUSI FAITAU: Galuega 2:1-4

FESOASOANI MO FAIAOGA

O le mataupu, 'Ua afio ifo le Agaga Paia'. Ua tatou iloa o le Agaga Paia, (i). O le mana silisili 'ese o le Atua. (ii). O le peresona lona tolu o le Alii le Atua. (iii). Sa foafoaina le Fofoaga Aoa. (iv). O le fesoasoani sili o ē ua fai ma soo o Iesu, ma ona tagata paia sa faatuatua i le Alii anamua. (v). O le siufofoga o le Atua ua lagona iō tatou loto. Ua tā'ua foi e Paulo faavae o le malo o Keriso o le tulafono a le Agaga; e ta'ua foi o le tulafono a Keriso, po o le tulafono i le faatuatua.

O le afio ifo o le Agaga Paia o le Fesoasoani Sili lea na folafola e Iesu i ona soo e pei ona ta'ua e Ioane ma Luka le fai-Evagelia. O Luka foi ua molimau i le fetalai o Iesu i ona soo ina ia nonofo pea i Ierusalem se ia afio ifo le Agaga e faapaiaina i latou. O Luka foi o le Tusitala o le Tusi o Galuega a le 'au Aposetolo – ua ia molimau ma tusia le afio ifo o le Agaga Paia i le aso penetekoso. O le aso penetekoso e ta'ua foi o le aso o le seleselega. O le aso ua atoa i ai le lima sefulu (50) aso talu ina mae'a vaiaso sapatu e fitu po o le fa sefulu iva aso talu ina mae'a le vaitau o le seleselega saito. E le o se aso na faia e Isaraelu a o le aso na poloaiina e le Alii i ona tagata anamua. O lea la ua oo mai i le Feagaiga Fou, ua o mai ai Iutaia mai totonu ma fafo i nuu ese o lo o pulea e Roma, e faamanatu lea aso tāua.

O le mea ia manatua, o le lima sefulu foi lea o aso talu ina toetu Iesu mai le oti ma le tuugamau ma afio i le lagi, lea ua afio ifo ai le Agaga Paia. O le fesili, o le ā le fesoataiga o le penetekoso ma Iesu na maliu

ma toetu, faapea le afio ifo o le Agaga Paia? O le aso penetekoso o le aso lea e fai ai e Isaraelu le taulaga i mea e 'ai fou na poloaiina e le Alii le Atua e faamanatu ai le mae'a o le vaitau o le seleselegasaito (Levitiko 23:15-21). (i). E aumai e aiga taitasi le areto lulu e lua fua, o omera e lua e fai i le falaoa lelei ma ia tao ma le mea e faafefete ai, ma o mea faapolopolo ia i le Alii. (ii). Ia avatua faatasi ma areto ua ta'ua i luga, o tamai mamoe e fitu e tasi le tausaga e sao ona lelei, atoa ma le tamai povi po'a e tasi, ma mamoe po'a e lua e fai ia ma taulaga mu i le Alii. (iii). Ia faaopopo i le taulaga mu ua ta'ua i luga taulaga i mea e 'ai e tatau i ai, ma taulaga i mea e inu e tatau i ai, o le taulaga lava e fai i le afi, o le mea manogi lelei i le Alii. (iv). A mae'a le taulaga mu po o le taulaga e fai i le afi ua ta'ua i luga, ona fai taulaga ai lea o le nuu i le 'oti po'a e tasi o le taulaga mo le agasala a le nuu, atoa ma tamai mamoe e lua e tasi lo la tausaga e fai ma taulaga faafetai. (v). Ona luluina ai lea e le faitaulaga o taulaga ua ta'ua i luga, faatasi ma le areto o mea faapolopolo, e fai ma taulaga lulu i luma o le Alii, atoa ma tamai mamoe e lua e paia ia mea i le Alii atoa ma le faitaulaga. (vi). Ua poloaiina foi Isaraelu ia fai se faapotopotoga paia i lea aso, e le fai ai se galuega mamafa e tasi; o le tulafono lea e faavavau i mea uma latou te nonofo ai. Ma o le aso penetekoso na afio ifo ai le Agaga Paia, o le uluai aso o le vaisapati po o le aso valu – o le aso foi lea ua ta'ua iō tatou taimi o le Aso Sa, po o le aso na toetu ai Iesu nai le oti ma le tuugamau. Ma o le afio ifo o le Agaga Paia i le aso penetekoso, ma faatutumuina ai Iutaia uma sa potopoto i le faamanatuina o lea aso tāua, ua mafua ai ona latou tautala i gagana eseese a nuu ese o lo o latou aumau ai i vavega o le alofa tunoa o le Atua. Ua liua lo latou talitonuga tuai ina ua faatutumuina i latou i le Agaga Paia, lea ua fausia mai le tuufaatasia o taulaga uma o le aso penetekoso i le taulaga togiola e ala i le soifua o Iesu – o ia o le faapolopolo o le ulua'i fua lelei; o lona ola lē ila ma lē pona o le taulaga mo agasala, o ia o le mea manogi lelei i le Alii; tatou te fai taulaga faafetai ia te ia. 'A tatou talia Iesu, ua tatou talia le Agaga Paia na te foafoaina lo tatou tagata tuai i le tagata fou ia Keriso, ma ofo atu ai lo tatou ola e fai ma mea manogi lelei, ma faapolopolo, ma taulaga ola i le taitaiga a le Agaga Paia, o le Agaga lava lea o Keriso na maliu ma toetu mo i tatou.

GALUEGA FAATINO: Faatalatalanoaga

** Ia fetufaa’i ma le vasega i le Agaga Paia ma lona tulaga (role), faapea lona fesootaiga ma le Atua le Tama, ma Iesu Keriso le Alo.

PESE: Agaga Sa e, afio mai (114, Pese & Viiga EFKS).

AOAOGA

1. Talia le Agaga Paia le Agaga o Keriso na te suia o tatou loto maa’a
2. Fai lou ola ma taulaga ola o le mea manogi lelei i le Alii
3. Fai taulaga faafetai ma fai taulaga lelei
4. O Iesu o le atoaga o taulaga o le penetekoso po o le aso o le seleselega.

.....

ASO SA: 31, ME 2015

MATAUPU: UA FA’AALIA IA IESU LE POTO TAMAITAI
(Lady Wisdom reveals in Jesus Christ).

SINI: Ia aoao le vasega ina ia malamalama – o Iesu Keriso o le Poto na alaga i le Feagaiga Tuai, ma ua liu tino tagata i le Upu i le Feagaiga Fou – ina ia fai o ia ma o tatou poto ma tulafono e taitaiina ma faagaioi ai o tatou olaga e tusa ma le finagalo faaola o le Atua lona Tamā i le lagi

TUSI FAITAU: Ioane 1:14-18

FESOASOANI MO FAIAOGA

O le mataupu, ‘Ua fa’aalia ia Iesu le Poto Tamaitai’. O le Poto Tamaitai o le faatagataina lea o le Atua fetalai e ala i a’oā’iga ma aoaoga ma lapataiga mo ona tagata i le Feagaiga Tuai e ala i ona tagata paia e pei ona molimau i ai Tusi a le Poto (Wisdom Literature) po o Tususiga (Writings) i le Feagaiga Tuai e pei o Tusi o Faataoto, ma Failauga, Pese

a Solomona, Iopu ma nisi o Salamo. O le fesili, aisea ua fa’aalia ai ia Iesu le Poto Tamaitai? O le upu ‘poto’ i le gagana Eperu ma le gagana Eleni e kenera tamaitai. O lona uiga o upu, ma aoaoga, ma aoaiga, ma faatonuga, ma lapataiga a le Poto i le Feagaiga Tuai – ua pei o le tulaga (role) o le alofa faatina o le tina i lana fanau. Ma o le natura lea o upu a le Poto po o Iesu e fesootai ma le natura faatina o le alofa o le Atua – i ona tagata filifilia ina ia manino i ala o le Alii e faaolaina ai ma manuia ai, ae le o le malaia ma le faafanoia.

I le Tusi Faitau, o lo o molimau ai Ioane i le liutino tagata o le Upu. O le uiga o le Upu po o le Lokou i le gagana Eleni o le faavae faale-Atua (divine principle) o lo o faagaioi ai le foafoaga. Ma o le faasino e Ioane o le Upu ia Iesu e fesootai ma upu a le Poto na alaga ai i le Feagaiga Tuai. O upu la a le Poto, le Upu ua liu tino tagata e ala iā Iesu – o le tulafono lea faale-Atua e taitai ma tapasa ai olaga o ona tagata e faaolaina ma manuia ai.

I le f.14, o lo o molimau ai Ioane le fai-Evagelia i le liu tino tagata o le Upu. E le gata o le Upu o lo o faasino e Ioane ia Iesu, a o le aoaoga a Ioane e faasa’o ai le aoaoga sese sa aafia ai le uluai Ekalesia. O le aoaoga sese e le mafai ona fesootai mea faitino ma le Atua ona o mea faitino e leaga ma elelelea. O lona uiga e le mafai e le Atua ona liutino tagata pe fai ma tagata, auā o le tagata ua leaga ma elelelea i le agasala. Ae fai mai Ioane o le Upu po o le Tulafono o lo o gaiioi ai le foafoaga ma faia le foafoaga (1:3) - ua mau ma i latou; na latou matamata foi i lona mamalu; o le mamalu lava lea o le Alo e toatasi o le Tama, ua tumu i le alofa tunoa ma le faamaoni.

I le f.15, o lo o tusia ai e Ioane le fai-Evagelia le molimau a Ioane le Papatiso. Sa ia talai atu o le Poto ua liutino tagata e ala i le Upu – “..O ia lenei sa a’u fai atu ai, O lē mulimuli mai, e sili o ia iā te a’u, auā o ia na muamua ia te a’u”. I ff.16-18, o lo o faaopoopo mai ai le fai-Evagelia i le molimau a Ioane le Papatiso. (i). O le Upu, le Poto po o Iesu, ua tatou maua uma ai le alofa tunoa e faaopoopo i le alofa tunoa. (ii). Na tuuina mai e Mose le Tulafono, a o le alofa tunoa ma le mea moni e mai ia Iesu Keriso lea. (iii). E le i vaaia lava le Atua e se tagata, vagana le Alo e toatasi o Iesu, le Poto po o le Upu ua liutino tagata ua na faailoa mai o ia.

I lona satauro ma lona toetu, ua tatou iloa ai e ala i le loto salamō ma le faatuatua le fai o Iesu le Poto ua liutino tagata e ala i le Upu, ma Tulafono e taitaitama i olaga o ē ua fai ma ona soo. O le tulafono lea ua ta'ua e Paulo – (i). o le tulafono a le Agaga; (ii). po o le tulafono a Keriso; (iii). po o le tulafono i le faatuatua. Ua tatou faamoemoe tasi ai i le alofa tunoa ma le mea moni ua ala mai ia Iesu Keriso. E tāua le tulafono na ala mai ia Mose, ae ua pei o se ufimata lo tatou iloa atu o le Atua i le tulaga ua ta'u mai e le tulafono oi tatou o tagata agasala i le solitulafono. Ma ua tatou nonofo ai i lalo o le pule a le agasala ma le alii o lenei lalolagi. E leai se isi ala tatou te iloa atoa ai le Atua ma lona mamalu ma aveesea i tatou mai le pule a le agasala, vagana le Alo e toatasi, o Iesu lea le Poto sa alaga i le Feagaiga Tuai, ma liutino tagata e ala i le Upu i le Feagaiga Fou. O ia e toatasi ia fai ma tulafono e taitaiina ma fa'aatoatoaina ai lo tatou faatuatua. O le fesili – E faapefea ona iloa ua mau ma i tatou ona soo Iesu Keriso le Upu po o le Poto? Ioe, e iloa i lau amio ua taitaiina e Keriso. I nei aso ua tausuai le tele o talavou i le tuinanau i mea faafiafia o lenei olaga, ma ua lepetia ai faasinomaga e manuia ai le lumanai ma fa'aaogaina ai le ola e pei o le aoga, le alu i le lotu, le fesoasoani i le aiga, ma nisi. O nisi talavou ua atia'e le tino ma le mafaufau, ae ua le atinaeina le agaga. Ma o le tele o talavou faapea ua molia i le le faamaoni i galuega, ma nisi o solitulafono mataga, e oo lava i le lima tete ma le fasioti tagata.

GALUEGA FAATINO: Fetufaā'iga

1. Upu -

E uiga faatasi ma le upu lokou. O lona uiga o le tulafono faale-Atua o lo o faagaioi ai le foafoaga aoao

2. Poto -

O le upu 'poto' i le gagana Eleni e kenera tamaitai. Pe a faatagata le 'Poto' ua pei ai o ia o se tina ma lona alofa i lana fanau e ui i faafitauli ua aafia ai olaga o le fanau, a o lona alofa e pae ma auli ma avatu le aoaoga ma le aoaiga tonu e faaola ma manuia ai le fanau

3. Iesu Keriso –

O le igoa Iesu, o lona uiga o le Faaola, a o le igoa Keriso o lona uiga, o lē ua faau'uina

Fesili e fesoasoani i le fetufaā'iga

1. O le ā le fesootaiga a le Poto ma le Upu ia Iesu?
2. O ā molimau a Ioane le Papatiso ia Iesu?
3. O ā molimau a Ioane le fai-Evagelia ia Iesu?
4. E faapefea ona faailoa mai e Iesu le Atua le Tama, ae ua na o ia le Alo sa mau faatasi ma ia?

AOAOGA

1. Ia fai Keriso ma ō tatou poto ma lokou (tulafono) e faagaioi ai ma ta'ita'i ai ō tatou olaga o aso uma
2. E sese le faapea ua 'e maua Keriso, ae leai sau feau e fesoasoani ai i ou matua i lou aiga
3. E mau Keriso ma ē latou te faia ma olaina ana poloaiga
4. E fai mo tatou le mamalu o Keriso i le faamaoni i le ola auauna atu ma le loto fuatia ifo i la le Atua e ala i ē o lo o puapuagatia, faapea lana Ekalesia.

.....

IUNI: O LE SATAURO MA LE OLA OFO ATU (The Cross and Life lay down).

O le autu o lenei masina o lo o faatāua ai le mataupu silisili o le satauro i lona fesootaiga ma olaga o soo o Iesu. Mo le soo po o le kerisiano, (i). Ia fai le ola ma pologa a Keriso, (ii). Ia oti i la le tino peiseai na faasatauroina faatasi ma Keriso; (iii). Ia ofo atu le ola o le taulaga ola e paia ma malie i le Alii. Ioe, o le fai ma kerisiano ma auauna ma pologa a Keriso – o le amo o lou satauro ma mulimuli ia Iesu Keriso.

.....

ASO SA: 7 IUNI, 2015

MATAUPU: TAUSUAI IUTAIA MA ELENi I LE SATAURO
(The Jews & Creeks stumbles of the cross).

SINI: Ia aoao le vasega ia malamalama e le o le filiga o le tagata e tausi tulafono, po o le potu faalelalolagi e faaolaina ai le tagata, ae ua na o le satauro lava o Keriso.

TUSI FAITAU: IKorinito 1:18-25

FESOASOANI MO FAIAOGA

O le mataupu, ‘Tausuai Iutaia ma Eleni i le satauro’. O lona uiga, latou te le taliaina le faaolaina o le tagata e le satauro o Keriso. Auā i le manatu o Eleni – latou te faamamafa le potu, a o Iutaia – latou te faamamafa le tulafono e faaolaina ai.

I le Tusi Faitau, o lo o faamanino ai e Paulo ia Korinito le mataupu i le satauro o Keriso. Fai mai Paulo, o le satauro o le valea lea i ē o malaia, a o le mana o le Atua ia te i tatou o lo o faaolaina. O ai ē ua malaia ua ta’ua e Paulo? Ioe, oi latou ia ua latou teena le satauro o Keriso. Oi latou ia o Iutaia ua faamamafa le tulafono ma Eleni ua faamamafa le potu e faaolaina ai. Auā foi o fea o le potu o le lalolagi ma le taumafai o Iutaia e olaina le tulafono e faaolaina ai le agaga o le tagata ai le pule a le agasala ma le alii o lenei lalolagi? O le mea lea ua tā’ua ai e Paulo i latou o ē o malaia, ma o se mea valea ia i latou le mataupu silisili i le

satauro o Keriso o lo o tala’i e Paulo i Ekalesia i nuu ‘ese. Aisea e sa’o ai Paulo? Auā foi e le faaolaina o tatou agaga ai le pule a le agasala i so tatou potu faalelalolagi. E faapena foi i le taumafai o le Iutaia e olaina le tulafono e le mafai ma

lē atoatoa auā o le tagata e vaivai. A o ē ua faaolaina, o le mataupu i le satauro – o le mana faaola lea o le Atua ia te i latou. Aisea? Auā foi o le satauro o Keriso ma lona maliu tiga ai – ua togiola ai, po o le tau lea ua faatauese mai ai i tatou tagata nai le pule a le agasala ma le tiapolo ae le o le potu ma le taumafai i le malosi faaletagata e tausi tulafono. E le faapea e le aogā le tulafono a o Keriso ma lona satauro ua faataunuaina i ai le faamoemoe o le tulafono ia ta’ita’i tagata i le Atua ma tumau ai. Ua tatou maua le mafai e ala i lona satauro ona tatou olaina ana tulafono ma poloaiga ma faamasinoga ma tumau ai. Auā o le mana lea o le Atua ia i tatou o lo o faaolaina, po o ua talia Keriso iō tatou olaga e fai ma ō tatou Alii ma Faaola. O fesili i le f.20 ua faailoa ai e Paulo ia Korinito ma tatou soo o Keriso i nei aso le leai o se mafai i le malosi faaletagata i lona filiga e tausi le tulafono ma lona potu ona faaolaina lona agaga. Auā ua oo lava i le taumafai o le tagata ia iloa le Atua i lona potu ma lona filiga, ua ia le mafai. Ma ua molimau ai Paulo i le f.21a, ua finagalo ai le Atua ia faaolaina i le valea o le tala’iga po o le mataupu i le satauro ē ua faatuatua. O se ala e feteena’i ma le manatu o Iutaia e tausisi i le tausi o le tulafono ma Eleni e faamamafa le potu. A o ē ua faatuatua ua fai le valea lea o le mataupu i le satauro i le manatu o Iutaia ma Eleni ma mana o le Atua ia te i latou. Aisea? Auā ua na o le salamō lava i agasala ma talia le togiola ua faia e Keriso, ona liua lea o lo tatou tagata tuai sa pule ai le agasala ma le alii o le lalolagi i le tagata fou ua pule ai Keriso ma taitai e Keriso ma lona Agaga.

GALUEGA FAATINO: Fetufaā’iga i le Fesili & Tali o lo o i lalo

1. O le ā le uiga o le fuaitau i le f.1, “.o le mataupu i le satauro, o le valea lea i ē ‘o malaia, a o le mana o le Atua ia te i tatou o lo o faaolaina?’”

Tali: O le satauro – o le ala lea ua saunia e le Atua e faaolaina ai le tagata agasala. O se ala maualalo i le vaai a Iutaia ma Eleni, ‘a ua

saunia e le Atua e faamaina ai le malosi ma le potu o le lalolagi i le tulaga ua le mafai e le tasi tulafono o Iutaia ma le potu o Eleni ona faaolaina o ia mai le pule a le agasala ma le tiapolo. O lona uiga ua na o le mataupu i le satauro o Keriso tatou te maua ai le mafai e tetee atu ai le agasala ma le tiapolo, ina ua tatou salamō ia tatou agasala ma faatuatua i lona suafa

PESE: Pe a ita tele mai (234, Pese & Viiga EFKS).

AOAOGA

1. Ua na o le satauro o Keriso e faaolaina ai i tatou, auā ua galue mai ai lona mana e ala i le loto momomo ma salamō ma maulalo, ma suia atoa ai lo tatou tagata tuai i le tagata fou ua ola ia Keriso

.....

ASO SA: 14 IUNI, 2015

MATAUPU: IA FAAMAGALO ATU (Forgive others).

SINI: Ia aoao le vasega ina ia malamalama, o le faamagalo atu o le tasi lea uiga e tatau ona fa'aalia i so'o o Iesu auā o le autu lea o lona maliu ai i le satauro ma lona toetu nai le oti

TUSI FAITAU: Luka 17:1-4

FESOASOANI MO FAIAOGA

O le mataupu, 'Ia faamagalo atu'. O le faamagalo atu – o le tasi o measina o le malo o le Atua mo tagata uma ua faatuatua ia te ia. O le tasi o aoaoga a Iesu, afai tatou te faamagalo atu e faamagaloina foi ā tatou agasala. Aisea? Auā foi o le tasi lea o natura o le alofa o le Atua mo le tagata agasala. Na te faamagaloina agasala pe 'ā salamō le tagata i mea sese ua fai.

O le Tusi Faitau, o lo o aoao ai Iesu i ona soo – i le oo mai o mea e tausuai ai. O ā ia mea? O puapuaga e faia mai e isi tagata, o puapuaga masani o le olaga, o puapuaga o le fai ma soo o Keriso, ma puapuaga ona o tuinanauga ma faiga atamai a le tiapolo. O mea ia tatou te tausuai ai ma lafoai le faatuatua po o le ola mulimuli ia Iesu. E oo mai lava auā o lo o tatou ola i le lalolagi ma fetaia'i ma ia mea i le olaga o aso uma. O le faamanatu a Iesu i ona soo ina ia mataala ma faautauta auā e oo mai lava. O le fesili, ua oo mai ia mea e tausuai ai? Ioe, ua oo mai auā ua le utuva taua i le va o atunuu. O puapuaga o le tagata i mafuaaga ua ta'ua i luga ua tatou molimau i ai i aso uma. O faama'i leaga o siama e maua i meaola ma manu ua aafia ai le tagata. O le faapa pomu pule i le ola, o le fasiotia o so o se tagata i meatau, o le tafana i lalo o vaalele savili, o mala faalenatura, o le taugata o le soifuaga, o sauaga mataga. O nei puapuaga uma e mafua mai lava i le tagata. E ui ina fetalai le Alii i le f.2. i le mea e ao ona faia e le tagata ua mafua ai nei puapuaga i nisi tagata, a o le aoaoga a Iesu i ona tagata faatuatua po o ona soo – ia tatou tala'i atu pea le talalelei o le alofa faamagalo o le Atua i nei tagata. Ia tatou aoa'i ia i latou ua faatausuai ai le tagata vaivai ma le tagata mativa i le sosaiete faapea so o se tagata.

O le fesili, e faapefea ona tatou aoa'i i atunuu o lo o fausia meatau malolosi, soona fausia oloa ua tele ai le kasa oona ua vevela ai le tau ma ua tupu mai ai mu ma afa ma mafui'e? E faapefea ona tatou aoa'i i malo ua latou fa'aaoga meatau e tafana ai i lalo vaalele savili, ma tafana ai aai o lo o tumu ai tagata lautele? Ae ā le au faapa pomu, pule i le ola, ma nisi atunuu o lo o nofoia faamalosi isi malo? Ioe, ua fausia e malo afaatasi faasalaga (sanctions) e aoa'i ai ia atunuu. A o Iesu lava ia i ona soo ma tatou le Ekalesia i nei aso – i lo tatou va ma isi tagata amata mai lava i aiga, le nuu, le aoga, le fale faigaluega, seia oo lava i aulotu. Po o le ā lava le agasala ua faia e se tagata o lo tatou siosiomaga ua ta'ua i luga, o lo tatou tiute lava ia aoa'i muamua ia i latou. Pe a salamō o ia – ia tatou faamagalo atu ia te ia.

Ae ā le agasala o le fasioti tagata ma nisi aga mataga e faia e nisi i ē pele ia i tatou? O le tali lava mo tatou soo o Iesu, ia tatou faamagalo atu. Auā i nei aso ua tele ina aoa'i e le tulafono a le malo, tulafono a nuu, so o se ituaiga solitulafono. E oo foi i le Ekalesia e aoai le Ekalesia

i ona tagata ua solitulafono po o ua agasala. Ioe, o le pito lauu lava a tatou soo o Iesu po o le Ekalesia – ia faamagalo atu. Ia le na o upu, ‘a ia faailoa i le loto lo tatou tagata i totonu ua loto faamagalo. Aisea ua faapea ai le aoaoga a Iesu i ona soo? I le satauro a o le’i to lana manava, na ia valaau ai i lona Tama, “Lo’u Tamā e, ia e faamagalo atu ia te i latou auā ua latou le iloa le mea ua latou faia”. O lo tatou faamagaloina ua ia maliu tiga ai i le satauro. Ma o le natura foi lea o ē uma ua salamō i agasala ma ua fai ma soo faamaoni o Iesu.

GALUEGA FAATINO: Fetufaā’iga i fesili

1. O le ā le isi ta’u o le tagata e faatausuiaina isi tagata?
Tali: O le tagata ua pulea e le alii o le lalolagi ma le agasala lona olaga
2. O ā mataupu (issues) o lo o matilatila ai le amio lea o le faatausuai i lo tatou atunuu?
Tali: O le pule le uma, toso teine, o le tu faasotoma ma komoro a alii i fanau tama laiti, ma sauaga mataga ma faamalosi i fanau teine laiti; gaoi ma faaleaga mea totino a isi; ta’u leaga igoa o isi; molimau pepelo i fanua ma suafa ona o le mana’o, ma nisi ua le ta’ua
3. O le ā le mea e tatau ona fai e le tagata ua naunau e faatausuiaina se tagata ua faatuatua i le Atua?
Tali: E lelei pe ana noatia se maaolo tele i lona ua ma faagoto ifo ia te ia i le sami, ae leaga pe a ia faatausuiaina se tasi o fanau a le Atua e ta’ua e faatauvaa
4. O le ā le taimi e tatau ai le faamagalo atu i ē ua agasala i ō tatou siosiomaga?
Tali: Pe tatou aoa’i ia te ia, ma ua faalogo i le aoaiga ma ua fa’aalia le salamō i lona olaga ma lana amio.
5. O le ā le uiga o le ‘foi faafitu ona agaleaga mai, ma foi faafitu ona liliu mai ma faapea mai ua salamō i le f.5?
Tali: O lona uiga, po o le ā le matuiā o se mea leaga e faia mai e se tagata ia te oe, ae ‘a atoatoa le fua o le salamō i lona ola ma lana amio, ua faapena foi ona atoatoa lona faamagaloina

PESE: Alofa i lou tuaoi a o e malaga

AOAOGA

1. E tāua le salamō ina ia faamagaloina agasala ua fai
 2. E tāua le a’oā’iga e atamai ai ma iloa ai le leaga ma le inosia o mea leaga ua fai
 3. E leaga le fai oi tatou ma tagata e tausuai ai isi ō tatou uso a tagata
-

ASO SA: 21 IUNI, 2015

MATAUPU: PE ‘Ā MULIMULI IĀ IESU – IA FAAFITIA ‘OE MA AVE LOU SATAURO
(To follow Jesus is to deny yourself and take up your cross).

SINI: Ia aoao le vasega ina ia malamalama, o le fai ma so’o o Iesu e amata mai le faafitia o lo tatou tagata tuai, ma ō tatou ave ō tatou satauro e ala i lo tatou oti i la le tino ma ona mana’o ma ona tuinanau

TUSI FAITAU: Mareko 8:34-38

FESOASOANI MO FAIAOGA

O le mataupu, ‘Pe a mulimuli ia Iesu, ia faafitia oe ma ave lou satauro’. O le faafitia o oe – o le laasaga amata lea e tatau ona faatino muamua, ona sosoo lea ma le laasaga lona lua – o le ave o lou satauro. O laasaga amata ia o le fai ma soo o Iesu. O le fesili, aisea e tāua ai le faafitia o oe, ona faato’ā ave ai lea o le satauro? E le mafai ona ave e se tasi lona satauro, pe a le faafitia o ia ia te ia. Aisea? Auā foi o oe po o a’u – e aofia ai ō tatou lagona ma manatu ma olaga faaletagata lava ia ua masani ai i aso uma. Ma e ao ona tatou faafitia le oe ma le a’u lea – ona tatou ave moni lea o ō tatou satauro ma mulimuli ia Iesu. O le ave o le

satauro o le soo, o le aveina lea e le soo o lona tagata fou ua taitai e Iesu ma faavae o lona malo. Faataitaiga, o le upu a Paulo ia Korinito, ua ia tauave faailoga ma maosiosia o Keriso. E malamalama atili i upu foi a Paulo ia Kalatia – ia fua mai o latou ola i fua o le Agaga.

Atonu ua malamalama le mataupu, ae i le Tusi Faitau o lo o faamatala ai e Mareko le aofia o soo o Iesu i lana valaau i le motu o tagata. Aisea? Auā foi oi latou o faataitai (role model) mo le motu o tagata. O ona soo e sefulu lua – o ē ua faafitia o latou tagata tuai, ma ua ua amo o latou satauro, i le mulimuli ai iā Iesu. O le fu’a tualuga o le fai ma soo mulimuli ia Iesu – o le satauro ua amo. Amo faapefea? O le upu amo e fesootai ma le upu tauave. O lona uiga – ia tauave ma amo e le soo faailoga ma maosiosia o Iesu i lona fai ma ona so’o. I nisi upu, o le ola atoa o le so’o ua pule ai Iesu, ua taitaiina foi e Iesu. Ua faapei le soo o lona Alii i le amio, i le mafaufau, ma le agaga. I le f.35, o lo o fa’aalia ai avanoa e lafi ai le so’o mai le faataunuuina o lona tiute. O tofotofoga e iloa ai le so’o moni, ae ua ‘alo ai ma su’e ai le paolo e lafi ai. O le faamanatu a Iesu i ona so’o – ina ne’i maumau le fai ma so’o i lea vaivaiga faaletagata. Auā e i ai nisi e vaai atu loa i mea e molia ai i latou e le lalolagi, ma ono lamatia ai le tino, ona faafitia lea o le fai ma so’o. Ae o le so’o ua ola atoa i le natura faasoo o Iesu – e ofo atu lona ola tusa pe oti ai le tino, ae ua faasaoina lona agaga. E le gata i lea, a o le ola atoa o le so’o ua oti i le tagata tuai, o le tino ma ona tuinanau, ‘a ua ola i le ola fou ia Keriso lona Alii Faaola. I le f.37, o lo o faamanino ai e Iesu i ona so’o ma le motu o tagata le leai o se mea oi le tagata e togiola ai lona ola ai le pule a le agasala ma le tiapolo. I le f.38, o le faamanatu lea a Iesu i ona so’o – ne’i o latou faafitia lo latou fai ma ona so’o e ala i le fa’aali atu o ia ma ana upu i lenei tupulaga mulilulua ma le agasala. Afai latou te faafitia o ia e pei ona faailoa mai e le upu ‘mā’, e faapena foi ona mā pe faafitia e Iesu i latou pe ‘a sau o ia o le Faamasino ma ana agelu paia i le mamalu o lona Tamā i le faamasinoga mulimuli.

I le fai ai o ia ma Atalii o le tagata, sa ia puapuagatia ai. A o ia foi o le Alo o le Atua le Tamā. Ae sa ia le manatu i lona tulaga tutusa ma le Atua, ae ua ia faafitia lea tulaga silisili ese i lona pei ai oi tatou le fanau a tagata. Sa ia amo lona satauro ma tumau pea i le anaana atoa i le

finagalo paia o lona Tamā i le lagi auā lo tatou faaolaina. Na ia maliu tiga ai, tanumia i le tuugamau, ae na toe faatuina o ia e le mana o le Atua lona Tamā i lona mamalu faavavau.

GALUEGA FAATINO: Fetufaaiga i le fesili oi lalo

**** O ā mea e ao ona tatou faafitia i lo tatou fai ma so’o o Iesu?

PESE: A ou manatu ifo nei (40, Pese & Viiga EFKS)

AOAOGA

1. Ia faafitia oe ma amo lou satauro i le mulimuli ai iā Iesu
2. ‘Aua le ola faitogafiti auā e maumau ai lou ola i le malaia
3. E lē mā Iesu i ona so’o e le mama e fa’ailoa atu o ia iō latou ola i tupulaga mulilulua ma ola agasala.
4. Salamō i agasala ma faatuatua i le suafa o Iesu o le amataga lea o le so’o mulimuli ia Iesu
5. O Iesu Keriso – o le Faamasino o le faamasinoga mulimuli e sau ai o ia ma ana agelu paia i le mamalu o lona Tamā

.....

ASO SA: 28 IUNI, 2015

MATAUPU: FAASATAUROINA FAATASI MA KERISO
(Crucified with Christ).

SINI: Ia aoao le vasega ina ia malamalama, o le faasatauroina faatasi ma Keriso o le fa'aalia lea o le soifua o le Keriso na maliu ma toetu io tatou ola ma olaga

TUSI FAITAU: IIKorinito 4:7-11

FESOASOANI MO FAIAOGA

O le mataupu, 'Faasatauroina faatasi ma Keriso'. O lona uiga mo le Ekalesia po o soo o Keriso, oi latou po o le Ekalesia i lona ola molimau atu ua fa'aalia ai le faamoemoe o le faasatauroina o Keriso. O lona uiga, faapei ona faasatauroina o Keriso ina ia togiola ā tatou agasala e ala i le loto salamō ma le faatuatua i lona suafa, ia faapena foi lana Ekalesia po o ona soo ona faailoa atu iō latou ola ma olaga lea tagata fou. I nisi upu – ua faasatauroina o tatou mana o ma tuinanau leaga po o lo tatou tagata tuai sa i ai anamua, 'a ua tatou ola i le ola fou ia Keriso. Ma o le uiga tonu lea o le faasatauroina faatasi ma Keriso.

I le Tusi Faitau, o lo o mua'i faamanatu ai e Paulo i le Ekalesia i Korinito lo latou valaauina e Keriso e fai ma ana Aposetolo, ma i le tulaga lea – ua afua ai ona ia te i latou lenei oa i ipu omea. O lona uiga, oi latou ua na o ni meafaigaluega ua faatotogaina ma i ai le tumu o le Alii – ina ia fai o latou ola faatauvaa ma viiga o le Atua. Ua faapei i latou o le ipu omea i lima o le fai ipu omea o le Atua ma Keriso lea. E ui ina mā'ale'ale ma mata'eta'e, ae ua ia te i latou le oa e ui ina mata'eta'e ma mā'ale'ale. Ua faalagolago tasi ia Keriso ma lona mana e ui ina sauaina ma puapuagatia. Ua faapei na faasatauroina faatasi i latou ma Keriso. E ui ina ola i la le tino e faaososoina ma faiaina, e sauaina ma faafitia le valaauina e Keriso, ae peiseai ua ola i la le agaga faatasi ma Keriso. Lea ua mafua ai ona faapea upu a Paulo i ff.8-9 - latou te puapuagatia ae le atuavale ma popole ai; e fememea'i ae le matua fememea'i; e sauaina ae le tuulafoaiina; e lafotuina i lalo ae le fano.

Aiseā? O le tali o lo o i le f.10. O lo o tauave i le tino e le aunoa le fasiotia o le Alii o Iesu, ina ia fa'aalia le soifua o Iesu iō latou tino. Ma o le uiga tonu lea o le tatou mataupu, 'Faasatauroina faatasi ma Keriso'. I le f.11, o lo o faamanino atili ai e Paulo lea tulaga. O lo latou ola ua tuuina atu pea lava i le oti ona o Iesu, ina ia fa'aalia foi le soifua o Iesu iō latou tino augavale. O lona uiga ua latou oti i la le tino ma ona mana'o ma tuinanau leaga, faapea le tiga o sauaga ma puapuaga ua faia ia i latou ona o Keriso, auā ua fa'aalia pea le soifua o Keriso iō latou ola.

O le talalelei lea mo Korinito i aso o Paulo faapea foi i tatou i nei ona po. Ia fa'aalia iō tatou tino augavale le uiga o le faasatauroina faatasi ma Keriso. Ia lafoa'i lo tatou tagata tuai, 'a ia ola i le ola fou ia Keriso. I le aga atu o Keriso i le satauro, sa fa'aali uma e le lalolagi ma ona tagata ia te ia agasala uma ua mafua ona ia maliu tiga ai e ui ina leai sana agasala. A o lona maliu i le satauro, ina ia mafai ona faasatauroina, oti ma fasiotia lo tatou tagata tuai – e ala i le salamo ma le faatuatua i lona suafa.

GALUEGA FAATINO: Fesili & Tali

1. O le ā le oa i ipu omea ua ia te i latou ina ia i le Atua le matuā tele o le mana?

Tali: O le oa e faasino i le ola fou ia Keriso, a o ipu omea e faasino i le tino augavale ua fa'aalia ai lea ola fou ia Keriso. Ma ua na o le ola fou lea ia Keriso 'e ā le Atua ai le matuā tele o le mana auā ua fa'aalia vavega o lona alofa tunoa iō tatou ola faatauvaa ae le o so tatou iloa ma se malosi

2. O le ā le uiga o le f.10 i le manatu o Paulo?

Tali: O lona uiga, o lo o tauave i le tino o Paulo le faamoemoe o le fasiotia o Iesu i le tulaga ua oti lona tagata tuai e ui ina ola i le tino, 'a ua ola i le ola fou ia Keriso ua fa'aalia ai le soifua o Keriso. E fesootai ma ana upu iloga – 'E le o toe ola a'u (tagata tuai anamua) a o Keriso o lo o ola i totonu ia te a'u'.

3. Aisea ua le matuā faumatia ai Paulo i sauaga ma puapuaga na faia ia te ia e pei ona ta'ua i le f.9?

Tali: Auā sa i luga ia te ia le mana ma le alofa tunoa o le Atua

4. O le ā le uiga o le f.11 i le manatu o Paulo?

Tali: O le ola o Paulo ua oti i la le tino i ona manao ma tuinanau ma mea tiga e palaai ai le tino, ‘a ua fa’aalia ai le soifua o Iesu i ō latou tino augavale

PESE: Tautuana le Alii le Faaola (183, Pese & Viiga EFKS).

AOAOGA

1. O le amio lelei i le itu faaleagaga o le faasatauroina faatasi ma Keriso
 2. Ia oti i le tino ma ona manao ma tuinanau, ‘a ia ola i le ola fou ia Keriso
 3. O le soo o Keriso e le palaai ma faavaivai e alofa foi ia Keriso e ala i lana Ekalesia
 4. Faalagolago i le mana ma le alofa tunoa o Keriso tatou te manumalo ai i lo tatou molimau atu i le soifua o Keriso
-

IULAI: O IESU KERISO & EKALEZIA. (Jesus Christ and the Church).

Ua faatāua i lenei masina lo tatou Faaola ma le Ekalesia. O Keriso o lona tino vaaia o le Ekalesia. Ua tatou fai ma itutino o lona tino le Ekalesia ona o lona toto, ma ua tatou foliga foi ia te ia ona o lona tino paia e tasi na faamomoina ua tofusua ai i tatou uma ua salamō i agasala ma faatuatua i lona suafa. Amuia se tasi ua fai ma itutino o le Ekalesia.

.....

ASO SA: 5 IULAI, 2015.

MATAUPU: IA FAAMAONI E FOLAFOLA LE TALALELEI.

(Be truthful in preaching the Good News).

SINI: Ia a’oa’o le vasega ina ia malamalama lelei i le tāua o le faamaoni, i le faatinoina o se galuega ua tofia pe valaauina ai se tagata e fai. A faamaoni ona fai se galuega, o le ‘ā sologa lelei le lumanai. Ae ‘ā le faamaoni, o le ‘ā faanoanoa taeao.

TUSI FAITAU: Galuega 2: 29- 47.

FESOASOANI MO FAIAOGA:

O le upu faamaoni, ua masani ai le faalogo. O le upu o lo o taoto ai le manuia o le lumanai. E le na o sina taimi e faatino ai, a o taimi uma ma aso uma. Ina ia mautinoa le sologa lelei o lea faamoemoe.

O le Tusi Faitau- o le faamoemoe lea o Iesu Keriso, o le fa’asafua lea o le talalelei i le lalolagi. A o ai ē o lo o faamoemoe i ai lea galuega? O le ala lea sa femaliuai ai Iesu ma ona soo i taimi o lana galuega, ina ia matuā lava tapena le au-soo i le taimi e tu’u atu ai i latou e fai le galuega. Peitai e lei māmā i le Alii le tu’ua na’o i latou e fai le galuega. A ua ia auina ifo le Agaga Paia e fesoasoani i ai latou i le galuega.

O le ala lea o le tulai o Peteru, auā ua ia te ia le mana faatupu malosi (le Agaga Paia lea). Ua ia faailoa atu, o Iesu sa latou faasatauroina, lea ua toe tu mai. Ua afio a'e i le lagi ma nofo i le itu taumatau o le Tamā. A ia fai i latou uma sa i ai i lea Aso ma molimau i le afio ifo o le Agaga Paia. O le mea alofa foai fua mai mo tagata uma. E le va'aia e mata, ae lagonaina i le loto ma le tino. E ui lava o Peteru o le tagata sa ia faafitia le Alii, ae 'a fua i le aso fou na taunu'u ai le fetalaiga a Iesu ia te ia, ona mautinoa lea, o Peteru o le moemoe fou o le talalelei i le lumanai. Ua tuanai lagona o le Aso ua tea, a ua maua manatu o le Aso fou.

Lea ua tino mai le Peteru fou, pe 'a fua i lea Aso. Ua ia faapea atu ia i latou uma sa i ai ina ia salamō ia, ma ia taitasi ma papatisoina i latou uma i le suafa o Iesu Keriso mo le faamagaloina o agasala, ona maua lea e i latou o le mea foai fua, o le Agaga Paia lea. O lona uiga, o lo o i ai le moemoe fou i le tagata na te taliaina le Keriso manumalo. Ua faatupulaia le toatele o tagata ma ua oo atu, pe tolu afe o i latou sa i ai. Ua faatasia i latou i le faatuatua, ua ō latou vivi'i atu i le Atua i aso uma, ma ua atili ai ona faaopoopoina o i latou ua faaolaina ma ua tupu ma ola foi le Ekalesia a Iesu Keriso.

Uiga o Upu ma Fuaiupu:

1. perofeta, f.30 - o tagata va'ai, o tagata ia latou te itea ma iloa mea o le a tutupu i le lumanai.
2. sulii, f.30 - o fanau e fananau mai i se tama ma se tina e tasi.

GALUEGA FA'ATINO: Fesili ma Tali.

1. O le ā le faamoemoe o Iesu mo lona au-so'o?

Tali: Ia fai i latou ma ona sui va'aia i le tala'iina o le finagalo o lona Tamā i le lalolagi.

2. O ai le so'o lea na fai ma faavae o le ekalesia a Iesu i lona Aso?

Tali: O Peteru

3. O le ā le auga ma le faamoemoe o Iesu na auina ifo ai le Agaga Paia i ona au so'o?

Tali: O le faaunuuna lea o le fetalaiga a Iesu i ona au-so'o, a afio a'e i le lagi, o le 'ā afio ifo le Agaga Paia i ai latou, e fai ma fesoasoani o le galuega.

AOAOGA

1. Ia avea o tatou talavou ua talitonu i le Agaga Paia, ma ave feau o le tala lelei.
2. E le na o le Aso Sa e folafola ai le talalelei, a o aso uma i lau amio fa'aalia e pei ona finagalo i ai Iesu.
3. O le faalogo ma usitai, o le faamaoni lava lea i le finagalo o le Tamā o i le lagi.

.....

ASO SA: 12 IULAI, 2015.

MATAUPU: TA'ITA'I E IESU LE EKALESA. (Jesus leads his Church).

SINI: Ia a'oa'o le vasega ina ia malamalama, o Iesu o le ta'ita'i o le Ekalesia.

TUSI FAITAU: Galuega 9: 1- 9.

FESOASOANI MO FAIAOGA:

O le mataupu, 'Ta'ita'i e Iesu lana Ekalesia'. O lona uiga, o le ekalesia o lo o tatou galulue ma tapuai ai nei, o le Ekalesia a Iesu Keriso. O ia o le ta'ita'i. O le ta'ita'i, e taulamua i mea lelei. Na te faia faatinoga lelei ina ia mulimulita'i i ai isi tagata. Na te lavatia faafitauli e tutupu mai i le siosiomaga o le Ekalesia. E alofa ma faapalepale i so'o se tagata. E ia te ia le pule e fai ai so o se mea ua ia finagalo i ai mo le manuia o tagata. E tuli mata'i le tagata ua faaletonu ina ia maua le ola toe fuataiina ma maua le fiafia e mafuta ai i le Ekalesia a Iesu Keriso.

O le amataga o le ulua'i Ekalesia, e tele faafitauli sa feagai ai. A o se isi lea faafitauli mata'utia sa feagai ma le ekalesia, o le sauaina o le au kerisiano. O nei sauaga sa i ai ma le tagata lenei o Saulo. Fai mai le tusi tala o le tusi o Galuega, sa ia mana'o i se tusi faataga mai ositaulaga e alu ma ia i Tamaseko, e saisai mai ai nisi o le au kerisiano o nonofo mau ai.

O lana malaga lea na lagona ai lona faatauva'a ina ua ia fetaia'i ma le malamalama mai le 'ē ana le talalelei, o Iesu Keriso lea. O le malamalama lea na suia ai le sauā i le filemu, na suia ai le pogisa i le malamalama, na iloa ai le faatauva'a o le tagata ina ua pa'u i lalo i le laueleele ma ia lagona atu ai le siufofoga o le Alii. O Saulo, e iloa o ia o le faresaio, o lona uiga la, e iloa lelei ma malamalama ia Iesu, ae eseese o latou talitonuga ma le au-kerisiano. O le ala lea o le tupu pea o nei sauaga.

Peitai o le tali ane a le Alii i lona fia iloa po o ai Ia; Na fetalai manino ai le Alii, "...O a'u o Iesu ua e sauā mai i ai, o le mea faigata ona a'a i tui". O lona uiga, o Saulo o se tagata tete'e, sauā ma loto vale i le galuega a Iesu Keriso. Fai mai ua gatete o ia ma ua mata'u, ua fesili ia Iesu i sona finagalo na te faia. O le finagalo o Iesu, ia alu i le a'ai o le a ta'uina ia te ia, ona ta'uina atu lea o le mea na te faia.

O tagata na o ma ia ua le ma gagana, auā ua o latou iloa le mea ua tupu, ae le 'o mafai ona iloa atu se tagata. Ua na o lona si'ufofoga, ae le 'o va'ai i se tagata. Ua tu i luga Paulo ma le gatete, o lo o pupula ae le o iloa se isi. Ua ta'ita'iina o ia i le a'ai i Tamaseko. Ua tolu foi Aso ua le ai, ma ua le inu. O va'aiga ia na iloa ai e Saulo le sese o lana faamamafa. E le o le faamaoni e tausii i tulafono fa'a-Iutaia, ae faasaua i tagata o le Ekalesia. Sa fia avea o ia ma ta'ita'i o sauaga, a ua aumaia e Iesu e fai ma ana mea faigaluega o le tala lelei. Ua ta'ita'i ese e Iesu ina ia fai o ia ma molimau faamaoni o le talalelei.

Uiga o Upu ma Fuaiupu.

1. mapugatama'i, f.1 - ua faateteleina le sauā/ ua le fa'aitiitia le sauā i tagata.
2. a'a i tui, f5 - o le tete'e/ fa'asaua ma le loto vale.
3. le mafeganavai, f7 - le gagana i se upu.

GALUEGA FAATINO: Fesili ma Tali.

1. O ā ni itu le lelei sa faatinoina e Saulo, e le tusa ma le tulafono a le Alii?

Tali: O le fasioti tagata, ma le taumafai e pu'e le au-kerisiano mo le

faataunuuina o o latou fa'asalaga.

2. O le sauaina o kerisiano, o le sauaina lava lea o ai i le finagalo o Iesu?

Tali: O le sauaina lava lea o Iesu Keriso.

3. O ā ni va'aiga na iloa ai le faamaualaloina e Saulo o lona lava tagata i luma o le Atua?

Tali: Ina ua pa'u o ia i le eleele, ma lana tali atu i le Alii e tusa ma lona finagalo.

4. O Saulo lea ua igoa nei ia ai?

Tali: Lea ua suia ia Paulo.

A'OA'OGA.

1. O le sauaina o Kerisiano, o le le amanaiaina lava lea o le Alii Faaola.
2. E le tu'ulafoaina e Iesu lana Ekalesia.
3. E avea i tatou ma ta'ita'i o le ekalesia pe'a tatou usita'i i le finagalo o Iesu.

.....

ASO SA: 19 IULAI 2015.

MATAUPU: E TASI LE EKALEZIA (The Church is one).

SINI: Ia a'oa'o le vasega ina ia malamalama e tasi lava le Ekalesia, na faavaeina e Iesu Keriso, ma e ui ina eseese igoa ua faaigoaina ai le mau lotu, a o le lotu ua i ai le talitonu faamaoni i le galuega sa faia e Iesu; o le ekalesia moni lena a Iesu Keriso.

TUSI FAITAU: 1Korinito 1: 10- 13.

FESOASOANI MO FAIAOGA:

O le mataupu o lenei Aso Sa, e manino ma malamalama lelei, auā o le Ekalesia na amatamea ai le alii o Iesu Keriso. O lona uiga o le Ekalesia

a Iesu Keriso. O i latou uma ua talitonu ma faatuatua ia Iesu, e tatau ona tala'i atu lea feau, e tusa ma le finagalo o Iesu Keriso. O le ala lea o le tusi atu o Paulo i le ekalesia i Korinito.

O le mea muamua, o le le maua o sona avanoa e o'o ane ai sei matua faafesagai ma tagata o le Ekalesia, ma sei faailoa atu i ai le faafiatauli lea e tupu i le Ekalesia. O Korinito o le a'ai o fetaulaiga o manatu, aua o tagata eseese mai lea atunuu ma lea malo ona o fefa'atauaiga o oloa ma tagata; a o le a'ai foi e tumu i le mau tapuaiga faapaupau ma talitonuga eseese.

Ua oo lava foi i le au-kerisiano, ua felanulanua'i talitonuga, ona o le toatele o le autala'i ma foliga mai ai ua ave le faamamafa o le ola talitonu i le o lo o talaiina le tala lelei, 'a ua le faamamafa Iesu Keriso e ana le Ekalesia.

O le ala lea o le aoi atu o Paulo i le au Kerisiano, ina ia loto gatasi ma ia tasi la latou upu ona leai lea o ni maseiga, a o le a maopopo i le manatu e tasi. E le o Paulo, e le o Apolo, po o Kefa, a o le suafa na faavaeina le Ekalesia, o Iesu Keriso lea.

E eseese le au faigaluega, e eseese foi ā latou talaiga; ae tasi le suafa o lo o latou talaiina, auā e le'i papatisoina i latou i se igoa o le au talai, ua na o le suafa lava o Iesu Keriso e toatasi. Auā e le'i vaeveina le tino o Keriso e tusa ma le au-faigaluega. A o le Keriso lea e tasi e i ai i so'o se mea o lo o i ai lana fanau Kerisiano. O lona uiga, pe fia lava le aufaigaluega galulue, ae tasi lava le Keriso o lo o latou tauaveina. Pau lea o le suafa e maopopo ma tasi ai le Ekalesia. O ā faiga ma faatinoga e faatino ai tapuaiga, o le mea ia mautinoa, ua na o le suafa o Iesu Keriso o lo o tapuai ai, ona manuia lea, pe'a talitonu ma faatuatua faamaoni ia te Ia, o le Alii ma le Faaola, ae le o i latou o lo o talaiina le tala lelei.

GALUEGA FAATINO: Fesili ma Tali:

1. O ai Paulo?
Tali. O le aposesitolo. O le ave feau o le tala lelei.
2. O le ā le faafiatauli lea o lo o tupu i le au-kerisiano i Korinito?

Tali: Eseese talitonuga i a'oa'oga faakerisiano a le 'au ave feau o le tala lelei.

3. O le ā se ata faata'ita'i o le faafiatauli lea o lo o maua foi i Samoa nei?

Tali: O le faatinoina o tapuaiga

AOAOGA

1. Talitonu ma faatuatua ia Iesu Keriso o le Ao o le Ekalesia.
2. Avea i tatou ma ave feau o le ekalesia a Iesu Keriso.
3. Ia o tatou tala'i le mea moni.
.....

ASO SA: 26 IULAI, 2015.

MATAUPU: O LE EKALEZIA MA LE LOTU. (The church and religion).

SINI: Ia a'oa'o le vasega ina ia malamalama i le eseese o le Ekalesia ma le Lotu.

TUSI FAITAU: Roma 5: 15- 21.

FESOASOANI MO FAIAOGA:

O Iesu Keriso o le Ao o le Ekalesia Fa'apotopotoga Kerisiano Samoa. O le talitonuga lea o le EFKS, auā o le upu 'Ekalesia'; o le 'faapotopotoga o tagata ua talitonu ma faatuatua ia Iesu Keriso. O lona afio mai i le lalolagi, o le liutino tagata o le Atua; na afio mai sei fai le togisala a le tagata ona o le agasala.

O le afio mai la o Iesu Keriso, o le mea alofa foaifua mai e le Atua i le lalolagi. E le na o ni tagata, a o tagata uma. O le tupu ma ola o le ekalesia i le lalolagi, ina ua taliaina i le talitonu ma le faatuatua faamaoni e tagata o le alofa tunoa.

O le ala lea o le taumafai atu o Paulo i lana tusi lenei ia i latou uma ua ta'ua o tagata paia o i Roma; e faamanatu, e to'atasi na o'o mai ai lea

alofa tunoa; o Iesu Keriso lea. E pei foi ona o'o mai o le agasala ona o le tagata e to'atasi, ua mafua ai ona ta'uamiotonuina le tagata.

O le mafauauga fa'a-Roma, e ta'uamiotonuina le tagata pe a toe foi e tapuai i le tupu o Roma, ma auauna i le malo o Roma. E tali faapena foi le talitonuga faa-Iutaia i le tulafono, a 'e tausii i le tulafono, e ta'uamiotonuina oe. A o le upu ta'uamiotonuina, o le gagana o faamasinoga. A ta'uamiotonuina le tagata, o lona uiga o le tagata ua soloia e le faamasinoga lana agasala. O le tala o le ta'uamiotonuina o le tagata, o le galuega o le alofa tunoa o le Atua, ua i le tagata e to'atasi o Iesu Keriso lea. O lona uiga la, o le Atua o le faamasino, a o Ia lava foi na saunia le ala e ta'uamiotonuina ai le tagata ua agasala, ina ia tu'uina Iesu e malii e togiola ai le sala a le tagata.

O le uiga lea o le ff.17-19; 'Aua afai o le to'atasi na malo ai le oti i le agasala a le to'atasi, e silisili lava ona malo ma ola e ua maua le faula'i mai o le alofa tunoa, atoa ma le mea alofa o le amiotonu lea. Aua ua fa'asalaina tagata e toatele ona o le tagata e to'atasi, ua fa'apea foi ona ta'uamiotonuina o tagata uma ona o le tagata e toatasi. E fa'apea foi ona agasala o le to'atele i le le anaana o le toatasi, e fa'apea foi ona avea ma amiotunu le to'atele ona o le anaana o le tagata e toatasi'.

O manatu ia o le aposetolo o lo o lu'iina ai le au paia i Roma, i le fete'enaiga o le ekalesia ma le tapuaiga i Roma. O le ala foi lea ua faigata ai ona tupu ma ola le ekalesia i Roma, ona o faiga ma tapuaiga ua masani ai lava Roma ia. O le mafua'aga foi lea o le sauaina o le au kerisiano, ona o ia fe'ese'ese'aiga faaletapuaiga ma talitonuga fa'aroma. O le ala foi lea o le faaopoopoina o le tulafono i Roma, ina ia faateleina ai le agasala.

O lona uiga, e faatupulaia le agasala i le mea ua masani ai, auā e oo mai le ekalesia, ua leva ona i le lalolagi le agasala mai i le ulua'i tagata. A o le ala foi lea o le o'o mai o le ekalesia, ina ua i ai le alofa tunoa i le lalolagi, ina o faateleina le agasala. Peitai o le malo ai o le agasala ma o'o ai i le oti, ua faapea foi ona malo ai o le alofa tunoa e le amiotonu e o'o i le ola fa'avavau i lo tatou Alii o Iesu Keriso.

Uiga o Upu:

1. amio sa'o, f.16 - o le tagata ua sao ona ala.

2. le anaana, f.19 - le usitai, le taliaina, tofotofa.

GALUEGA FAATINO: Taliga Fesili:

1. O le ā le va'ai a le aposetolo i le Ekalesia?

Tali: O le alofa tunoa o le Atua i le lalolagi, ina ua afaina i le agasala.

2. O le ta'uamiotonuina o le tagata, o lona uiga

Tali:o lea tagata sa saisaitia i le agasala; ua ola i le fa'atuatua ma ua talitonu i le alofa tunoa o le Atua e ala ia Iesu Keriso.

3. O ai na mafua ai le agasala i le lalolagi?

Tali: O le ulua'i tagata.

4. O le ā se faatusatusaga talafeagai o le ekalesia ma le lotu e tusa ma le mataupu o lenei Aso Sa?

Tali: O le Lotu na mafua ai le agasala, a o le Ekalesia na maua ai le amiotonu.

AOAOGA:

1. O le tau i le agasala o le oti, a o le tau i le amiotonu o le ola faavavau.

2. Ia avea o tatou talavou ma tagata moni o le Ekalesia a Iesu Keriso

3. O le alofa tunoa o le Atua tatou te maua ai le ola faavavau.

AOKUSO: O LE POTO LIUTINO (Incarnate Wisdom).

Ua faatāua i lenei masina le faamatalaina o le Atua e ona tagata – o le Poto Liutino. Ma o Iesu Keriso o le Poto Liutino o le Atua ina ia suia lo tatou valea ona o le pule a le agasala ma le tiapolo iō tatou olaga, i le fai o Keriso ma o tatou poto e taitaiina o tatou ola i aso uma.

.....

ASO SA: 2 AOKUSO, 2015.

MATAUPU: LIUTINO LE POTO IA IESU KERISO LE UPU
(Wisdom incarnates in Jesus Christ the Word).

SINI: Ia a’oa’o le vasega ina ia malamalama, o le poto o le Atua sa foafoaina ai le lalolagi i le amataga, lea ua liutino tagata e ala ia Iesu Keriso.

TUSI FAITAU: Ioane 1: 1- 5

FESOASOANI MO FAIAOGA:

O le amataga na faia ai e le Atua le Lagi ma le lalolagi. O le fuaiupu e 3 o le Kenese 1, o lo o faapea mai; ‘Ua fetalai mai le Atua. Ia malamalama, ona malamalama ai lea’.

‘Ua fetalai mai le Atua’, ua lava le fasi fuaitau lea e iloa ai, o le Upu lava mai le fofoga o le Atua na foafoaina ai mea uma o lo o i le lalolagi. O le mataupu la o lenei Aso Sa, o le toe va’ai lea a Ioane i le amataga i le galuega foafoa a le Atua, ma ua manino mai ai, o le Poto ma le mataisau lea o le Atua na fa’aalia i le amataga. O le silisiliese foi lea o le Atua, auā e leai lava se isi atua ua na o le Atua lava lea o lo o tatou talitonu ma tapua’i i ai.

O lona silisiliese lea, e le tau fa’aeleelea fua ona ‘a’ao e faatino mea uma o lana foafoaga, ‘a ua lava lava lana upu e faataunu’u ai lona finagalo.

O lona uiga la o le Atua lava o le Upu. Auā o lana upu, o lona finagalo lea ua fa’aalia ma ua tino mai ai mea uma o le foafoaga, ma au mai ai se natura o le Atua; ‘**O LE ATUA FOAFOA**’.

Fai mai Ioane, ‘...e leai foi se mea e tasi na faia e lei faia e Ia’. O lona malamalama foi na Ia tu’uina i le tagata e ola ao, ina ia fa’amalamalamaina ai mea pogisa i le va’ai a le tagata, ia talitonu ma faatuatua faamaoni i le Atua. Auā o lona lea finagalo, ia manumalo le ola i le pouliuli.

Peitai ane ua pogisa le va’ai faale-fatuatua o le tagata i le Atua, o le ala lea o le liutino o le Upu lea sa i le amataga e ala ia Iesu, sei toe faamalamalama le pogisa lea na ufitia ai le tagata, ma toe faamanino lana va’ai i le Atua. O le uiga lea o le fuaiupu e 5; ‘Ua pupula mai foi le malamalama i le pouliuli, ae lei manumalo i ai le pouliuli. O le malamalama o lo o faatatau i le ola. O le pouliuli o le agasala. Ua afio mai Iesu ma aumai lea malamalama, se’i toe fa’amalamalama ai le pogisa ua i ai le tagata; auā sa faatasina ma feta’iaina solo i faaososoga ma mailei a le agasala.

E ui ina faigata le fete’enaiga i lea malamalama ma lea pouliuli, a o lea lava na manino le mata o le vai, i le faiaina na i ai le pouliuli, ina ua malama le pogisa o le tu’ugamau i lona toetu manumalo mai le oti; lea ua maua ai e tagata uma lea ola e faavavau.

O le afio mai la o Iesu Keriso e tusa ma le tala a Ioane, o le liutino tagata o le upu lea sa i le amataga. O le Atua lava lea ua liutino tagata; sei toe aumai le ola i lana foafoaga paia ua faapogisaina e le alii o le lalolagi.

GALUEGA FAATINO: Fesili & Tali

1. O le ‘upu’ sa fa’aaoga e le Feagaiga Tuai e tusa ma le tala a Kenese, a o le ā i le Feagaiga Fou?

Tali: O Iesu Keriso.

2. O ai o lo o faatatau i ai le malamalama?

Tali: O le Atua i le Feagaiga Tuai ma Iesu i le Feagaiga Fou.

3. O ai na faia mea uma o le foafoaga?

Tali: O le Atua lava.

AOAOGA:

1. Ia fai i tatou ma malamalama moni o le Atua i totonu o aiga.
2. O le Atua na faia mea uma o le foafoaga.

3. 'Aua nei manumalo le pogisa i ō tatou tagata.
.....

ASO SA: 9 AOKUSO, 2015.

MATAUPU: O LE TOFI O LE TAMĀ (The Father's Role).

SINI: Ia a'oa'o le vasega ina ia malamalama lelei i isi nafa e tatau iā tamā ona faamaoni ma tausi lelei i ai, e pei foi ona faatinoina e le Alii o Iesu Keriso i lana Ekalesia.

TUSI FAITAU: Efeso 5: 25 - 33.

FESOASOANI MO FAIAOGA:

O le tamā, o le ulu lea o le aiga. O lo o ia te ia le manuia po o le malaia o le aiga, auā o lana ta'ita'iga e iloa ai o se tamā lelei pe leai. O le tamā lelei o lo o nana mai ai se tina lelei. Auā a lelei tina, e lelei foi tamā. O le tāua lea o le upu 'tofi'. O le tofi o le tamā, o lo o faatatau i le toalua po o le tina o le aiga. O le tagata ua tasi i ai lana faaiuga e fai ma ona fesoasoani. O lona uiga, o le isi lea ana nafa tausi faaulu o le aiga, e tatau ona faamaoni i le la feagaiga ua osia, ia tausi faamaoni ia te ia, ia amanaia o ia i taimi uma, ia tumau le fiafia e mafuta atu ia te ia i so o se taimi. O ia mea uma, e faavae i luga o le alofa ua moni ma faamaoni.

A o le uiga tonu lea o le apoapoi atu o Paulo i le Ekalesia i Efeso i le itu pa o tamā, ina ia alolofa iā latou āva. Auā o Efeso, e logologoā i le tapuaiga i le atua tama'ita'i o Tiana. E tele la se a'afiaga o le itu pa o tamā, auā e le o se tapuaiga kerisiano. O le tapuaiga e fa'aalia ai le matagofie o mea fau i lima o le tagata.

O le mataupu la o lenei Aso Sa, o loo aumai ai ni ata se lua, o le ata o le tane ma le āva; se i tau faapupula ai le faafiatauli o lo o tupu i le ekalesia i Efeso. O le tane ma le āva, ua avea ma tino e tasi, ua tasi lo la'ua fatu. O le ala lea e tu'ua ai e le tane o lona tamā ma lona tina, ae faatasi ma lana āva, ona avea ai lea o i laua ma tino e tasi. Faapei ona o

faatasi, galulue faatasi ma fe'oe'oeai itutino uma o le tino atoa. E naunau ma momo'o le tagata ina ia tausi mamā ma aulelei ona itutino uma, ia faapena foi tamā ia latou lava āva; ia alolofa faamaoni ia i latou.

O le ala lea o le fa'amanatu e Paulo ia Efeso; Ia tautuana tautoga, ia outou alolofa faamaoni ia i latou e pei ona alofaina e Iesu o lana ekalesia.

O le ata lea ia Iesu Keriso ma le ekalesia, sei fua i ai le faamaoni o le tagata i le Atua. Auā a fai o Iesu Keriso o le ulu o le ekalesia, a o le ekalesia o le faapotopotoga o tagata ua talitonu ma faatuatua faamaoni ia Iesu Keriso. O lona uiga, o i latou ia o itutino o Keriso. Ua ola faapaiaina i le finagalo o le Atua. Auā o le Ekalesia o le tofi o Iesu Keriso. E lei tu'ulafoaina e ia lana ekalesia. E lei faia e ia se mea e ponā ma ta'uleagaina ai. E lei avaga lana silasila i le matagofie o le lalolagi. Sa Ia onosa'ia faaososoga ona o lona alofa moni i lana ekalesia. O lona lea nafa tausi sa tauave, sa ave i ai lana faamuamua. Na ia tu'ua ai lona mamalu i le lagi ae mafuta ma lana Ekalesia.

E faapena le va'ai a Paulo i le tamā. O iina e fua i ai se tamā lelei, se tamā ua faapaiaina. E alofa faamaoni i lana āva. Na te le faia se mea e maasiasi ai. E le tosina lana va'ai i faafiatauli e pei ona tupu i le ekalesia i Efeso.

O le fafine foi, e tatau ona ava o ia i lana tane. Auā o le isi lea faailoga lelei e iloa ai se tamā lelei, o le amanaiaina e tina. O se va'aiga faapea i se tamā ma lana āva, o le faailoga o le galulue faatasi, fe'oe'oea'i ma feāvata'i, fealofani ma ua faatuatua e le tasi le tasi, e pei foi o Iesu ma lana ekalesia.

Uiga o Upu:

1. ila, f.27 - o lo o fa'atatau i se mea sese, se fa'aletonu ia po'o se agasala foi.
2. ma'anuminumi, f.27 - le lelei, mataga, fa'anefu.

GALUEGA FAATINO: Vaelua le vasega i ni vaega se lua:

Vaega 1: Fai sa latou faatinoga i se ata e faailoa ai se tamā lelei i totonu o se aiga.

Vaega 2: Faatino se tala e atagia ai le le amanaiaina e le tamā o se fautuaga ma se tu'ualalo a le tina.

PESE: A i ai Iesu i se aiga, o se aiga fiafia.

AOAOGA:

1. O Iesu le Tamā alofa.
2. Ia alolofa i tatou i ō tatou tina.
3. O tatou o itu tino o Iesu Keriso.

.....

ASO SA: 16 AOKUSO, 2015.

MATAUPU: O LE TAMĀ LELEI. (The Good Father).

SINI: Ia a'oa'o le vasega ina ia malamalama i tiute ma nafa faa-tamā lelei, e ala i le faalogo ma usita'i.

TUSI FAITAU: 1Samuelu 16: 14 -23

FESOASOANI MO FAIAOGA:

O le ā le tamā lelei? O le tamā o lo o ia te ia le manuia o le aiga i lana ta'ita'iga to'afilemu. Na te faia faata'ita'iga lelei mo lona aiga. E magafagafa i mea lelei. E lava tapena lona mafaufau mo taimi faafuase'i. Na te saunia mea lelei mo lana fanau ina ia ta'uleleia ai e tagata, ma maua ai so latou manuia i le lumana'i.

O le mataupu o Ienei Aso Sa, o le tala ia Saulo le tupu na filifilia e le Atua mo lona nu'u o Isaraelu. Peita'i ua le ō tutusa le futia ma le umele, ua le tutusa lana faatinoga ma le finagalo o le Atua. O le ala lea o le te'a ese ai o le agaga o le Atua ma ia, 'a ua ulufia o ia e le agaga leaga. O le faailoga o le pule esea o lona tagata e agaga leaga. Ua fai o ia ma mea faigaluega a le agaga leaga. Ua le o ia o se tagata o le Atua, a o le tagata a le agaga leaga. O le ala lea o le mo'omia o se vaifofo, mo lona gasegase.

E iloa e ana auaua le foma'i o lona ma'i. O se tagata e potu e ta le kitara, auā o le malie o le taina o le kitara, ma le leo malie o le usu pese, na te aumaia le malosi fou i le tagata ma'i. Auā o le taimi o Saulo, o le vaitau tonu lea o le a'e mai o le atamai i le fa'aaogaina o mea fai faili.

Ua maua le fomai, o le atalii o Iese le Petele'ema, o Tavita lona igoa. O le tagata malosi, potu, e mau upu, e lalelei ma o lo o ia te ia le agaga o le Atua; a o se faatagana e o'o ane ai i le maota o le tupu mo sana fesoasoani. O le ala lea na alu ane ai le ave'a'i ia Iese le tamā o Tavita, ina ia auina ane lona atalii e tusa ma le mana'o o le tupu.

Na talia e Iese le savali a Saulo ua o'o ane, ona ave lea o lona atalii faatasi ma nisi mea. O le asini ma lana avega areto, o le fagupa'u o uaina ma le tama'i oti e ave ia Saulo. Ona alofa tele lea o Saulo ia Tavita i lona taunu'u ane; ua fai foi o ia ma ona so'atau. Faatasi ai ma lona tomai i le faatinoina o lana taleni, ua maua ai le toafilemu o le tupu. Ua o'o ane foi le feau ia Iese e tusa ma le tulaga ua i ai Tavita.

E lua ni ata o le tamā lelei o lo o taoto i le tala lea. Muamua, o le tamā e ola tapena, ona o le alofa i lona atalii. E le'i alu na o Tavita, ae na alu ma lona oso mo Saulo. O le faailoga o le tamā e naunau lona alofa i lana fanau, ina ia ta'uleleia, a o le amanaiaina foi e le tupu ina ia maua ai sona lumanai manuia.

Lua; O le tamā e mamao lana silasila. E le'i tu'ua e le Atua Saulo ina ia fai pea le agasala, a ua vave ona saili se fofo, auā o le a atili ai ona ola le usita'i tagata o lona nu'u.

Le lē usita'i lava lea na liutino tagata ai le Atua e ala ia Iesu Keriso. O le faata'ita'iga sili o le ola usita'i, lea na maua ai lo tatou faaolataga i lona toto na faamaligiina ona o ā tatou agasala.

GALUEGA FAATINO: Talanoaga Lautele

Fai ni vaega se lua. Vaega 1 latou te aumaia ni itu lelei. O le Vaega 2, latou te aumaia ni itu vaivai. Fa'aaogā tagata o lo o ta'ua i le tala. Saulo, Iese, ma Tavita. Tu'u le avanoa e talanoa ai vaega ia e lua mo se lima minute. Tu'u faatasi ma aumai ā latou faaiuga ina ia maua ai se a'oa'oga lelei mo i latou.

AOAOGA:

1. O le faalogo ma usita'i, o le mea sili lea i le Atua.
 2. Ia lava tapena i tatou i taimi uma.
 3. E iloa o i tatou o tagata mataala i aso ma taimi o mea e tutupu faafuase'i.
-

ASO SA: 23 AOKUSO, 2015.

MATAUPU: O LE TAMĀ LEAGA (The wicked father)

SINI: Ia a'oa'o le vasega ina ia malamalama, o le tagata e ola le usitai, o le fouvale ma le finauvale lava lea i le Atua.

TUSI FAITAU: 1Samuelu 15: 13 - 23.

FESOASOANI MO FAIAOGA:

O Tamā o ta'ita'i ia o aiga, o ta'ita'i o nu'u, Ekalesia faapea foi i faigamalo. E faalagolago le manuia po o le malaia o se aiga, se nuu, ekalesia po o se malo i le ta'ita'iga a tamā.

O ia ta'ita'iga, e manuia pe'a fai e faalagolago ma faalogo i le Atua ma lana faasinomaga. O le vaitau lea o le tau faanofu lelei o le nu'u o le Atua, na tāua tele ai ositaulaga. O i latou ia sa fai ma i'u leo o le Atua, a o le faatinoga, o ta'ita'i sa tofia i lena vaitau.

O le mataupu la o lenei Aso Sa, o le finagalo o le Atua na o'o ane ia Samuelu e ta'u ia Saulo le tupu o Isaraelu, e tusa ma le amio leaga o Amaleka ia Isaraelu. O le finagalo o le Atua; '.... ia fasi ia Amaleka, o tane ma fafine, o tama matua atoa ma tama meamea, o povi ma mamoe, o kamela atoa ma asini'. O lona uiga, o le finagalo o le Atua, e mai lava i le tupu e o'o i pepe, atoa ma lona tamaoaiga uma, e leai se mea e toe ai. O le fasiotia uma o tagata faatasi ma lona tamaoaiga, o le faailoga o le faamamaina o le laueleele. Auā o le faatamaiaina uma o tagata ma lona tamaoaiga, o le a tapē ai ma le amio leaga e pei ona faia ia Isaraelu, a o le a motusia ai foi lona gafa i luga o le laueleele.

Peitai o le mea ua tupu, ua le o le finagalo o le Atua a o le loto o Saulo ua faatino ai le poloaiga. Ua latou faasao ia Akako ma mea lelei o le tamaoaiga o Amaleka. O le ala lea o le toe fetalai o le Atua ia Samuelu e tusa ma le mea ua faia e Saulo ma lona nuu ia te ia.

Fai mai le fesili a Samuelu ia Saulo po o le ā le la tagi o mamoe ma povi o lo o ia faalogo i ai? Fai mai Saulo, o mamoe ma povi e sili ona lelei e fai ai taulaga i le Atua; a o mea na totoe ua fa aumatia uma.

E le tutusa le iloa o le tagata ma le silafia o le Atua, sa manatu Saulo o mea lelei ia e osi ai le taulaga i le Atua. A o le silasila a le Atua, o mea le mamā ia, o mea agasala ia. E le osia se taulaga i le Atua i ni mea le mamā. E le sailia mai i se itu taua se mamoe e osi ai le taulaga i le Atua. Ua le maua ea i lona nu'u se mamoe e osi ai le taulaga? Ae a va'ai foi i se isi itu, e le o le taulaga na finagalo i ai le Atua, a o le faalogo ma usita'i.

E sili le faalogo i le taulaga, a o le usita'i e sili i le ga'o o le mamoe po'a. O le tagata e le faalogo ma usita'i i le Atua, o le fouvale lea ma le finauvale i le Atua.

O Iesu o le faata'ita'iga sili o le faalogo ma usita'i, na maua ai e i tatou le faaolataga sili. O lona maliu ma lona toe tu manumalo mai le oti ma le tu'ugamau. Na afio a'e ma nofo ai i le itu taumatau o le Atua le Tamā; o le tau lea o le faalogo ma usita'i.

GALUEGA FAATINO: Taliga Fesili

1. O ai lea tagata o Akako?

Tali: O le tupu o Amaleka.

2. O ai Saulo?

Tali: O le ulua'i tupu na filifilia mo le nu'u o Isaraelu.

3. O le ā le finagalo o le Atua ia Amaleka?

Tali: Ia fasiotia tagata uma atoa ma lona tamaoaiga.

4. O le ā le faamoemoe o Saulo mo manu na latou faasaoina mai?

Tali: E osi ai le taulaga i le Atua.

AOAOGA:

1. O le usita'i i le Atua e manuia ai le lumana'i.
2. O le mata'u i le Atua e le oo mai ai ni puapuaga.

3. Ia fai i tatou ma ave fe'au a le Atua e faataunu'uina lona finagalo.

.....

ASO SA: 30 AOKUSO 2015.

MATAUPU: O LE ALOFA FAATAMĀ O LE ATUA.
(God's Fatherly Love).

SINI: Ia a'oa'o le vasega ina ia malamalama i nafa ma faatinoga a le tamā alofa.

TUSI FAITAU: Salamo 23: 1- 6.

FESOASOANI MO FAIAOGA:

Fai mai nisi popoto o le Tusi Paia, o le 'alofa' sili lea i le tele o alofa. E pei o le alofa faapalepale, alofa le mavae, alofa le faatuaioia, alofa faamaoni ma nisi alofa. E mafua ona o le tamā, o lo o i ai le manuia o le atalii. Pau lea o le alofa o lo o afifi ai alofa uma, ma mausali ai le alofa lea i le atalii, po o le fanau foi.

O le alofa faa-tamā ua fai nei ma mataupu o lenei Aso Sa, o le molimau lea a Tavita i le alofa o le Atua. O Tavita, o le leoleo mamoe. O le ala foi lea o le aumai o le ata o le leoleo mamoe, e faamatala ai le alofa lea faa-tamā. Auā o le galuega faa-leoleo mamoe, e le faigofie. O le mea lava e aga'i i ai mamoe, e alu ai foi le leoleo. E mataalia ma mataala i ni faafiatauli e ono osofa'ia ai le lafu. E maluluina ma ma'alilili faatasi ma mamoe i le po. Na te saili se vao lelei e a'ai ai ma ta'ita'i le lafu e faafeinu.

Fai mai le fai salamo; 'O le Alii o lo'u leoleo mamoe o ia'. O lona uiga o le Atua le leoleo mamoe, a o le fai salamo o le mamoe. O ata va'aia ia ua iloa ai le leoleo mamoe lelei. O le saogalemu ma ola fiafia o mamoe; auā e feta'iāina i le alofa ma le agalelei o le leoleo mamoe. E ave i se nofoaga o lo o i ai se vao mu'a. O le vao fou faatoa togo a'e ma e mamā. O le vao lelei lea i le ai a le mamoe. E ave i se vaitafe e faafeinu ai ma maua ai se malosi fou. Na te faatonutonuina foi mamoe i ala uma

e tusa ma lona finagalo, ina ia ola saogalemu, ina ia maua le manuia ma ola fiafia ai.

Fai mai le faisalamo, o mea uma sa fealua'i ai, o le vanu lava o le ata o le oti. Ae lei fefe ma popole ai auā sa ia mautinoa, o lo o i ai lona leoleo, e puipui ma lavea'i o ia mai fita ma faigata ma mailei a le fili o tau faamata'u mai ia te ia.

O le to'oto'o, o le fesoasoani lea o le leoleo mamoe, o lana au'upega lea e puipui ai mamoe mai i o latou fili. Ua iloa e le mamoe, ua na o se la'au, ae o lo o i ai le ola ma le faamoemoe mo ia i le lumana'i.

Fai mai Tavita, E te laulau mai mea i le la'o'ai ma a'u i luma o ē ita mai ia te a'u. Ua e faau'uina lo'u ulu i le suau'u, ua taumasuasua la'u ipu. O se isi lea tiute faatamā alofa, i le va'ai a Tavita - o le fai ma auauna. O le taumafataga ma ona fili, a o le Atua ua Ia tapenaina lana taumafataga. O mea lelei uma ua faia e le Atua mo ia, ma ua fau ma soloi ai lona tamao'aiga. O le ata o le faeaina ma ua maua faamanuiaga ina ua mulimuli ma faia le finagalo o le Atua. A lelei le va feso'ota'i lea o mamoe ma le leoleo mamoe, e mautinoa le taunu'u i le manuia.

Auā a lelei le leoleo mamoe, e ola fiafia ma manuia mamoe. O le ata foi lea o le tamā lelei i se aiga. E le gata o ia o le leoleo mamoe, a o ia foi o se auauna, na te tapenaina se lumanai manuia mo le fanau. Ina ia manuia i la le tino, le mafaufau ma le agaga, pe'a savavali i tatou le fanau i le amiotonu ma faia lona finagalo. Pe afai foi tatou te usita'i ma faalogo i lona finagalo; ona mulimuli mai ai lea ia te i tatou le alofa ma le agalelei i aso uma o lo tatou ola. Tatou te nonofo foi ma le Alii i lona fale i aso e tele lava.

GALUEGA FAATINO: Taliga Fesili

1. O ai le tamā lelei o lo o tau fa'aata mai i le tala?

Tali: O le Atua.

2. O le ā se aso faapitoa e masani ona tatou va'aia ai tamā ma tina, i le va'aiga lea fa'aauauna i o tatou aiga?

Tali: O le Lotu a Tamaiti.

3. O le ā le fa'aaogaina o le to'oto'o e le leoleo mamoe?

Tali: O le fesoasoani lea o le leoleo mamoe, i le a'e i mauga ma le ifo i vanu. E faatonutonu ai le ala e ui ai mamoe.

4. Aisea ua faatusa ai e Tavita le Atua o le leoleo mamoe?

Tali: Ona o le tele o puapuaga na semanū e faaumatia ai lona ola, ae lei malo ia faafitauli ona o a'ao agalelei o le Atua na ia laveaina

AOAOGA:

1. O Iesu o le leoleo mamoe lelei.
2. Ia tatou usita'i ma faalogo i ō tatou matua.
3. O le alofa faavavau o le Atua.

.....

SETEMA: TALALELEI O LE ALOFA TUNOA.

O le alofa tunoa o le Talalelei o le Talalelei o le alofa tunoa. Aua o Iesu Keriso o le talalelei po o le alofa tunoa o le Atua. Ua fa'aalia i le talalelei o le alofa tunoa le alofa faavavau o le Atua mo lana tagata na fai tainane lana foafoaga aoao. O le alofa e lautele ma lototo e le mafuatia e avanoa mo tagata uma pe a salamō ma faatuatua i le suafa o Iesu.

.....

ASO SA: Aso Sa Talalelei, 6 SETEMA, 2015.

MATAUPU: SUIA E LE TALALELEI (Changed by the Good News)

SINI: Ia a'oa'o le vasega ina ia malamalama, e mafai e le Atua ona suia ō tatou tagata tuai, e fai ma tagata o le Talalelei.

TUSI FAITAU: Galuega 9: 10 - 19.

FESOASOANI MO FAIAOGA:

E le faigofie le faia o se suiga i se mea ua masani ai le soifua ma le ola o se tagata. Auā afai ua masani i le ituaiga olaga sa va'ai ma

mulimulitai ai i totonu o se si'osi'omaga sa ola ma tupu a'e ai, ona mautinoa lea, e umi se taimi e feliuliua'i ai lagona ma manatu, ma va'ava'ai i le talafeagai o lea faiga fou, a o le ā foi sona lumana'i manuia e maua ai. Ae i ai foi nisi suiga e mafai lava ona faia i se taimi vave ona o se mafua'aga talafeagai.

O le mataupu o lenei Aso Sa; 'Suia e le Talalelei'. E le o se suiga sa fuafuaina, auā e pogisa le iloa o le tagata i le aso ma le ituaso o suiga faa-leAtua. E faia e le Atua lana suiga i le mea ua ia silafia ua talafeagai ma le tagata. E le faapito nei suiga na o tagata lelei, pe na o tagata foi Isaraelu, ae sui ona o le agava'a ma le tagata e talafeagai ma le finagalo o le Atua.

O Paulo, sa igoa ia Saulo, o le tagata Iutaia moni lava, ae i ai lona sitiseni Roma aua na fanau o ia i le aai o Taso e i le itumalo o Roma i Asia Ititi e igoa ia Kapatokia, a o nonofo ai ma ona matua Iutaia. O le ala lea na naunau ai i se faatanaga mai ositaulaga, mo se tusi saisai e ave i sunako i Tamaseko, e tapu'e mai ai le au kerisiano ma aumai i Ieruselema e fai ai faasalaga.

O sauaga ia sa taulamua ai Saulo, auā sa tumau ma le faamaoni i lona talitonuga, o le mea moni lea, auā sa ola ma tupu a'e ai, a o lea ua suia e le Atua i le faaolaina o agaga o tagata. O tagata tonu ia e finagalo i ai le Atua; tagata faamaoni ma loto mau. O lana malaga lea na iloa ai le malamalama o le Alii. Le malamalama na faatauasoina ona mata i le sauaina o le au kerisiano. Auā na sau o iloa tagata ae oo i Tamaseko i lona faamoemoe, na ona pupula ae le iloa se tagata.

Ona fa'aali lea o Iesu ia Anania i se fa'aaliga. Fai mai, ia ui atu i le ala o Sa'o ma aga'i atu i le fale o lo o tatalo ai Saulo le tagata Taso. O lo o ia iloa i le fa'aaliga le ulufale atu o Anania ma faae'e ona lima i ona luga.

O se fa'aaliga na le mautonu tele ai Anania, auā e malamalama lelei ia Saulo. O se tagata ua logologoā i le sauaina o le au kerisiano, a o lea ua fetalai manino le Atua, o ia lea o le'a fai ma vaa ma ipu o le talalelei. O ia lea ua filifilia e le Atua, na te momoli lona igoa i nu'u ese, o tupu ma le fanauga uma a Isaraelu. Auā e faailoa e le Atua ia te ia mea uma na tiga ai o ia ona o lona suafa.

Sa loto mau Saulo ia fasiotia le au kerisiano, a o lea ua fai ma faaola o kerisiano; ma momoli lona suafa ia i latou o lo o pogisa pea le va'ai i le faaolataga a Iesu Keriso.

Sa lilo ia Saulo o se taimi lea o le a suia ai lona vaivai i le malosi. Na te le'i iloa e fa'aaogāina o ia e le Atua mo lana talalelei. Ua alu ese atu le pogisa, a ua o'o mai le malamalama. E le'i toe fo'i i tua Saulo, ae ua ola ma tumau ai e pei ona iloa ia Paulo.

GALUEGA FAATINO:

O nai su'esu'ega a Vaega e fa'aalia ai lo latou malamalama ia Saulo e pei ona ta'ua i le tala. Vaelua le vasega; Vaega Tama ma le Vaega Teine, pe faafefilo'i foi.

E mafai ona fa'aaoga fesili o lo o mulimuli mai.

1. Faamatala auilili mai lea tagata o Saulo?
2. O ā ni ona vaivaiga sa i ai a o le'i suia e le tala lelei?
3. O ai lona igoa ua lauiloa ai i le feagaiga fou?
4. Ta'u mai ni tusi o le Tusi Paia sa tusia e lea tagata.

AOAOGA:

1. E leai se mea e faigata i le Atua.
2. Ia avea i tatou ma fanau o le tala lelei a Iesu Keriso.
3. E faia e le Atua suiga lelei i ō tatou olaga.
4. E faatauasoina e le Atua i tatou i tu'inauga leaga.

.....

ASO SA: 13 SETEMA, 2015.

MATAUPU: IA FIAFIA I MEA E VAIVAI AI. (Be glad to boast about your weaknesses).

SINI: Ia a'oa'o le vasega ina ia malamalama, o puapuaga e o'o mai ia i tatou ona o Keriso, o mea vaivai ia ae maua ai lo tatou malosi.

TUSI FAITAU: 11Korinito 12: 5 - 10.

FESOASOANI MO FAIAOGA:

O le isi lea natura i le soifuaga o le tagata; 'O le faavaivai'. O le mea moni, e maua lea aga masani i so o se tagata soifua lava. O le mea foi lea ua le agai ai i luma le soifua tapua'i o tagata, ona ua tele ina faavaivaia i mea vaivai ia e pei ona tā'ua e le aposetolo o Paulo.

O le tatou mataupu i lenei Aso Sa. 'Ia fiafia i mea e vaivai ai'. O se mataupu e faigata ona tatou taliaina gofie faalesoifuaga nei. Auā a fua i mea e vaivai ai i tatou e pei ona tā'ua e le aposetolo, ona iloa ai lea o le faafitauli lea o lo o tupu nei i ō tatou tagata. Fai mai Paulo, o le tau faifai, o le tau faaleaga, o malaia, o le agatele ma le atuatuvaale ona o Keriso; o faafitauli tonu ia o lo o fai ma mea vaivai i le ola o le tagata. O mea ia ua faavaivaia ai le tagata, o lo o faava'atu'ia ai le agai i luma o le soifua auuana ma le ola tapua'i o le tagata.

A o faafiatauli tonu ia ua oo ane ia Paulo, o lo o vavaō ai le ekalesia i Korinito ma ua fesiligia ai le talaiga sa'o, ona o le tele o le mau talaiga ua oo ane i le ekalesia. Peita'i o lea ua fa'aalia manino lagona o le aposetolo, o mea ua ia iloa, na faava'ai ai o ia e le Alii. O faafitauli na la faafeagai; a o le alofa ma le tali mai o le Alii ia te ia.

Le alofa lea ua mafua ai ona mitamita le aposetolo, ua le mitamita ona o ana galuega ua faia, a o le suafa o le Atua na alofa mai ua ia mitamita ai. Fai mai a o tigaina o ia ona o le agelu a Satani, na ia 'ai'oi faatolu atu i le Atua mo se fesoasoani. O le tali a le Atua e faamalosiua ia te ia; "O lo'u nei alofa tunoa e lava lea e fesoasoani ia te oe; auā o le vaivai e fa'aatoaina ai lo'u mana". O le faamalosiua lea ua fai ma mitamitaga o

le aposetolo i mea vaivai o le olaga, ina ia tumau i ona luga le mana o Keriso.

Lea ua ta'u manino le iloa o le aposetolo i lenei mataupu; 'auā pe a ou vaivai, ona ou malosi ai lea'. O se fuaitau tatou te talia gata, auā o lo tatou vaivaiga, o le faavaivai gofie. E tutaia loa se faamoemoe, solomuli loa. So o se mea lelei lava tatou te faia, e i ai lava faitioga, e i ai le au faaleaga. O le tagata ua mausali lona faatuatua i le alofa tunoa o le Atua, e fai mana vaisu ia vaivaiga. Auā o le mea e gata ai lo tatou iloa ma lo tatou malosi, o iina e amata mea ai le Atua.

Auā ina ua vaivai i tatou ona o mailei a le fili, ma ua saga faavaivaia ai i tatou, na afio mai ai Iesu e lavea'i i tatou; ina ia tumau lo tatou ola faatuatua ia te Ia e faavavau.

Uiga o upu & fuaitau:

1. agatele, f.10 - faasauā.
2. atuatuvaile, f.10 - popole.

GALUEGA FAATINO: Fesili ma Tali

1. O le ā le fesoasoani sili o le aposetolo na maua ai lona malosi?

Tali: O le alofa tunoa mai le Atua, ina ua tumau le faatuatua i le Atua.

2. O le ā se iuga o le tagata e mitamita lava ia ia te ia?

Tali: Fai mai Paulo 'a iā i tatou lea mitamita ona o tatou, o tatou lava o tagata valea.

3. O ai tonu e tataua ona mitamita ai i tatou?

Tali: E tataua ona mitamita i latou ona o Iesu Keriso.

AOAOGA:

1. Ia faamalolosi ma finafinau 'aia le faavaivai.
2. O lo tatou vaivai e fa'aatoaina ai le mana o Iesu iā i tatou.
3. Ua na o Iesu e moni lona alofa tunoa iā i tatou.

.....

ASO SA: 20 SETEMA, 2015.

MATAUPU: IA OLA I LE TALALELEI. (Living by the Good News)

SINI: Ia a'oa'o le vasega ina ia malamalama i le olaga o lo o tatou ola ai nei; o le olaga fa'aletalalelei. E tataua i le Kerisiano ona ola ma tumau ai.

TUSI FAITAU: Kalatia 2: 11- 21.

FESOASOANI MO FAIAOGA:

O Kalatia e i le itu i sauté o Asia itiiti. E i ai le talitonuga o tagata sa nonofo ma aumau ai, o ni tagata folau mai Farani i le seneturi lona tolu. Mulimuli ane ua avea ma atunuu e i lalo o le puleaga a Roma, ona o le malosi faafitafita i na ona po. O lona uiga la, e le o se atunuu sa nonofo ma soifua ai ni tagata kerisiano. E le faigofie foi la ona tau faaofi atu le talalelei ia Iesu Keriso, pe a fua i le tulaga ma le mea na fai e Roma i le Alii Faaola.

Peita'i o le faaliga na iloa e Paulo i le ala i Tamaseko, na suia ai o ia e avea ma tagata o le talalelei. O iina na maua ai lona loto tele e tala'i ai le talalelei i nuu ese. Ae a fua foi i le nuu na fanau ai, o Taso, e le mamao ese ma Kalatia. O lona uiga, e tele lava se malosi o lo o ia Paulo e mafai ai ona ia momoli le feau o le talalelei i Kalatia, auā o ia foi o le tagata nuu ese.

O lo o manino ma malamalama lelei le mataupu, 'Ia ola i le talalelei'. O le talalelei ia Iesu Keriso sa na o Iutaia sa ola ma manuia ai, a o lea ua tatala le faitotoa mo nuu ese e ala ia Paulo. O le vaega la lea sa faitauina, o manatu fa'aalia o Paulo ia Peteru ona o nisi o mea ua ia iloa, e tataua ona faaleleia mo le galuega. Auā o mea ia o lo o faava'atuia ai le ola o le talalelei.

O Paulo ma Panapa na tofia mo nuu ese, ae na la iloa ai o a'ai faatasi Kefa ma tagata Anetioka. Ua ia iloa ua latou o mai, ona alu ese ai lea o ia auā ua fefe i tagata Iutaia, ma ua mulimulita'i ai ma nisi o le 'au Iutaia ma ua oo ina a tosina atu ai ma Panapa.

Na mate'ia e Paulo le mea ua tupu, ona ia a'oa'o atu lea e tusa ma le mea ua ia iloa. O le tagata Iutaia, e naunau ia i mea faa-Iutaia, auā e le ni tagata agasala mai nuu ese. E le ta'u amiotonuina se tagata i galuega o le tulafono, a o le faatuatua ia Iesu Keriso. O i latou uma ua fia ta'uamiotonuina ia Keriso, o tagata agasala ia.

O lo o manino lelei le gagana a le aposetolo. Fai mai o ia, e le mafai ona toe atia'e i mea ua ia lepetia. Auā o ia, na oti ona o le tulafono ina ia ola i la le Atua. Sa faasatauroina faatasi i laua ma Keriso; ua le o toe ola la o ia i le olaga tuai, ua le o toe fiafia i le agasala, auā ua ola Keriso i totonu ia te ia.

Lea ua ta'utino e le aposetolo le le toe fia oo i le olaga sa i ai muamua. Fai mai ā ia, o le ola foi ua ia ola ai nei i le tino, o le a ola ai lava i le faatuatua i le Alo o le Atua.

O lagona o le tagata ua mausali lona faamoemoe, ua na o le talalelei ia Iesu Keriso o lo o i ai le alofa tunoa o le Atua. Le alofa lea ua tulaga tutusa ai le Iutaia ma le tagata 'ese. Ta'atia ia le tulafono, auā e lei ta'uamiotonuina ai se tagata i lea tulafono; a o le alofa tunoa o le Atua na ia maua ai le ta'uamiotonuina, auā ana oo mai le amiotonu ona o le tulafono, o lona uiga, e leai se aogā o le maliu o Keriso. O i latou uma ua ta'uamiotonuina ona o lea alofa tunoa e ala ia Keriso, e tataua ona ola ma tumau ai e oo i le faavavau.

Uiga o upu:

1. peritomeina, f.12 - faamamaina faaletino.
2. faanu'uese, f.14 - amio e ese mai ia Iutaia ma Isaraelu.
3. ta'uamiotonuina, f.16 - amio sa'o, ua alu ese mai le agasala.

GALUEGA FAATINO: Taliga Fesili

1. O le ā tonu le finagalo o Paulo i le auala e ta'uamiotonuina ai le tagata?

Tali: O le faatuatua ia Iesu Keriso.

2. Aisea i le manatu o Paulo e lē ta'uamiotonuina ai se tagata i le galuega o le tulafono?

Tali: Auā o tulafono ia na faia e lima taitaina ai tagata, ina ia o ese ma le talitounuga faa-kerisiano

3. O le ā le amio faa-Iutaia lea e tā'ua e Paulo.

Tali: O le faakerisiano, o le ola i le talalelei ia Iesu Keriso??.

4. O ā mea ia na lepetia e Paulo?

Tali: O le tulafono a tagata nu'u ese??.

AOAOGA:

1. E le lelei le ola femoumoua'i.
2. Ia tumau i lou Ola Faatuatua.
3. Ia avea o tatou talavou ma tagata moni o le talalelei.

.....

ASO SA:

27 SETEMA, 2015.

MATAUPU:

IA TE OE LE MANATU SA IĀ KERISO

(Have the mind that had in Christ Jesus).

SINI:

Ia a'oa'o le vasega ina ia malamalama, o talavou kerisiano e tataua ona ola ma tumau i le finagalo o lo tatou Alii o Iesu Keriso.

TUSI FAITAU:

Filipi 2: 5-11.

FESOASOANI MO FAIAOGA:

O le ulua'i ekalesia lea i le atu Europa na faatuina i le taimi o le malaga lona lua a Paulo; na latou uia ai Filipi. A o i ai o ia i le Falepuipui i Roma, na ia mauaina ai se meaalofa mai i le au kerisiano i Filipi. O le ala lea na tusia ai le tusi lenei; o se tusi faafetai i le ekalesia ona o le galuega alofa a le Atua ua mafai ona faasoa atu i le 'au kerisiano o lo o i Filipi, faatasi ai ma lana tatalo, ina ia tupu ma ola lea alofa i loto ma agaga o tagata.

O le mataupu 'Ia ia te oe le manatu sa ia Keriso', o lo o faatatau i le au kerisiano o lo o i Filipi, ina ia tumau i le loto gatasitasi ma le loto maulalo. O le manatu o le aposetolo, e tupu ma ola le ekalesia a Keriso i Filipi pe'a maopopo loto o tagata ma galulue faatsi. Ia fetalitounua'i

lagona ma manatu. Ia ola felagolagoma'i ma fealolofaa'i. 'Aua ne i faasili e le tagata ia lava i lo le isi uso a tagata. A ia ola ma le mautinoa, o lo o manatu faatasi outou ma Keriso.

Faapei ona alofa mai o Iesu iā i tatou, o le liutino tagata o le Atua le Tamā. Peitai, na matuā faigata lava ona talitonuina e tagata, o ia o le alo o le Atua, pe'a fua i lona fanau mai i se auala maualalo ma le faatauva'a. 'A fua foi i ana fetalaiga ma ana faatinoga, ua manatu ai nisi, e na o le Atua e mafai ona faia mea ia; e le mafaia e se tagata ona faamalolo ma faola se isi tagata. Peita'i o le va'ai a le aposetolo, e le'i manatu Iesu e tulaga tutusa o ia ma le Atua. O lona i ai i le lalolagi, o ia o le auauna, na sau e faataunu'u le finagalo o lona Tamā. O le ala lea o le sasa'a atu e ia, ia lava ina ia fai mona le uiga o le pologa.

O le pologa, o le faalupega lea o le auauna; na iloa i le taimi o Iesu. Na oo i le satauro ma le tu'ugamau. O ata ia ua fe'ese'esea'i ai manatu ma lagona o tagata. Peita'i o le pologa na afio mai ma le faaolataga. O le faaolataga e tutusa ai tagata uma. O le mea lea na matuā fa'aeaina ai o ia e le Atua, ma foa'iina atu ai ia te ia o le suafa e silisili i suafa uma lava, ina ia to'otuli o tulivae uma lava i le suafa o Iesu, o ē oi le lagi, ma ē o i le lalolagi, ma ē o i lalo o le lalolagi; ma ia ta'uta'u atu e laulaufaiva uma lava o Iesu Keriso o le Alii lava ia, ia i'u ai le vi'iga o le Atua le Tamā.

O va'aiga ia ua inosia ma sauaina ai le au kerisiano. Peita'i o le loto gatasitasi e tusa ma le finagalo o Iesu, e fai ai mo outou lea pologa. O le manatu o le aposetolo, ia tumau outou i ē outou manatu, faapei ona anaana outou e le aunoa ona o le galueaina o lo outou faaolataga. Auā o le Atua o lo o galue i totonu ia te outou, ina ia outou loto i mea e finagalo malie i ai o Ia, ma ia outou galulue ai.

GALUEGA FAATINO: Taliga Fesili

1. O le ā le manatu o Paulo i le ola galulue faatasi o tagata?

Tali: O le ola galulue faatasi e maua ai le loto tele e fai mo latou le uiga o le pologa, e pei ona faia e Iesu Keriso.

2. O le ā le manatu o le aposetolo i le tulaga Atua o le alii o Iesu?

Tali: E lei finagalo Iesu e faatutusa o ia ma le Atua; 'a ua manatu o Ia, o Ia lava o le auauna a lona Tamā.

3. O le ā le tau i o le tagata e manatu faatasi ma Iesu Keriso?

Tali: E maua e ia le faaolataga.

AOAOGA:

1. 'Aua le manatu faapito.
2. Ia tatou mulimuli i ala o Iesu Keriso.
3. O ā ta fa'atinoga lelei e maua ai se vi'iga o le Atua le Tama

.....

OKETOPA: O Ē Ō LE MALO O LE LAGI

(Those who belong to the Kingdom of God).

O le malo o le lagi, o le malo ua uma ona saunia e le Atua mo ona tagata faatuatua ma talitonu i le Faaolataga ia Iesu Keriso. Le malo lea o lo o tausiniō uma i ai le au faatuatua, o ē faia le finagalo o le Atua i le lalolagi. Le malo e le toe i ai se tiga po o se pologa, ae na o le olioli loloto o lo o i tua atu o puapuaga. A o le tau lea e maua e le tagata i ana galuega lelei sa tautigā ai i le lalolagi, le tagata na molimau i le Talalelei o le Faaolataga. O lona uiga o le malo lea, o lo o nonofo ai tagata sa tautigā i le Talalelei, ua o'ofu i ofu sisina, ma latou siosiomia le nofoali'i mamalu o le Atua. Le malo lea ua uma ona saunia e le Atua mo i tatou o tagata faatuatua ma talitonu i lona malo e faavavau.

.....

ASO SA: 11 OKETOPA, 2015 (Tala Lotu Tamaiti)

MATAUPU : TALA O LE LOTU TAMAITI.

SINI : E tatau ona lelei le faatinoga e le vasega o le tala mo le latou Aso Sa. Ina ia lelei se feau e maua mai le tala faatasi ai ma ni a'oa'oga tāua.

TUSI FAITAU: 1Samuelu 16: 1 – 15.

FESOASOANI MO FAIAOGA.

O le mataupu lenei e 16 o le Tusi muamua o Samuelu, o lo o faamatalaina ai le filifilia e le Atua o Tavita e fai ma tupu o Isaraelu. Ua aumai lenei tala, ona o le isi lenei o vaega tāua e ao ona silafia e le fanau i lo latou olaga tuputupu a’e, o le tāua o tofiga mai le Atua, auā e le tutusa o tatou manatu ma le finagalo Paia o le Atua. Peitai o le aotelega o lenei tala, o le tāua o le filifiliina o tatou e le Atua e ala i lana galuega. O le filifiliga fai a le Atua, e ala i lona silasila i totonu o le loto o le tagata, e le silasila le Atua i le tino malosi po o le maualuga, e le pei o le va’ai a le tagata, auā po o le a le tino laititi ma faatauva’a i le va’ai a tagata, a o le loto e silafia lelei ai e le Atua le tagata e agava’a ma talafeagai ma lona finagalo, le tagata ua utufia e lona Agaga e mafaia ai so o se mea, le tagata ua tafatasi lona loto atu i le finagalo o le Atua.

E lelei pe a fa’aaogā uma le vasega i le faatinoga o le tala, ae tāua le faitau pea i le mataupu e fesoasoani atili ai ma aumai ai se malamalama’aga i lau susuga i le faiaoga i le faagasologa o le tala. O lona uiga o le tala ia Iese ma lana fanau, na fetalai le Atua ia Samuelu e tula’i, faatumu lana fagu nifo i le suau’u ma alu ia Iese le Petele’ema, o lo o i ai lona atali’i ua filifilia e le Atua e fai ma tupu o Isaraelu. Ina ua taunu’u Samuelu ia Iese, na ia faapaia loa faatasi ma lana fanau ma osi loa le taulaga i luma o le Atua. Na mae’a le taulaga, ona fai atu lea o Samuelu ia Iese e gasolo mai ona atali’i, na muamua mai Eliapo soso’o mai Apinatapa, soso’o mai ai ma Sama, e le’i filifilia e le Atua, ona o mai ai lea o tama na totoe e toa fitu, e le’i filifilia lava e le Atua, ona fesili lea o Samuelu po ua uma mai taulelea, ae fai mai Iese toe o le ui’i, o lo o leoleo le lafu mamoe. O lea na a’ami ai loa le ui’i; ina ua taunu’u mai Tavita, ona fetalai atu lea o le Atua ia Samuelu ina tulai ia ma faau’u i le tama, auā o ia lava lena ua filifilia e le Atua. O le feau tāua, po o ā lava tofi ua vala’auina ai tatou, ia tatou galulue ma le faamaoni, auā o tatou na filifilia e le Atua, o tofi uma mai le Atua, e ao fo’i ona tatou matuā galulue ma le faamaoni auā o tatou na tofie e le Atua.

.....

ASO SA:

25 OKETOPA, 2015

MATAUPU :

O FANAU O LE TOFI MAI LE ALI’I
(Children are heritage from the Lord).

SINI:

Ia aoao le vasega ina ia malamalama, o latou, o le tofi mai le Ali’i.

TUSI FAITAU :

Salamo 127 : 3 – 5, Mataio 19 :13 – 15.

FESOASOANI MO FAIAOGA.

O le Salamo lea na faitauina, e tusa ai ma le molimau a le au su’esu’e o le Tusi Paia, o salamo ma faataoto a le poto o Solomona, o lo o faamatala ai le alofa silisili ese o le Atua, ma lana pule aoao i mea uma o le lalolagi. O le tāua o fanau e pei ona aumai e le manatu autu, o le *tofi* ma le *taui* mai le Atua. O lona uiga o le *tofi*, o se suli (atali’i) na te fa’auauina gafa o aiga, nu’u ma le Ekalesia i le lumanai. O sui momo’e ia o matua, latou te faailoa atu le ata o matua i le lalolagi, pe a fai e ola ma aoaina lelei e matua i latou i le Talalelei. O le tofi (*fanau*) e faaeaea i matua, e le faatauvala matua i luma o tagata ma e ita mai. O le *taui*, o se faamanuiaga e maua e le tagata i ana galuega lelei na ia faia, lea ua taui mai le lagi e ala i fanau ua latou maua, o meaalofo foai mai e le Atua i matua, ina ia latou tausia lelei ma aoao i le Tusi Paia, e pei o upu a le Poto, a’oa’o le tama e tusa ma ona ala, auā a o’o ina matua e le toe te’a ese ai lava. Lea ua faatusaina e le fai Salamo fanau o lo o tā’ua i le fuaiupu e fa ma le lima, e pei o ū fanafana i le lima o le toa. O ū fanafana, o mea tau a le Isaraelu e tau ai le taua, o lima o le tagata tau e feagai pea ma ana ū i taimi uma, o mea tau e faamemelo ma aputiputi ai le tagata tau ma tua i ai, o lona malosiaga lea e faamoemoe i ai i taimi o le taua, auā o mea tau o i ai le ola o le tagata tau mai le osofaia e ona fili. E solosolo ma faai’ila i taimi uma, ina ia tumau pea lona matagofie. A o’o la ina fana atu le ū, e manatu le tagata tau, ia ‘aua lava nei fo’i fua, ‘a ia maua se ‘ai. E faapena se ata ua faatusa i ai e le fai salamo ia fanau, o ū fanafana i le lima o le toa e fana atu ma faalelea atu i le lalolagi, o ū ua uma ona tapenaina mo le galuega. E fana ma

faalele atu i le lalolagi atoa e momoli le finagalo o le Atua i nisi tagata, ina ua uma ona tapenaina e matua e ala i aoaoga faa-Kerisiano, auā o fanau o le tau mai le Atua, o le manuia o aiga, nu'u ma le Ekalesia i le lumanai.

Lea fo'i e manino i le Evagelia a Mataio na faitauina, ina ua fetalai Iesu, *Ina tu'u mai ia o tamaiti e o mai ia te a'u, 'aua le vaoia i latou, aua e faapei o i latou nei e o le malo o le lagi.* O tusitusiga a Mataio, o tusitusiga o lo o faailoa mai ai le tulaga Mesia o le Ali'i o Iesu, peitai o le tala lava ia a Mataio, lea ua faatusa i fanau le malo o le Atua. O fanau e mamā lava o latou mafaufau e leai se mea leaga latou te fai, e pei o pepe faato'a fananau mai e leiloa ni mea leaga. Lea ua faatusa i ai e le tusitala, auā 'a le liua i tatou faapei o fanau e mamā o latou loto, e le sao lava i le malo o le lagi. O lona uiga e faapena ituaiga tagata e o latou le malo le lagi. E pei ona fetalai Iesu i lana lauga fa'aamuia i luga o le mauga, *'amuia e loto mamā, auā latou te iloa atu le Atua'*. Le faailoga lena e iloa ai le tāua o mea nei o fanau, o le tofi mai le Atua e ao ona a'oa'o ma tapenaina o latou olaga faa-Kerisiano, ina ia manuia o latou olaga i le lumanai, ma avea latou ma fanau e fiafia i ai Iesu.

Uiga o upu mai fuaitau.

1. Tofi - o se sulii (atali'i) ua fanau mai.
2. Tau - faamanuiaga ua maua mai se galuega.
3. ū fanafana - mea tau e fa'aaoga i le taua.
4. vaoia - taofi / musu e ave.

GALUEGA FAATINO: Fesili ma Tali.

1. O le ā le faaupuga o lo o tā'ua i le tala o lo o faatusa i ai fanau?
Tali : O fanau o le ū fanafana i le lima o le toa.

2. O le ā le tau mai le Atua, o lo o tā'ua i le tala?
Tali : O fanau, o le tau mai lea mai le Atua o lo o tā'ua i le tala.

3. O le ā le fetalai a Iesu na fai i ona so'o, ina ua latou vavao le fanau e aumai ia Iesu?

Tali : Ina tu'u mai ia o tamaiti e o mai ia te a'u, 'aua le vaoia i latou, auā e faapei o i latou nei e o le malo o le lagi.

PESE: Pese ma Vi'iga – 180.

A'OA'OGA:

1. Ia ola i le amio lelei i aso uma.
2. Fiafia e ola i le Talalelei ia Iesu Keriso.
3. Ia avea i tatou ma fanau e manuia ai aiga, nu'u ma le Ekalesia.
4. Ia atagia i lau amio a'oa'oga ma faasinoga lelei a matua.

NOVEMA: LOTO FUATIAIFO (Free will).

O le loto fuatiaifo, o le loto malie atoatoa i se mea ua e manatu e fai mo le lelei o se isi tagata. O se lagona e mapuna a'e i totonu o lou loto, ma ua faaosofia ai lou manatu e fai se galuega lelei mo se tasi o fia maua se fesoasoani. O lona uiga, o se lagona lelei e tupu ifo i lou mafaufau, o le musumusuga lena a le Agaga Paia i totonu o lou loto ma faaosofia ai ou lagona e foa'i mea sili mo le Atua, e ala i lau tautua i le Ekalesia.

ASO SA: 1 NOVEMA, 2015

MATAUPU: FOA'I MA LE LOTO (Giving with heart).

SINI: Ia a'oa'o le vasega ina ia malamalama, o le foa'i o le galuega e fai i le loto fuatiaifo e lelei. O le foa'i e fai i le loto mama, ma ua faamalieina.

TUSI FAITAU: II Korinito 8:1 – 7.

FESOASOANI MO FAIAOGA:

O le foai ma le loto, o se faatinoga e faavae i le loto fuatiaifo e lelei, ina ua utufia i tatou e le mana o le Agaga Paia, lea e mafua ai ona tupu

le lagona o le fia foa'i. O le uiga lea o le mataupu o lo o tusi atu ai le aposetolo o Paulo i lana tusi e lua i le Ekalesia i Korinito. O le toe faamanatu a le aposetolo, o le foa'i o le isi lea meaalofa mai le Atua. Manatua fo'i o le ekalesia i Korinito e malosi tele le fevaevaea'i o tagata ona o le tele o le mau talaiga eseese o lo o i ai. Auā o le nofoaga lea o le fetaulaiga o tagata faimalaga mai isi nu'u, ma fesuia'i ai va'a e faimalaga ai agai nu'u tuaoi, ma le agai atu i Asia itiiti. O lona uiga o Korinito o le taulaga e taunu'u uma i ai va'a, ma e mautinoa le tele o le mau filosofia ma tagata eseese o lo o taunu'u i lea nofoaga.

Lea la o lo o tusi atu ai le aposetolo i le au uso kerisiano o lo o i Korinito e faamanatu i ai le mataupu o le foa'i ma le loto, o le faatuatua, o le poto e tautala i upu ma le filigā, ma ia tumau i a'oa'oga faa-kerisiano e pei ona a'oa'oina muamua e Paulo. A o le faamalosi foi lea i le uso ia Tito o lo o feagai ma le galuega i Korinito, ina ia fa'aaauu pea a'oa'oga i le ekalesia o le faailoa lea i ai o meaalofa mai le Atua o le foai ma le loto malie. E pei o le foai sili na faia e le Atua i le lalolagi e ala i lona Alo pele na maliu ma toe soifua mai le tu'ugamau ma le oti ina ia ola ma magalo le lalolagi agasala. O se faamanatu tāua foi lenei mo le fanau, ia a'oa'oina ia iloa ona ola foai ma le loto malie, e pei o sene ua ofoina mai e fai ma taulaga mo le Aoga Aso Sa, o lana foai lava lea i luma o le Atua, ae ia foai ma le loto malie auā o le meaalofa lea mai le Atua ia tatou fiafia e faataunu'u e pei o lana foai sili na ia faia mo i tatou e ala ia Iesu Keriso.

GALUEGA FAATINO: Taliga Fesili.

1. Aisea e tāua ai le ola foa'i?
Tali. E tāua le ola foai auā o meaalofa ia mai le Atua ia tatou iloa ona ola foai ma le loto malie.
2. O le ā se foai na faia e le Atua mo le lalolagi?
Tali. O le foai na faia e le Atua mo le lalolagi o lona Alo pele o Iesu Keriso ua fai ma togiola mo i tatou o tagata agasala.
3. O le ā le feau a Paulo o lo o faamanatu i le Ekalesia i Korinito?
Tali. O le faamanatu a Paulo i le Ekalesia ia tumau i le le ola foai ma le faatuatua i le Atua.

PESE: Pese ma Vi'iga – 157.

AOAOGA.

1. Fiafia e ola foai ma le loto atoa.
 2. E manuia lē foai i lo le na te talia.
-

ASO SA: 8 NOVEMA, 2015.

MATAUPU: O LE ATUA O LE ALOFA LAVA IA
(God is love himself).

SINI: Ia a'oa'o le vasega ina ia malamalama - o le alofa o le Atua e le mavae i ai tatou i Aso uma, e telegese lona to'asa ae tele lona alofa mai i lo tatou ola.

TUSI FAITAU: Ioane 3:16.

FESOASOANI MO FAIAOGA:

E le tau faamatalaina le alofa o le Atua aua ua leai lava se vaega o le soifua ma le ola o le tagata e le o fa'aalia ai le agalelei ma le alofa tausi o le Atua. Lea lava o lo'o tatou molimauina le anoanoa'i o lona sosia ma lona tamaoaiga i aso uma, ae le gata i lea o le malosi faafouina i lea aso ma lea aso, a o le ala fa'i mai i taeao taitasi i le manuia i lana tausiga alofa ia i tatou. O le alofa e tumau pea e le mafai ona liliu, e telegese lona to'asa, ae tumau pea lona alofa i lana tagata na fai. Lea lava ua fa'aalia lona alofa tele ia i tatou ona o le faaolataga na ia saunia e ala ia Iesu Keriso, o lona toto na faamaligiina, a o le ata va'aia lea ua toe faatauina tatou i lea lava toto, o le atoaga o lona alofa tunoa ina ia faamamāina i tatou mai agasala ua tatou faia.

E manino lava le mataupu e pei ona faitauina, auā o lea ua faailoa e Iesu le alofa lavea'i o le Atua i le lalolagi e pei ona tā'ua i ana a'oa'oga. O le ala fo'i lea o le Afio mai o Iesu ma ua militino faatasi ma le lalolagi ina

ia utufia le tagata i le finagalo o le Atua. A o le ā se tatou tali atu i le alofa mai o le Atua? E ao ona tali atu le tagata e ala i le ola faatuatua ma talitonu i le Atua ma faia lona finagalo e pei ona a’oa’o mai le Ali’i o Iesu. Talitonu i le Atua e ala i le ola mata’u ia te ia, alofa i lou tuao’i, faamagalo atu i ē agaleaga mai, o iina e iloa ai le tagata ua toe fanaufouina e pei ona a’oa’o atu ai Iesu ia Nikotemo. A o le tatou tali atu lea i le alofa mai o le Atua e pei o le manatu autu, *Aua ua fa’apea lava ona alofa mai o le Atua i le lalolagi, ua ia aumai ai lona atali’i e to’atasi, ina ia le fano se tasi e faatuatua ia te ia, a ia maua e ia le ola faavavau.* O le alofa lea o le Atua na fa’aatoatoa i luga o le satauro ina ua maliu Iesu mo le laveaina o le lalolagi agasala. O lona maliu ma lona toe tu manumalo mai le oti ma le tu’ugamau, o le faailoga lea o le alofa mai o le Atua ia te oe ma a’u o tagata agasala. Lea ua faatauina i tatou i lona toto na faamaligiina, ma ua toe maua ai lo ta avanoa i le mafutaga faatasi ma le Atua i lona malo ua uma ona saunia mo tagata faatuatua ma talitonu i lona suafa. O lona uiga e le avea le alofa mai o le Atua iā i tatou i aso uma ma ala e manatu ai le tagata tusa lava pe tatou te faia le agasala, e le popole auā o lo o alofa mai pea le Atua, leai. Ae ao ona tatou tali atu i le alofa tele, e ala i le tausi i ana poloaiga, usita’i ma faalogo i le a’oa’o mai a matua, o faiaoga, o le faifeau ma toaga i le Aoga Aso Sa ma le autalavou, toaga i le lotu i Aso Sa uma, o mea uma ia tatou te tali atu ai i le alofa mai o le Atua iā i tatou, ona avea lea o tatou ma fanau e fiafia mai i ai le Atua.

GALUEGA FAATINO : Tusiga solo.

Tu’u le avanoa i tamaiti e tusi mai ai ni ā latou solo e faamatala mai ai le alofa o le Atua iā i tatou. Ia lua palakalafa o le solo, ae ta’i ono fuaiupu o le palakalafa. Ia iloa ai e lau susuga i le faiaoga o lo o malamalama le fanau i le mataupu, ma ia faailoa mai ō latou fo’i mafaufauga i le faamatalaina o le alofa o le Atua.

Uiga o upu & fuitau

1. Fano: Faia’ina / Pau atu i le agasala.
2. Ola faavavau: Soifua matua / soifua ua umi aso.

PESE : Le alofa o le Atua e ofoofogia.

AOAOGA.

1. Ia tatou iloa le alofa mai o le Atua iā i tatou.
2. Fai sau galuega lelei e tali atu ai i le alofa mai o le Atua.
3. ‘Aua le poto e tali le alofa mai, ae leiloa ona toe agalelei atu.

ASO SA: 15 NOVEMA 2015.

MATAUPU: IA FAATUATUA MA ALOFA
(Have faith with love).

SINI: Ia aoao le vasega ina ia malamalama i le uiga o le faatuatua ma alofa

TUSI FAITAU: 1Samuelu 24: 8 – 15.

FESOASOANI MO FAIAOGA:

E malamalama gofie lava le tala lea sa faitauina, ina ua taulamalama Saulo e fia fasioti ia Tavita. Peitai o le feau tāua lava o lo o momoli mai i lenei tala, o le faatuatua ma alofa o le tagata ua talitonu, e faaeaina e le Atua i le lumana’i. Fai mai ina ua ta’u atu e le au tau a Saulo, o lo o i ai Tavita i totonu o le ana, sa tofia loa e Saulo lana au tau e tolu afe e saili ia Tavita ina ia fasiotia. O le va’aiga i le ana e pei ona tā’ua, o le muli ana o lo o toluapi ai Tavita ma lana au tau, a o le faitoto’a o le ana lea ua ulufale atu ai Saulo ma lana au tau e tolu afe, ma o latou vae e ufiufi, o le uiga na kava pe ufiufi o latou vae i ni ie ina ia ‘aua ne’i pa’o i luga o ma’a i le auala o lo o savavali ai. Peitai na momoe gapepe Saulo ma lana au tau, ae maua ai loa ma le avanoa a Tavita e fasioti ai Saulo, peita’i na o le pito ofu o Saulo na sesele e Tavita, auā ua musu Tavita e fasioti ia Saulo. Fai mai Tavita e le mafai ona faao’o lo’u lima i le tagata ua faau’uina e le Atua. O le lagona o le tagata ua moni lona faatuatua e faia e le Atua mea silisili mo ia, a o le lagona alofa e

mapuna a'e i le loto e tupu ai le filemu e 'aua ai ne'i o'o lona lima i le tagata ua faau'uina e le Atua.

Ua a'oa'o mai lenei tala e faamanatu mo tatou o tupulaga talavou ina ia avea ma mea suamalie lo tatou olaina o le faatuatua ma alofa i le Atua, po o ā lava faigata e fetiaia'i ma i tatou i lenei olaga, ia mau pea le to'ovae ma faatuatua i le Atua, auā o ia lava e saunia mea silisili mo i tatou. 'Aua tatou te faufau leaga i ō tatou uso a tagata, po o ē matutua atu iā i tatou, 'aua fo'i tatou te faifai upu i faiaoga po o faifeau, auā o latou ia ua faau'uina e le Atua e tala'i lona finagalo i le lalolagi atoa faapea fo'i ma tatou. 'A ia tatou maua le loto maualalo tatou te faatuatua ai ma alofa ma le faamaoni i le Atua.

GALUEGA FAATINO:

Faatino e le vasega le tala ia Tavita ma Saulo, tofi na tamaiti se to'alua, o Tavita le isi, a o Saulo le isi. A o isi tamaiti o le vasega, ia vaelua tutusa e fai ma ō la 'au tau, ona vala'au mai lea o Tavita ia Saulo e pei ona faamatalaina i le tala, ae faapena fo'i ona tali atu Saulo ia Tavita. E manaia lea ina ia 'aua ne'i toe galo i mafaufau o le fanau ae ia manatua pea se ia o'o ina avea latou ma tagata matutua.

PESE: Pese ma Vi'iga - 73

A'OA'OGA

1. Tumau lou faatuatua i le Atua.
2. Alofa i lou tuaoi e pei o oe lava ia te oe.
3. Ia maua le loto faamagalo i ē ita mai

.....

ASO SA: 22 NOVEMA, 2015.

MATAUPU: MATIVA AE MATAMAU.
(Poor but generous)

SINI : Ia a'oa'o le vasega ina ia latou malamalama i le tagata e ola mativa, ae fiafia e lima foa'i.

TUSI FAITAU: 2Korinito 9:1 - 15

FESOASOANI MO FAIAOGA:

O le mataupu lea na faitauina, o lo o faamalamalama ai e le aposetolo i tagata o le Ekalesia i Korinito le uiga moni o le ola foa'i mo le Atua. Auā o le ola foa'i, o le isi lea meaalofa mai le Atua ia iloa e tagata ona faatino i lona olaga faa-kerisiano, o le foa'i ma le loto malie e pei ona mua'i faia e le Atua e ala ia Iesu Keriso le faaolataga mo le lalolagi atoa. Lea ua sauni le aposetolo e toe fo'i i Ierusalema ma ua manatu ai e tatau ona ave ni fua o le galuega mo tagata matitiva o lo o nonofo i Ierusalema. Lea ua tupu ma ola le Ekalesia i Korinito, le ekalesia na tau atia'e e le aposetolo, ina ia malosi lo latou ola faaleagaga. A o lana tu'u mumusu atu lea i le ekalesia, i le mataupu o le ola foai. Manatua o Ierusalema o le ogatotonugalemu lea o le tapuaiga faalutaia, o lo o i ai le malumalu o le Atua. Lea la ua manatu le aposetolo o Paulo, e tatau ona alu ma ni fua o le galuega e ala i le latou foai mo tagata matitiva, ma e faamoemoe e ui atu i Maketonia ma aga'i i Ierusalema, auā o lea o lo o taumate lona toe fo'i ane i le ekalesia. Le ala lea o le faamanatu a le aposetolo i le Ekalesia i le latou foa'i ia lelei ma atoatoa. Auā o le molimau ola lea o le galuega, e faailoa atu ai i le au uso uma i Maketonia, lea na mitamita ai Paulo, ma Ierusalema fo'i, o lo o matuā malosi pea le ola faaleagaga i le Ekalesia. Le molimau ola e iloa ai le alualu i luma o le loto foa'i o tagata ma lo latou faatuatua ia Iesu Keriso. Le uiga lea o le fuaiupu e 5, *O le mea lea na ou manatu ai e tatau ona ou aioi atu i le au uso, ia tapena ni a latou meaalofa, e pei ona faia muamua, ae le pei o se mea na tupu i le matapeapea.*

O le ā le uiga? O le meaalofo ia tapena ma le loto ua faamalieina, ae le o le matapeapea e foai ma le faalotolotolua, ona o le sosia ua latou maua, peitai o lea ua maualuga le tamaoaiga ua latou maua, ae ua lualuagia faatasi ma le matape'ape'a, ua tupu ai le lagona o le faalotolotolua e foai. Lea la ua manatu Paulo, se'i matuā faailoa i le ekalesia, le uiga moni o le ola foai e faia ma le loto malie, auā o lea ua sapi i manuia o le Atua, ae ua tupu faatasi ane ai ma le lagona o le va'ai maualalo i uso matitiva. Ua faalotolotolua nisi, ua fai filifiliga a nisi pe ave uma, o nisi ua faatauau, auā ua lualuagia faatasi ma lagona o le matape'ape'a, ona o lea ua sapi i manuia o le Atua. A o manuia na tu'utu'u lima mai e le Atua ina ia tupu le lagona alofa e foa'i ai mo nai tagata vaivai ma faatauva'a i le va'ai. Lea ua galo taimi o le mativa ae matamau, ua moni ai le muagagana a le atunu'u. Le uiga lea o le fuaiupu e fitu, *Ia taitoatasi ma foai e pei ona filifili i lona loto; aua ma le tiga, aua fo'i ma le faatauauina, auā e alofa le Atua i ē foai ma le loto malie.* Manino ā le faamanatu a Paulo, a tiga le loto 'aua le foai, Korinito e, e le tauanuina lau foai, ae a tatala lou loto, ona taitasi lea ma filifili ma le loto malie, e faatino ai le auaunaga. Le loto ua tatala i le musumusuga a le Agaga o le Atua, e mafai ona iloa atu ai nisi uso o fia maua le fesoasoani, a o le Agaga e faamaiteina le tagata, ia tupu le lagona foa'i ma le loto talitonu, *aua e mafaia fo'i e le Atua, ona faafaulai ia te outou o meaalofo uma.*

Manatu o Paulo, lea ua outou maua manuia o le Atua, lea ua faasalalauina mai, ma e ao fo'i ona foa'i atu ma le loto fuatia ifo e lelei, auā e toe faatutumuina e le Atua ma faaopoopo atili mai ona manuia. O le tāua lea o le tatala o le loto, e le tau faatonuina ai lau foa'i e fai, a o le tatala o le loto e iloa atu ai le mafatia o isi tagata, o lo o fia maua le fesoasoani, o le uiga lea o le manatu a le aposetolo. Ma ua aumai ai se a'oa'oga mo tatou ina ia tupu pea le loto fia foai mo isi tagata o fia maua le fesoasoani, ae le o le musu e foai ona o le matape'ape'a auā ua tele mea ua tatou maua, ma ua faapogisa ai la tatou va'ai atu i manuia e maua e le tagata e fiafia e foai ma le loto malie. O lona uiga 'aua tatou te mumusu e foai manuia ua tatou maua, auā o meaalofo uma a le Atua ua foai mai mo tatou, e ao foi ona tatou fiafia e foai ma faasoa atu mo nisi tagata vaivai.

GALUEGA FAATINO: Finauga (debate).

Vaelua le vasega i vaega se lua, ona fai lea o se faafinauga o le vaega muamua o latou o tagata e fiafia e foa'i. Ia fa'aali mai o latou lagona i le taua o le foa'i ma le loto fiafia e aoga e tatala mai ai o latou lagona ma manatu o lo'o i ai. Vaega lea, o latou o tagata e mumusu e foa'i, aumai ma fa'aali mai la latou mau, po o ā itu e leaga ai le ola foai mo isi tagata, a o iina fo'i, e iloa ai e lau susuga i le faiaoga o lo o malamalama le vasega i le mataupu.

PESE: Pese ma Vi'iga – 143.

A'OA'OGA.

1. Foa'i ma le loto malie.
 2. 'Aua le tauānuina lau foa'i.
 3. Foa'i ma le talitonu, e toe faatumu mai e le Atua.
 4. Tatala lou loto, e le tau faatonuina ai lau foa'i e tatau ona fai.
-

ASO SA

**29 NOVEMA, 2015
O LE AFIO A'E/ATEVENI.**

MATAUPU :

IA FAI SAU TAULAGA LELEI.
(Present a good offering)

SINI :

Ia a'oa'o le vasega ina ia malamalama i le tāua o le taulaga e tapena lelei mo le Atua.

TUSI FAITAU : Mataio 2: 10 – 11.

FESOASOANI MO FAIAOGA.

E tele ma anoanoa'i meaalofo eseese ma le tamaoaiga sasa'a mai e le Atua mo i tatou, lea ua faatamaoigaina ai tatou i lona alofa tunoa, ma ua leai lava se vaega o lona agalelei ua faamativaina ai tatou. O lona uiga, o le sosia ma le tamaoaiga ua tatou maua i lea aso ma lea aso, o

mea totino lava a le Atua na ia foa'i mai, ua faamativaina o ia ina ia faatamaoagaina i tatou. Peitai o le ā sa tatou tali atu i le alofa tele ua ofo ina mai mo i tatou? O le uiga lea o le manatu autu i lenei foi taeao, *Ia fai sau taulaga lelei*. Pe le o la tatou tali atu ea lea i le Atua i lona alofa mai e ala i le fatinoga o sau taulaga lelei mo ia?

A o le tala lea na faitauina o le tala ua malamalama ai, auā e talitonu ua silafia e ā outou susuga i faiaoga le malaga a makoi na o e saili le pepe o le 'a fanau mai, e fia ofoina atu ā latou meaalofa mo ia. O lona uiga, o tusitusiga lava ia a Mataio, o le faailoaina mai lea o le tulaga Mesia o le Ali'i o Iesu, o le Mesia na valoia mai e le perofeta o Isaia, o loo tā'ua i le fuaiupu e 6, *O oe fo'i Petele'ema i le nu'u o Iuta, e te le topito ona fa'atauva'a i ali'i o Iuta; aua e tupu mai ia te oe le faipule, o le na te pule i lo'u nu'u o Isaraelu*. O lea ua mavae atu auga perofeta, mavae atu auga tupu, peitai e le tu'uanoaina e le Atua lona nu'u, lea ua valoia mai o le a fanau mai le Mesia, na te pule fo'i i lona nu'u o Isaraelu. O lona uiga o le malaga a makoi mai sasa'e e agai i Ierusalem, latou te fia iloa le mea o fanau ai le pepe, o le tupu silisili lava o ia, e fia ofo atu ā latou meaalofa o le auro, pulumuro ma le pulu lipano mo le Ali'i. O meaalofa ua tapenaina ma saunia lelei, a o meaalofa e faitaulaga ai i le Mesia ua fanau mai. E faapena se lagona na o' o ifo i nei makoi e to'a tolu, o le agaga ua fia ofoina atu ma le atoatoa ā latou meaalofa e fai taulaga ai i le Ali'i, o le agaga fia fai taulaga, a o le lagona fai mea sili. Peitai o le ata o le faataimuaga o le Afio mai o le Mesia i le lalolagi na te laveaina ona tagata mai le agasala, o le Mesia e fai taulaga i ai tagata uma. O le faamanatu foi lea mo tatou o tagata faatuatua, ia tatou lagona le fia ofoina o ā tatou meaalofa eseese tatou te fai taulaga ai i le Ali'i, po o o le ā lava le ituaiga meaalofa ua saunia, ia ofoina ma le loto talitonu moni i le Atua, ofo ma le loto atoatoa meaalofa tatou te faitaulaga ai i le Mesia manumalo.

GALUEGA FAATINO:

Manaia ae fai se faatinoga o le tala auā e faigofie ma ua malamalama fo'i, o le mea lea e ao ai ona tofi e lau susuga i le faiaoga ni tamaiti se to'atolu e fai ma le au makoi ma latou meaalofa e fai taulaga ai i le Ali'i o Iesu. Tofi foi se tama ma se teine e fai ma Iosefa ma Maria faatasi ma

Iesu, ae gasolosolo atu makoi ma momoli atu meaalofa ma ifo i le pepe. E tāua foi lea va'aiga e faamanatu pea i tamaiti le tāua o le ofoina atu o meaalofa e faitaulaga ai mo le Atua.

PESE : Pese ma Vi'iga – 158.

A'OA'OGA.

1. Ia le aunoa ona fai taulaga i le Atua.
2. O le ofoina o lau sene, o lou fai taulaga lava lea i le Atua.
3. 'Aua le fai taulaga pepelo, a ia tapena ma le loto atoatoa.

.....

TESEMA: O LE FETUAO PUPULA (The Morning Star).

Ua faatāua i lenei masina Iesu Keriso le Pepe o le Kirisimasi. Ua faatusa o ia o le Fetuao Pupula e pei o le autu o lenei masina. O le faamoemoe – ia pupula mai i le ola o talavou le Keriso e ala iō latou ola ua ola ai Keriso ma fa'aalia ai lona finagalo faaola. O ā suiga ua aafia ai le ola o tupulaga i nei aso, ae 'a pipii lava i le Fetuao Pupula, e tumau le susulu mai o lona malamalama ma lana amiotonu iō latou olaga

.....

ASO SA. 6 TESEMA, 2015.

MATAUPU : O LE NATURA O LE PEPE O LE A FANAU MAI. (The nature of the new born child).

SINI : Ia a'oa'o le vasega ina ia malamalama i le natura o le pepe, e alofa ma lavea'i tatou mai le tele o ā tatou solitulafono.

TUSI FAITAU: Isaia 53.

FESOASOANI MO FAIAOGA:

O le Tusi o Isaia, o lo o mafuli ai manatu a le au suesue o le Tusi Paia, o lo o vaevaeina i ni tafa tetele se tolu le tusi atoa, peitai o le mataupu lea na faitauina, o le vaega lona tolu lea o le tusi, po o le Isaia lona tolu, o taimi o le ‘ā a’e le tafeaga. A o le uiga lea o le igoa o Isaia pe a faaliliuina mai le gagana Eperu, o le faaolataga a le Atua. Ua talafeagai tonu le uiga o lona igoa ma le faaolataga a le Atua lea o lo o ia vavalo atu ai ia Iuta, ma folafola le natura po o le uiga o le pepe o le a fanau mai. Lea la o lo o faamatalaina i le mataupu lea na tatou faitauina, o le natura o le pepe o le a fanau mai. O ai le pepe? O Iesu le pepe, o Ia o le faaolataga mo Isaraelu ma le lalolagi atoa, lea la e manatu Isaraelu o le Mesia o le ‘ā afio mai o le toa e tau mo i latou, e sau ma le malosi faa fitafita, peitai e le o le finagalo lea o le Atua. A o le pepe o le a afio mai, o le pepe e inosia ma tu’ulafoaina ma faasauāina o ia e tagata, ae leai se upu e tasi e tali atu ai. O le natura lea o le Mesia o lo o valoia nei e Isaia o le a fanau mai, na te faatoilaloina le agasala ua leiloa ai le tagata i lona va ma le Atua. O lona uiga o le toe fo’i ai o Isaraelu mai le tafeaga, a o nofo pologa i Papelonia, o le toe fo’i e atiina a’e ona eleele na faatafunaina, ma toe fau le malumalu e ogatotonu ai ana tapuaiga i le Atua. A o le ata manino lea o le fo’i e faatali le fanau mai o le Mesia lea ua valoia mai e Isaia, o le faaolataga mo le lalolagi atoa. O lona uiga, e le o se mesia e tau mo tagata i le malosi faa-fitafita, a o le pepe o le a afio mai e saili agaga o tagata ma faasaoloto mai le pologa o le agasala. O lona uiga o le feau mo tatou, ia tatou faataitai i le natura o le pepe o le ‘ā fanau mai. E faapefea ona tatou faataitai i ai, ioe tatou te faataitai ia te ia e ala i le loto maualalo, agamalu, loto alofa ma ia ola faamagalalo atu i ē agaleaga mai, alofa i lou tua’oi, o le natura lea o le pepe o le a afio mai, e a’oa’o tatou ina ia tatou savavali i ala e tusa ma le finagalo o le Atua. O se lu’i foi lea mo tupulaga talavou, ia ola mata’u i le Atua ma le loto maualalo ona ‘e maua lea o ana faamanuiaga ma faa-potoina ai oe e le Atua e manuia ai lou olaga.

GALUEGA FAATINO:

Ia fesiligia le vasega e faatatau i le tala ina ia tatala mai ō latou manatu po o ai le pepe o le a fanau mai, ae po o o le ā lona natura masani. O iina fo’i e iloa ai e lau susuga i le faiaoga o lo o malamalama le vasega i le mataupu e pei ona faamatalaina.

PESE: Pese & Viiga - 84.

A’OA’OGA.

1. Faamasani i le natura o le pepe o le ‘ā fanau mai.
 2. Ia manatua le faaolataga na faia e le pepe ina ua fanau mai.
 3. Fai lou talavou ma talavou amio lelei e tusa ma le finagalo o le Atua.
-

ASO SA. 13 TESEMA, 2015.

MATAUPU: FAI LOU OLA MA MEAALOFA MO IESU
(Your sanctified life as a gift for Christ).

SINI: Ia a’oa’o le vasega ina ia malamalama i le tāua o le fiafia e ave ō latou ola e fai ma meaalofo e ofoina atu mo Iesu.

TUSI FAITAU: IITimoteo 4:1 – 5

FESOASOANI MO FAIAOGA.

O le ave a lou ola e fai ma meaalofo mo Iesu, o le ofoina lava lea o lou tagata atoa mo Ia. E faapefea ona faatino? E ala i lou usitai, faamaoni, lotomaulalo ma amio lelei. O fua fa’aaliali ia e iloa ai ua ofo lou ola e fai ma au mea’alofo mo Iesu, ma e tatau ona amata i totonu o lou aiga, o le nu’u ma le Ekalesia. O iina e atagia ai ua tafatasi ma taula lou ola ia te ia, e pei o la Paulo, auā ua le o toe ola a’u, a o Keriso ua ola i totonu ia te a’u.

O le mataupu lenei na faitauina, o le tusi faamalosi ‘au a le aposetolo o Paulo i lona atali’i faaleAgaga o Timoteo, ina ia matua faamalosi i le galuega o le talaiina o le Talalelei ia Iesu Keriso. E foliga mai i le tusi lenei a Paulo, ua tau i ai se fe’ese’eseaiga o le au faigaluega, pe a manatu i le uiga o ana upu, *e i ai nisi ua latou tete’a ma valavala, e pei o Temu ua toe fo’i i le olaga sa ola ai muamua ma ua alu i Tesalonia, o Kerese ua alu foi i Kalatia, o Tito ua alu i Talamatia.* Lea la e naunau atu le aposetolo ia Timoteo e fia vave maua se la feiloā’iga ma se’i matuā faamalosi atu i le Talalelei. O le naunautaiiga o le aposetolo, ia vave ona o’o le Talalelei i tagata uma i Efeso ia faamalosi i aso e taugalemu ai ma aso e le taugalemu ai, ia faatonu atu ma a’oa’o atu, ia apoapoa’i ma le onosai, ina ne’i o’o mai ona po latou te le toe talia ai a’oa’oga e ola ai. A o i tatou te iloa ai, e tele lava nisi talitonuga eseese o lo o salalau solo i Efeso ma isi talaiga o lo o tete’e ai tagata i le toe tu mai o Iesu Keriso. O le ala lea o le naunau atu o Paulo i lona atali’i faaleagaga o Timoteo, ina ia onosa’i i le galuega ma ia faatamatane auā ua iloa lava e Paulo ua le o toe umi ona faasalaina lea o ia i le oti. A o le ata va’aia fo’i lea o le tagata ua ofoina ma le atoatoa lona ola e fai ma meaalofoa mo Iesu, e le fo’i i se mea auā po o ā lava faigata ma le tau faafefe mai o le oti, e le mafai ona solomuli, ona o lea ua va’ai tino i le fa’aali mai o Iesu Keriso e ala i lona toetu mai i le oti ma le tu’ugamau. A o se faamanatu tāua foi lea mo tatou uma e pei ona fai mai ai le manatu autu. Ia fai ō tatou ola ma meaalofoa mo Iesu. E faapefea ona faatino? E ala i lou usitai, faamaoni, loto maualalo ma amio lelei, ma ia aveae oe e fai ma tama ma teine talavou e faataitai i ai le toatele o nisi tupulaga talavou o lo o ola pea i le pogisa, ma ua maumau ō latou ola i mea le aoga o le olaga. O fua fa’aaliali ia e iloa ai ua ofo lou ola e fai ma au mea’alofa mo Iesu, ma e tataua ona amata i totonu o lou aiga, totonu o lau Aoga Aso Sa, o le nu’u ma le Ekalesia. O iina e atagia ai ua tafatasi ma taula lou ola ia te ia, a o le lagona o le tagata ua utufia i le malosi faale-Agaga e le solomuli pe faafiti gofie i mea faigata tusa lava pe o’o i le oti, a o le oti a le tagata ua ofo atoa lona ola mo Iesu Keriso ma lana Talalelei, e pei o la Paulo, auā ua le o toe ola a’u, a o Keriso ua ola i totonu ia te a’u.

GALUEGA FAATINO: Faatalanoaga

Faatalalanoa le mataupu i le vasega ina ia faailoa mai ni ō latou lagona, pe tāua le ofoina o ō latou ola e fai ma meaalofoa mo Iesu. A fai e tāua, po o ā la ni fua fa’aaliali e maua e le tagata ua ofo lona ola mo Iesu? Saunia foi e lau susuga i le faiaoga ni nai fesili se tolu pe fa, e tulituliloa ai le mataupu ma ia mautinoa o lo o malamalama le vasega i le lesona na faamatalaina.

PESE: Pese & Viiga – 184.

A’OA’OGA:

1. Ia moni le ofo o lou ola e fai meaalofoa ai mo Iesu.
2. ‘Aua le ofo pepelo lou ola ona o le va’aiga a nisi tupulaga talavou.
3. Ofo lou ola mo Iesu e pei ona mua’i ofo mai lona soifua e faaola ai tatou.

.....
Ia manuia le Kerisimasi 2015 & Tausaga Fou 2016